

**NATIONAL ASSEMBLY OF  
SEYCHELLES**

Tuesday 23<sup>rd</sup> May, 2023

*The Assembly met at 0901am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonjour nou bann Manm Onorab, nou bann zofisyé Lasanble e piblik ki pe swiv nou dan zot lakour oubyen an deor, byenveni pou nou travay lasemenn.

Nou a komans avek prezantasyon dokiman Madanm Clerk mon apel ou pou sa.

**MADAM CLERK**

Mersi Mr Speaker. Bonjour Mr Speaker, bonzour tou bann Manm, bonzour tou bann staff Lasanble, tou dimoun ki a lekout.

Bann papye ki pe ganny prezante ce matin i konn swivan;

S.I 30 of 2023 *The Harbour (Inner Harbour) (Control of Traffic Regulations, 2023.*

S.I 31 of 2023 *Value Added Tax (Amendment of the First Schedule Regulations, 2023.*

S.I 32 of 2023 *Beneficial Ownership (Amendment) Regulations, 2023.*

S.I 33 of 2023 *Law Commission Act (Commencement) Notice, 2023.*

S.I 34 of 2023 4.25% 5 Year Development Bank of Seychelles Bond Guarantee of Debt Order, 2023.

S.I 35 of 2023 *Broadcasting and Telecommunication (Mobile Number Portability) Regulations, 2023.*

S.I 36 of 2023 2.90% Three Year Treasury Bond Debt Order, 2023.

S.I 37 of 2023- 4.40% Five Year Treasury Bond Debt Order, 2023.

S.I of 38 of 2023 5.90% Seven Year Treasury Bond Debt Order, 2023. Mersi Mr Speaker.

**MR SPEAKER**

Mersi Madanm Clerk. Mon apel ou egalman pou prezantasyon *First Reading Public Bills.*

**MADAM CLERK**

Mersi Mr Speaker.

*This Act may be cited as the National Aids Council of Seychelles (Repeal) Bill, 2023.*

*This Act may be cited as the Public Enterprises Act, 2023 and shall come into operation on such date as the Minister may, by notice published in the Gazette appoint. Mersi Mr Speaker.*

**MR SPEAKER**

Mersi Madanm Clerk. Onorab Pillay ti'n demann mwan laparol pou li adres en sityasyon regardan son Manm, mon pou akord li laparol me pa an se moman Onorab Pillay nou a pran li anba *Order 25*, apre kestyon.

Donk, nou aprezan prosede avek *Private Notice Question*, e madanm reporter ou ava apel Minis e son delegasyon.

Bonjour e byenveni Minis Patricia Francourt, Minis pou

Lanplwa e Zafer Sosyal e egalman ou bann zofisyen Mrs Linda William Melanie PS dan Departman Zafer Sosyal, Mrs Marie-Agnes Ally *Principal Social Worker* dan *Agency for Social Protection* e Lenspektor Agnes Labiche *Child Protection Unit* Lafors Lapolis Sesel, e lo latab a kote nou annan Mrs Natacha Louise *Senior Social Worker*. Mersi pou zot prezans pou pran *Private Notice Question*. Mon ava apel *Leader Lopozisyon* pou met son kestyon silvouple.

### **HON SEBASTIEN PILLAY**

Mersi Mr Speaker. Bonzour Mr Speaker, Bonzour tou koleg Onorab e bonzour Minis avek ou delegasyon e bonzour tou dimoun ki a lekout.

Mr Speaker avek lentansyon pou sey ganny plis konprenezon e pou nou kapab ede.

Eski Departman Zafer Sosyal e *Child Protection Unit* dan lapolis pe rankontre okenn problem pou pran aksyon dan bann ka labi lo zanfan? Mersi Mr Speaker.

### **MR SPEAKER**

Mersi Onorab. Minis ou repons *please*.

### **MINISTER PATRICIA FRANCOURT**

Bonzour Mr Speaker, *Leader Zafer Gouvernman*, *Leader Lopozisyon*, tou Manm Onorab e tou dimoun a lekout.

Mr Speaker proteksyon zanfan i konsern tou dimoun lafanmir kot zanfan i ne e grandi i merit sa premye landrwa ki devret fer tou pou protez zanfan.

Vwazen dan kominate i devret osi fer son par pou asir proteksyon

nou zanfan, apre sa i bann lenstitisyen Gouvernman ki ganny met an plas anba Lalwa ki annan rol e responsabilite pou asir e adres okenn sirkonstans kot i annan soupsonn oubyen en lendikasyon ki an zanfan i a risk.

Divizyon Servis Sosyal ki anba Departman Zafer Sosyal i annan manda legal pou asir dan bann ka ki ganny rapporte avek son lofis. Mon oule fer resorti ki bann ka i ganny rapporte swa par endividé lazans swen lasante, bann lekol, lapolis e lezot ankor. Mon osi mon oule soulinyen ki se selman kan en ka i ganny rapporte ki en case i ganny ouver.

*Unit Child Protection* servis sosyal i travay tre pros avek *Unit Child Protection* lapolis dan bann ka kot i annan en rapor alegasyon labi kont zanfan. Departman Zafer Sosyal i travay an lekip avek lezot partner ki enkli ledikasyon, lasante, e NCC dan bann ka labi zanfan ki ganny refer.

Sak lazans i travay dapre zot manda spesifik avek le bi pou anmenn soutyen pou sa zanfan e son fanmir. Sa bann lazans apard ki fer lanket i anmas levidans dan sa bann ka, zot osi annan sa loportinite pou zwenn ansanm pou diskit lo bann ka ki zot pe travay avek.

Se la kot desizyon kolektiv i ganny fer e zot tonm dakor lo bann lantervansyon, ensi ki eksplor bann difikilte e diskit lo ki mannyer pou sirmont sa bann difikilte.

De la travayer sosyal i develop sa ki nou apel en *Care Plan* ki en gid pou determin rol sak lazans enkli lafanmir pou siport e protez sa zanfan. Sa gid i osi servi dan bann rankont tel ki *Inter-Agency Meeting*, diferan *case conference* e *case*

*management meeting* ler pe reviz bann ka pou *update* progre ki pe ganny fer oubyen bann difikilte.

Mr Speaker dan tou ka alegasyon labi avan ki travayer sosyal i bouze pou fer lenthervansyon, premye aksyon se ganny konsantman paran. Prosedir i al pli byen ler nou ganny bon korperasyon e siper paran.

Mon oule fer resorti ki alegasyon labi i bezwen ganny siporte avek levidans, tel ki versyon sa zanfan atraver en *statement* ki ganny pran par zofisyel lapolis dan prezans travayer sosyal e paran sa zanfan e rapor medikal ki enportan pou determin kalite labi.

Sa bann keksoz preliminer i ed *Unit Child Protection* lapolis pou zot kontinyen zot lanket avek lezot temwen pou fer larestasyon sa agreser. Eski travayer sosyal i rankont serten difikilte dan zot travay? Larepons i wi Mr Speaker, difikilte i vin ler sa paran li, li menm sa dimoun ki'n fer sa lofans lo sa zanfan.

La travayer sosyal i bezwen al rod rekour ek sa lot paran ki bokou fwa i tre difisil prenon kont bann sityasyon familyal kot bokou fwa fanmir i ganny kase, paran pa dan lavi sa zanfan nou pa konnen kot pou ganny li oubyen senpleman i pa enterese.

I malere poudir ki bokou fwa sirtou dan bann ka labi seksyel i annan paran ki prefere kouver zot *partner* oubyen manm fanmir. La zot rod leskiz poudir ki sa zanfan pe koz lalang e refize donn zot konsantman e korperasyon.

Dan bann ka parey travayer sosyal i bezwen lyez avek Biro

Prokirer Zeneral pou ganny en lot Lakour, pou ganny en lot Lakour sirtou ler pou fer egzaminasyon medikal sa zanfan.

Lot difikilte i avek paran ki pa respekte bann lagreman ki'n ganny fer viz a vis byennet sa zanfan. Paran pa kit kontak avek travayer sosyal ase souvan pou donn lenformasyon lo okenn difikilte oubyen serten sityasyon ki kapab arive ant sa dernyen kontak avek travayer sosyal ziska lot dat zot apwentman.

Mr Speaker parey mon'n deza dir dan sa Lasanble i annan bokou pou fer, i arive parfwa ki i kapab annan serten defayans ki bann ka pa pe ganny swiv pli pre e sa i akoz serten sityasyon kot lezot sirkonstans dan en lot ka i pran letan sa travayer sosyal. Me sa pa vedir i negliz son travay, akoz i pe osi kont lo sa paran ou manm fanmir pou fer son bout.

Dan en lazournen kot i ti'n planifye son travay pou al fer vizit kot lekol ouswa dan lakour tou i kapab sanze sirtou ler i ganny *allocate* en ka ki bezwen donn priyorite, pou fer tou bann prosedir e adres lezot nesesite ki kapab enkli rod en plasman pou landrwa alternativ pou en zanfan ki bezwen ganny tire dan sa sityasyon pou protez li.

Mr Speaker mon kapab asir sa Lasanble ki bann travayer sosyal i fer tou zot mye pou pran tou aksyon rezonnab dan en kourt dele letan ler en ka labi kont zanfan i ganny raporte.

Parey mon'n dir lo komansman travayer sosyal i bouze pou fer sa *assessment*, etablir sa rapor avek sa viktim e prepar li pou donn son *statement* avek *Child Protection Unit* dan lapolis.

Sa *unit osi i fer tou sa ki zot kapab pou fer lanket, anmas levidans kredib pou konklir zot dosye oubyen police case file parey nou dir e anmenn bann abizer devan lakour.*

Mr Speaker nou tou nou annan sa devwar *civic, civic duty* parey nou dir *and duty of care* pou get byennet nou zanfan e fer sir ki nou zanfan i reste touzour an sekirite sa i primordyal. Sak fwa ki zanfan i sibir en form labi mon Minister i atriste e parey mon'n dir ansanm avek nou bann *partner* nou fer tou sa ki posib pou nou fer lenvestigasyon e donn sipor neseser.

Mr Speaker, permet mwan poudir ki soufrans ki en zanfan i pas ladan atraver nenport ki form labi i devret nou soufrans e nou pa devret reste en diferan. Nou bezwen fer tou e rod tou mwayen pou donn sipor bann zanfan e fanmir ki pe pas atraver sa bann soufrans.

Pou terminen ankor enn fwa mon lans en lapel tre for avek tou dimoun, fanmir endividé dan kominate koman lezot lenstitisyon ki donn servis lafanmir, enkli nou zanfan pou vin pli vizilan ler ki en zanfan i prezant devan nou avek bann sirkonstans ki fer nou konsernen lo son byennet.

Mon swete ki fanmir i vin pli for e atantif e ki zot fer zot par pou anpes labi arive. Mersi Mr Speaker.

### **MR SPEAKER**

Mersi Minis. Nou pou pran kestyion siplemanter bann Manm apart loter kestyion, me vi ki lakantite Manm ki'n lev lanmen pou kestyion mon pou *extend* kestyion siplemanter otan ki posib. Me selman mon averti bann Manm poudir mon pa garanti ki mon

pou kapab pas tou kestyion siplemanter sorti ki lezot Manm, mon pou al lo osi otan ki posib e mon ava ale ziska 10er.

Mon komans avek Onorab Sathy Naidu.

### **HON SATHYA NAIDU**

Mersi Mr Speaker. Bonzour Mr Speaker, bonzour Minis ek ou delegasyon e tou koleg Onorab. Minis eski ou pou dan en pozisyon pou enform Lasanble lo size sa *Sexual Offences Bill* ki ankor dan *drafting stages*, ki bor eski nou sitye? Akoz mon rapel *Attorney Zeneral* lannen pase dan mwan Out, zot ti'n dir ki zot in fini demar sa proze. Prezan ki bor eski nou ete? Akoz dimoun la deor i le ki i annan bann santans pli sever, se sa reaksyon ki'n nou annan baze lo sa size.

E dezyenmman, eski i zis rol Gouvernman pou adres labi zanfan? Eski sosyete osi pa i devret pe fer son par? Wi atraver ou respons ki nou'n prezante pli boner ou'n tous lo la, me selman mon ti a voudre ou al en pe pli lwen. Mersi Mr speaker.

### **MR SPEAKER**

Mersi, Minis ava ed nou par gard respons direk lo kestyion e konkret, e par egzanp lo dezyenm pwen Onorab Naidu in note poudir ou'n deza reponn. Minis ou respons silvouple.

### **MINISTER PATRICIA FRANCOURT**

Mersi Mr Speaker. Mersi Onorab. Onorab ozordi mon ava dir ki poudir sa *Sexual Offence Bill* i kot *Attorney General's Office*, e i annan en gran konsiltasyon ki pe fer lo la i en size delika e bezwen pran letan pou kapab depouy li parey nou dir. E la

mon fer en lapel pou nou demann tou bann *partners* e tou akoz, avek bann MDAs pou le moman annou korpere annou vin ansanm e annou fer sir ki letan i annan bann *meetings* nou tou nou vini e nou koz lo sa size, i enportan e apre sa *of course the public*.

*Right so again* nou tou pran sa loportinite vin devan donn nou kontribisyon e mon mazinen, mon pa kapab koz lo AG's Office mon mazinen *sometime in the future whether it's fourth quarter* i pe vin Lasanble, sa ki mon'n ganny dir. So, sa i ankourazan.

Dezyenm bout parey mon'n dir dan mon lentrodiiksyon mon pou *very brief*. *Child protection* i responsabilite tou dimoun dan lasosyete, e nou tou nou konnen nou tou la dan sa lasal avek piblik ki pe ekout mwan deor i konnen poudir nou annan en responsabilite sa ki nou war, sa ki nou tande, sa ki nou prevwar *we must come forward*.

Si pa vin devan ki mannyer nou par egzant servis sosyal nou pou konnen. So, *everybody has a responsibility to play a part*. Mersi.

### **MR SPEAKER**

Mersi Minis. Bann Manm a sirman rapel ki nou pa kapab fer referans avek okenn ka spesifik, mon sipoze mon pa bezwen elabor lo la. Onorab Monthy ou kestyon.

### **HON PHILIP MONTHY**

Mersi Mr Speaker. Bonzour Minis avek ou delegasyon. Minis mon konnen ou'n fer referans ki labi zanfan i en konsern tou dimoun e ou annan parfetman rezon, me i annan bann ka kot petet i annan dimoun

poudir *ok* be sa bann zafer i les sa deroule. Eski zot bann differan lazans konsernen zot pe mazin vin en pe pli proaktiv.

Par egzant ou vwar en paran avek en zanfan 7er diswar obor semen dan en group drog, pe konsonm drog sa zanfan i la. Bann lazans konsernen ler i pase i vwar sa, eski zot reakte? Akoz dan mon distrik i annan en bon pe sa bann ka koumsa.

E dezyenm kestyon, eski zot pe mazin revwar en pe zot polisi adopsyon? Akoz i annan bann ka kot i annan labi me zot Polisi se o maksimonm posib sey reabilit sa paran pou ki sa zanfan i reste avek sa paran, me nou konnen poudir laplipar mazorite ka i pa posib si paran i dan sibstans.

E i annan en manm fanmir ki pare pou pran sa zanfan, e zot vwar zot pe rankontre plizyer difikilte. Eski zot pe mazin revwar en pe sa Polisi dan bann tel lenstans. Mersi.

### **MR SPEAKER**

Mersi Onorab. Minis, ou repons

### **MINISTER PATRICIA FRANCOURT**

Mersi Mr Speaker, mersi Onorab. Ou'n byen dir Onorab, parey mon'n dir dan mon *speech* mon *opening speech* tou sa bann dimoun dan kominote i annan en rol pou li zwe, en rol tre for. Departman Servis Sosyal i pa lo *street every night* li, o kontrer nou travayer i kapab dan lakour avek son telefonn ki nou annan en *help line* e nou'n fer en kantite *sensitization* lo la nou'n dir *116 is a number and it's for free*.

Tou bann *operators* in donn nou sa limero, si ou vwar okenn

keksoz ki sispe poudir i annan en lentansyon pou fer zanfan mal sa limero i *free* e i annan *advert* ki pase lo televizyon e i lo nou *website* partou lo nou *Facebook page*.

So, si nou vwar keksoz ki nou konnen i poz en danze pou zanfan nou annan en limero e par kont mon kapab dir ozordi nou gannyen en kantite dimoun ki *call*, e plis adilt konmela ki *call* zanfan osi i *call* me plis adilt. Savedir i annan en *awareness* en *vigilance* dan sosyete ki dimoun pe pran plis sa responsabilite.

Wi, tou bann lazans i bezwen annan en rol kle pou zwe. Lapolis i lo *street* aswar, si zot war i annan keksoz ki *suspect* poudir i annan possibleman en lefe pou labi zanfan, *it's their job*. Zot fer bokou *sensitization*, la *NCC* mon konnen i fer bokou *sensitization* lo son bann programm akoz sa i zot manda zot fer bokou *sensitization* pou edik biblik e i annan bann *spots* ki zot pase, nou osi annan bann *spots* ki nou pase.

So, kontinyelman i annan *awareness* poudir tou dimoun *please?* Regard ki pe pase dan lakour oubyen dan nou kominate, nou tou la e bann dimoun ki pe ekout nou, nou annan en responsabilite. Mersi. Mon a zis les *PS* Mr Speaker si i posib pou koz lo sa bout adopsyon. Mersi.

### **MR SPEAKER**

Wi, *PS* si oule azoute.

### **PS LINDA WILLIAM MELANIE**

Mersi Mr Speaker. Mersi Onorab pou ou kestyon, bonzour tou dimoun.

Mr Speaker probableman i enportan petet pou nou zis eksplik poudir pa neseserman ki tou bann

fanmir ki anvi pran en zanfan i pas atraver en prose adopsyon. Akoz adopsyon i en zafer legal ki i annan en kantite, ou bezwen swiv tou son bann Polisi pou ou fer sir ki ler i arriv devan lakour tou keksoz i legal pou sa fanmir kapab adopte.

Me sa ki servis sosyal i esey fer ler i annan en manm fanmir ki pare pou pran en zanfan ki nou santi i bezwen ganny serten proteksyon i bezwen ganny retire avek sa paran biologik. Travayer sosyal i eksplor tou posibilite pou ki sa fanmir i kapab pran responsabilite sa zanfan.

Me parfwa kontrent ki arive kekfwa sa fanmir i war li annan difikilte finansyel pou annan en lot zanfan avek li e la nou sey fer bann formalite nesesar kot nou kapab travay ansanm avek Lazans Proteksyon Sosyal.

Me lot sityasyon pli konplike se sa paran biologik li menm ki fer lavi petet sa lot manm fanmir en pe difisil letan pou kapab rann sa servis pou zanfan, e se pou sa rezon ki annan de fwa ler nou pa ganny okenn alternativ nou bezwen met zanfan dan en *home* parey nou vwar. Mersi Mr Speaker.

### **MR SPEAKER**

Mersi *PS*. Onorab Audrey Vidot ou kestyon.

### **HON AUDREY VIDOT**

Mersi Mr Speaker. Bonzour Mr Speaker, tou Manm Onorab, Minis ek ou delegasyon.

Minis mon kestyon i ler ou'n dir bann lazans ki lyez avek Departman Sosyal zot fer bann rapor, mon pe donn legzanp parey lapolis parey *NCC*, parey kot lasante. Letan zot donn en rapor lo en ka kot

i annan soupsonn ki annan labi oubyen i annan fe ki i annan labi.

Kantite letan ki zot pran oubyen frekans ki zot swiv bann swivi vizit ki zot fer pou asire ki sa zanfan i pa a risk pou li kontinyelman ganny abize?

Apre mon lot kestyon eski i annan lenvestigasyon ki zot fer pou regard dan bann ka kot si rapor in ganny soumet, me i napa konsistan dan, dan vwar si sa zanfan i dan sekirite si zot fer lenvestigasyon lo la? Mersi.

#### **MR SPEAKER**

Mersi Onorab. Minis, *panel*. Si en lot manm *panel* pou pran lev lanmen silvoule.

#### **PRINCIPAL SOCIAL WORKER** **MARIE-AGNES ALLY**

Mersi Mr Speaker, mersi Onorab pou ou kestyon, Bonzour tou bann dimoun.

Definitivman parey ou'n fer resorti, nou ti fer resorti bann ka labi i ganny refer par bann diferan lazans, *ok?* E servis sosyal byensir i annan sa premye rol pou etabli sa lenformasyon pou konpran kwa ki pe ganny dir in arive e an menm tan vwar sa zanfan, sa paran, sa fanmir ki konsernen avek sa ka pou nou kapab ganny sa bann lenformasyon neseser pou nou kapab komans *built* nou *case*.

E bokou fwa ler lenformasyon i kredib, i kler i bokou pli fasil e petet dan en lespas en lazournen nou pou'n kapab fer serten prosedir apropriye ki enkli *statement* sa zanfan, son medikal e lezot keksoz ankor ki vin avek.

E preznan sa i pou tou depan osi ler ou'n koz an term *frequency* ki son swivi i vini, i pou tou depan ka lo ka. Akoz dizon bann swivi ki'n annan pou fer i pli kler, i pli spesifik fer krwar en zanfan i fasil i pa pou dan okenn risk. Bann swivi ki pou annan i pou en pti pe pli fasil.

Konpare avek en ka kot en zanfan petet i annan difikilte parey Minis ti fer sorti boner dan son *statement*, pa pe ganny korperasyon paran pa pe annan lezot dimoun pou kapab ede avek prosedir. La aprezan ou pou war son *frequency* kapab i pli tarde an term anmas levidans e fer bann lezot swivi ki vin avek.

E sa bokou fwa i kapab ganny prolonge parey mon'n sey eksplike i tou depan ka lo ka, pli i pli fasil pli lenformasyon i pli direk petet son dirasyon i pa pou lontan. Me pli ki annan bann konplikasyon, la son dirasyon pou pli lonterm. Nou pa kontan, e kliyan pa sipoze ganny fer reste dan en sistem lontan.

Ler mon pe dir ou lontan i kapab 3 mwan, i kapab 6 mwan, i kapab 1an tou depan. Me i annan dan bann ka kot ler i annan serten difikilte i annan bann konplikasyon ki vini ankor, la nou war kot servis pou bezwen prolong lontan kot i a kapab al detrwa lannen malerezman. Mon krwar mon'n reponn ou kestyon.

#### **MR SPEAKER**

Mersi. si ou annan klarifikasiyon fer li vit, nou annan plizyer Manm pe espere.

#### **HON AUDREY VIDOT**

Wi, Mr Speaker eskiz mwan. Mersi ou pou larepons i pa'n reponn konsernan lenvestigasyon, par

egzanp i annan ka kot si zot konnen sa zanfan i pa sipoze sanz lokasyon petet pou retourn kot en lakour. Me apre nou war poudir in ale, eski e sa zanfan i kontinyelman ganny abize. EsKi ki zot fer ek bann ka lenvestigasyon ou pa'n reponn kestyon lo la. Mersi.

### **MR SPEAKER**

Mersi, Minis endik mwan lekel ou *panel* ki pou reponn *please*.

### **MINISTER PATRICIA FRANCOURT**

Mr Speaker, Ms Marie-Agnes Ally pou kontinyen lo sa laliny. Mersi.

### **MR SPEAKER**

Mersi, madanm kontinyen.

### **INSPECTOR AGNES LABICHE**

Mersi Mr Speaker. Sa lenvestigasyon parey nou'n fer resorti wi i annan sa swivi par travayer Sosyal, an menm tan i annan pou fer avek komitman manm fanmir tou. Akoz servis sosyal malerezman avek lakantite ki ou annan pou fer i pa pou posib dan tou ka pou toultan dan prezans sa fanmir.

I pou tou depan ki mannyer sa lot dimoun parey nou'n koz boner Minis ti fer resorti i annan sa *care plan* i annan sa aksyon ki sak dimoun i annan pou li fer. So, si sa manm fanmir osi i annan son devwar i annan son kalite responsabilite pou li pran pou asire ki sa zanfan i dan proteksyon.

So, i pou depan osi lo son komitman pou li fer sir ki sa i pase, akoz i kapab nou tonm dakor lo en keksoz dan en lespas letan ki i sanze apre. E nou petet nou pa pou ganny sa *feedback* avan ki nou ganny sans

re ganny kontak avek sa fanmir nou pa pou'n ganny sa *feedback* a tan pou nou war poudir i annan serten sanzman.

### **MR SPEAKER**

Mersi Madanm, Onorab Aglae ou kestyon.

### **HON EGBERT AGLAE**

Mersi Mr Speaker. Bonzour Minis ek ou *panel*.

Minis mon ti a petet kontan premyerman demann ou, EsKi dan sa lapros travay akoz *the juice of the questions* li menm li se problemm pou pran aksyon, ok? I annan 2 lazans enportan la nou pe sitye avek, i annan *social worker* avek sa *Child Protection Unit* ki tonm anba lapolis.

Eski i annan en lantant travay ki ou satisfe ki tou lede baze lo zot pouvwar ki zot annan pou fer legzekisyon dan bann ka ki ganny raporte i annan sa lantant kot aksyon i kapab fer o pli vit posib. Mon dir sa Minis akoz i annan bokou pei ki en *social worker* i annan en kantite *power*, menm en pti rapor ki ganny rapporte ouswa kot *Child Protection* zot kapab aksyon i vitman, mon anvi konn sa.

Dezyenmman Minis ou'n sitye ou bann larepons osi lo responsabilite paran e mon osi mon fermeman krwar ladan akoz okenn zanfan anba laz pa merit ganny abize. Lo sa Minis ki zot pe petet mazin fer, akoz mon konnen poudir avan ti annan bann programm avek sa bann paran ki tonm dan sa bann kategori ki ler en *flat* i ganny monte poudir i annan serten konsern deswit zot pe ganny mete lo serten

programm pou anpeste ki keksoz i eskale.

So, eski zot annan lide pou kontinyen sa bann kalite programm dan tou distrik. Mersi.

### **MR SPEAKER**

Mersi Onorab. Minis.

### **MINISTER PATRICIA FRANCOURT**

Mersi Mr Speaker. Mersi Onorab.

Onorab parey kestyon pe dir, eski i annan okenn problem mon poudir ou non napa okenn problem. La nou annan nou *Child Protection from the Police Unit* ki la o bor mwan, kekfwa i ava azoute i ava dir ki mannyer nou travay ansanm e zot prosedir nou dan menm *building Unity House*. So, i pa difisil pou nou *meet* mon konnen nou tim i *meet* souvan e diskit sa bann *cases* ki *emerge* e sa i fer regilyerman e sirtou letan bann *case* ki'n arive ki nou konnen i annan *medium* lo *risk medium risk, high risk* mon konnen ki sa bann *meeting* i fer souvan.

E petet Lenspekteur Labiche kapab koz en pti pe plis ki zot prosedir i ete, nou en partner kle nou akoz nou, nou fer nou bout pou *gather* nou lenformasyon ki nou bezwen. Ler nou'n fer nou bout ki nou gather lenformasyon ou pe *build the case, when you building the case* ou bezwen pas li kot sa lot *partner* ki pe travay avek ou.

*And it's the same with other* ki lasante i osi annan son bout ki nou bezwen *pass it on to actually give it to the Child Protection Police Unit*. Zot *meet* souvan sa mon kapab dir ou, zot *meet* souvan e sa *case review* ki zot pe koz lo la se sa ki zot pe fer.

E mon'n dir dan mon lentrodiksyon sa *Multi-Agency Meeting is there, this is purely all bann lazans konsernen avek child protection*. Sosyal i annan son powers li, son powers i pa *on its own right?* Son powers i vin avek son bann *partners* ki lapolis ki lot i vin avek, so nou tou nou konn nou *remit nou boundaries* ki nou, nou fer ki lot ki bout ki lot i antre an *so on*.

San sa i pou en dezord total, letan pe travay avek bann *cases* ki *sensitive* parey nou dir ki sansib ou bezwen fer sir ki tou keksoz i byen. E *sensitization* mon konnen i fer en kantite avek NCC zot annan bann programm, menm Departman Lafanmir i annan *social worker, social services* osi i annan bann group paran.

Mwan mon konnen dan ledikasyon tou i annan, bann paran ki *vulnerable* i annan bann programm ki ti fer mwan mon ti abitye *run* sa bann kalite programm avan, Onorab ou konnen *right? Way back* ti annan bann programm e mon konnen poudir dan ledikasyon, dan NCC, dan lafanmir i annan bann programm.

Wi, kekfwa nou bezwen ankor bokou plis *but with limited resours* ki nou annan pe prioritize tou keksoz ki nou krwar i en priyorite, petet i pa'n ase me selman i annan akoz sirtou bann paran ki nou konnen i *at risk* i *vulnerable* e *they need the parenting skills, and they need the parenting support* pou zot kapab annan sa bon lizye lo bann zanfan.

Petet Mr Speaker si ou permet mwan mon a zis les Lenspekteur Labiche *from Child Protection Police Unit* zis poudir en pti bout lo son

prosedir mannyer i vin *parallel* avek pou nou. Mersi Mr Speaker.

### **MR SPEAKER**

Mersi. Lenspekte Labiche wi, ou a azoute.

### **INSPECTOR AGNES LABICHE**

Mersi Minis. Mersi Mr Speaker. Mon a dir en bonzour tou bann dimoun ki la. Well, kot *Child Protection* lapolis nou travay *very closely* avek servis sosyal annefe nou an kontak avek kanmarad *mostly* toulezour. Dizon en ka labi in rapport kot nou, vi ki nou travay *joint investigation* ansanm otomatikman nou pou bezwen *pull zot on board* avek nou, e si i rapport kot zot avan zot osi zot bezwen *pull nou on board*.

E la letan sa ka in rapporte nou get bann priyorite si nou santi poudir medikal i bezwen pas avan nou fer nou medikal avan e si nou santi nou bezwen fer anmas nou levidans nou rikord nou *statement* avek sa viktим dan prezans son paran e byensir dan prezans servis sosyal ki la.

E apre nou komans nou lanket, e nou lanket i pa fini la nou, nou pa travay nou tousel zis *Child Protection* lapolis avek servis sosyal nou osi annan AG's *Office* ki nou kle for ki lamazorite ki tou *case* ki nou gannyen nou bezwen al ver zot pou nou annan sa bout prosedir *Court*.

Me selman parey Minis in dir dan tou travay i annan son pti kontrent, nou osi par ler nou ganny en pti pe kontrent sirtou letan nou pou annan bann temwen. An se moman konmela pa tou dimoun ki le *get interfere* avek keksoz zot kanmarad, i en pe vreman difisil menm kantmenm en zanfan in war

en keksoz en labi en keksoz in arive, son paran i pou anpeste i poudir ou i pa oule son zanfan i *get involve*, i pa le son piti al debout dan *box* i bann kontrent ki nou rankontre.

Me selman ki nou fer nou travay ansanm, nou donn nou maksimonm ki nou kapab akoz nou konnen poudir labi i en keksoz ki i pa zoli, i pa gou e nou konnen poudir sa viktим i bezwen bokou sipor.

So, ansanm nou travay ansanm avek servis sosyal e nou osi annan kontak avek ledikasyon nou annan NCC ki travay ek nou, e tou sa bann lazans ki mon dir zot la nou *onboard* avek kanmarad *mostly every day*, en pti pe dan laliny ki mannyer nou travay i marse. Mersi.

### **MR SPEAKER**

Mersi Lenspekte, klarifikasiyon Onorab? Wi.

### **HON EGBERT AGLAE**

Mersi pou sa. Zis Minis an pasan, eski petet *unit* ki nou pe koz lo la, la zot annan ase kapasite resours imen akoz *case* i vin pli bokou pli ale pou kapab zer sityasyon ki nou ladan. Mersi.

### **MR SPEAKER**

Mersi Minis oubyen *panel* bref mwan silvouple.

### **MINISTER PATRICIA FRANCOURT**

Mersi Mr Speaker, ou pe koz *unit* lapolis? Ok, mersi.

Lenspekte Labiche a reponn.

### **MR SPEAKER**

Lenspekte wi.

### **INSPECTOR AGNES LABICHE**

Kot resours imen i konsernen mon poudir ou pou le moman nou annan 11 *staff*, e dan sa 11 *staff* i annan 2 ki kouver Praslin, La Digue. Me selman annan de ler letan sityasyon lo Praslin, La Digue dizon nou'n ganny en *case* ki serye ki en pe entans ki bezwen plis zefor. So, *Child Protection Mahe* i mont Praslin pou al donn en pe sipor. Mersi.

#### **MR SPEAKER**

Mersi nou ava aksepte sa. Onorab Cosgrow ou kestyion.

#### **HON WALLACE COSGROW**

Mersi Mr Speaker. Bonzour Mr Speaker, bonzour Minis avek ou delegasyon. Minis ou'n dir boner ki poudir servis sosyal i travay avek bann diferan partner, lazans. So, eski i annan bann protokol ki servis sosyal i *set* avek sa bann diferan lazans pou kapab *deal* avek bann sityasyon labi zanfan e si wi akoz i kontinyen annan serten bann felir parfwa parmi sa bann lazans e servis sosyal.

E dan ka, mon dezyenm kestyion Minis dan ka kot i annan en serten *failure* dan bann prosedir, dan bann fason ki i sipoze ganny fer dan bann protokol. Eski i annan bann envestigasyon entern dan servis sosyal ouswa dan sa bann lazans partner ki travay avek servis sosyal pou idantifye kote sa problem i ete.

E eski aksyon i ganny pran avek bann dimoun konsernen. Mersi Mr Speaker.

#### **MR SPEAKER**

Mersi Onorab. Minis ou repons.

#### **MINISTER PATRICIA FRANCOURT**

Mersi Mr Speaker, Mersi Onorab.

Mon pou pran sa dernyen bout apre *PS* a elabor lo *the protocols* ki ou pe koz lo la avek bann *boundaries mandate*, e zisteman Onorab i en keksoz ki Departman *Social Affairs* i fer i mon ensiste avek *PS* avek son tim pou nou annan en *internal inquiry* letan i annan en *case*.

I pa bezwen en *case*, mon pe dir *high risk* oubyen sever. *Any cases* ki nou, nou *feel* poudir i annan en *gap we have to step in and look at the gaps*. E nou tou nou *accountable at the end of the day*, nou tou nou bezwen dir poudir wi i annan en *gap* isi i annan en *gap* laba.

E lot keksoz ankor ki nou'n prevwar ki nou pou fer sa lannen nou'n demande letan nou pou vin defann nou Bidze zot pou war nou pe demann en *audit* kot nou Departman Zafer Sosyal pou nou vvar kwa ki pe marse, kwa ki pa pe marse, ki nou annan, ki nou napa.

So, mwan mon krwar vreman for dan transparans, *accountability* e kot mon konnen poudir i annan *gaps* nou ti kapab fer pli mye, mon enn ban premye dimoun pou met lanmen anler poudir ou konnen kwa petet *this is where we should have done better*. E nou *hold* nou *team accountable* e i pa fasil Onorab akoz dizon i arriv en keksoz ki serye, mon annan tou nou *staff* pou *take care off because* ou kapab mazinen letan ou dir be nou ti'n devret fer sa, nou pa'n fer sa ki mannyer i reste avek sa dimoun.

So, nou bezwen la pou zot for pou zot kapab re anmas zot lekor ankor sa kantite *case* ki zot annan pou *deal* avek met sa enn la nou aprann par *what could have been*

*better e move on e al kontiny nou louvraz. So, i annan sa emotional therapy ki nou bezwen ofer, nou bezwen donnen i annan sa bout ki nou bezwen donn sa soutyen, i annan sa bout ki nou bezwen dir you know what? Don't give up, akoz si nou pa soutyen zot pou napa i pa en profesyon ki fasil.*

Dan tou pei ou war poudir dimoun i kapab zis sorti dan sa profesyon zot fek graduate zot vini i *tough but then they just leave* nou pou vvar nou dan en *vicious cycle* nou kontinyen *train*, dimoun i ale. So, i annan en kantite soutyen pou nou donnen me selman mwan mon krwar poudir *we learn from our mistake* si i annan gaps osi *we learn from it and this is how we get better pou move forward*.

Akoz i annan ka ankor pou nou kontiny avek, me selman nou toulstan sagren, toulstan sagren letan in ariv en sityasyon ki son *outcome* pa ti devret arive oubyen i difisil. Mersi Mr Speaker, mon a les PS koz lo sa bout *Boundaries and protocols*. Mersi.

### **MR SPEAKER**

PS wi ou ava azoute.

### **PS LINDA WILLIAM MELANIE**

Mersi Mr Speaker, mersi Onorab pou ou kestyon. Mr Speaker mon oule dir avek Lasamble ki wi i annan en *protocol* ki apel *Working Together Policy*, ki *outline* tou bann diferan aksyon ki sak lazans ki travay avek *Child Protection* i bezwen pran.

E dan *Inter-Agency Meeting*, sa *Inter-Agency Meeting* ki nou koz lo la *case management and case conference* i form parti sa protokol. E

tou lazans ler nou koz lo en *care plan* pou en zanfan ki dekoul ankor dan sa protokol, se i *outline* tou bann servis, sipor, aksyon ki *partner* ki pe travay avek servis sosyal i annan pou li fer e ki enkli paran.

Annou pa blye poudir dan okenn sirkonstans kot i annan en labi lo en zanfan ki'n ariv swa dan lakour, swa petet en lot landrwa paran i primordyal e dan sa *care plan* ki nou pe koz lo la ki anba sa protokol paran i annan en bout responsabilite ki in ganny donnen lo ki nou pe ekspekte, ki mannyer i zer sityasyon dan son lakour or sityasyon otour sa zanfan.

Dezyenmman nou annan Minister Ledikasyon atraver lekol, nou an kontak avek nou *school counsellor* avek *unit* ki responsab par Mrs Hermite kot i annan ka pou bann zanfan kot lekol i bezwen zet en koudey, kot *school counsellor* i bezwen donn en sipor tousala i ganny etablir dan sa *care plan*.

Si zanfan i bezwen ganny refer avek NCC pou donn serten sipor psikolozik tousala i ganny mete dan sa *care plan*. E bout ki lapolis i annan pou li fer, lapolis osi i pran son bout. Si i annan desizyon ki ganny pran par lapolis letan zot pe fer zot envestigasyon, sa i desizyon kolektiv dan lapolis e apre zot enform servis sosyal.

E rol travayer sosyal se kontinyen fer swivi parey nou eksplike oparavan pou zwenn avek sa fanmir, zwenn avek sa zanfan pou kapab konpran ki pe arive. Me mon osi anvi dir ki i annan en dinamiz dan lakour kot en zanfan i ete. En travayer sosyal i pa kapab la tou

letan dan lakour en fanmir, i pa kapab tou letan la dan lavi en zanfan.

Me par kont parey Minis in dir kot ler nou fer *debriefing* bann *supervisor* i fer *debriefing* avek zot *staff* letan i pe fer *case conference*, pe gete kwa ki'n arive bann mankman byensir si i annan bann pti defayans ki petet travayer pa'n pran en pti pe port plis latansyon lo la sa i ganny diskite e nou rod fason ki mannyer pou redres sa bann keksoz.

Eski aksyon i ganny pran? Mon pa konnen si Onorab pe demann aksyon disipliner, non, nou pa pe pran aksyon disipliner me nou rod fason ki mannyer nou kapab ankadre sa *staff* pou donn li sa sipor pou li kapab kontinyen, akoz i bezwen kapab kontinyen travay avek sa *case*.

So, nou bezwen nou dan en fason toulstan pe rod fason ki mannyer nou amelyore e se sa ki enportan ler nou fer bann *debriefing session* avek nou *staff* otour bann *case* kot si nou santi i annan keksoz ki pa pe byen marse. Mersi Mr Speaker.

### **MR SPEAKER**

Mersi PS. Onorab Rosie Bistoquet ou kestyon.

### **HON ROSIE BISTOQUET**

Mersi Mr Speaker, bonzour Minis avek ou delegasyon. Bonzour tou bann Onorab.

Minis eski ou kapab dir avek sa Lasanble ki kolaborasyon ki servis sosyal sirtou proteksyon zanfan i annan avek lezot lazans parey *Family Tribunal* avek NCC.

Apre mon lot kestyon, Eski servis sosyal sirtou *Child Protection*

*Unit* i annan okenn se dan desizyon final ki *Family Tribunal* in fer ouswa apre bann *follow up*, ki kot i konsern *custody* bann zanfan sirtou zanfan spesyalman si sa desizyon i pa dan lavantaz sa zanfan kot sa lakour kot sa zanfan in ganny *custody* i annan labi sibstans. Mersi.

### **MR SPEAKER**

Mersi Onorab, Minis.

### **MINISTER PATRICIA FRANCOURT**

Mersi Mr Speaker. Mon a demann PS pou reponn. Mersi.

### **MR SPEAKER**

*Thank you. PS.*

### **PS LINDA WILLIAM MELANIE**

Mersi Mr Speaker, mersi Onorab pou ou kestyon.

Onorab nou'n mansyonnen pou dir i annan en kolaborasyon etrwat avek NCC kot i konsern bann *case* labi zanfan, akoz nou annan en reprezantan NCC ki asiz lo sa *Inter-Agency Committee, ok.*

Parey si nou bezwen sipor NCC pou donn parey mon pe dir terapi oubyen bann led sikolozik en zanfan nou refer avek NCC.

Me kot i konsern tribunal lafanmir si pandan ki i annan en rapor nou pa tro tir en *investigation* par egzanp kot tribunal letan nou, nou antre se ler tribunal pou demann en rapor viz a vis *custody, access maintenance* pou en zanfan e si servis sosyal sa travayer ki atraver son lenvestigasyon *or* nou annan lenformasyon ki i annan en rapor ki'n ganny fer kont swa enn *or* lot sa paran i nou devwar pou nou enform tribunal lafanmir dan nou rapor e osi

rekomande kekfwa ki kontak avek sa paran i limite.

ki pou fer sir swa i anba *supervised access* swa i pa pe ganny *custody* sa zanfan.

E vwala kalite kolaborasyon ki nou annan avek, avek Tribunal Lafanmir i senpleman pou sa. E apre lot keksoz ki nou kapab fer a ki nou travay etrwat avek tribunal lafanmir, Onorab taler in dir servis sosyal i annan en kantite pouvwar, nou napa pouvwar anplis me nou annan serten pouvwar anba *Children's Act*, pou ler nou santi en zanfan i bezwen ganny retire avek en paran apre nou'n fer sa *assessment* bann risk, servis sosyal i kapab fer li avek serten konsantman.

Me dan en dele letan i bezwen al devan tribunal pou al rod sa lord legal pou met sa zanfan dan *custody*, swa anba *care* Direkter Servis Sosyal e apre sa i plas li avek en lot dimoun. So, vwala en pti pe bann kolaborasyon ki nou annan avek tribunal lafanmir. mersi Mr Speaker.

### **MR SPEAKER**

Mersi PS. Onorab Waven William ou kestyon.

### **HON WAVEN WILLIAM**

Mersi Mr Speaker. Bonzour tou dimoun ki a lekout, bonzour Minis avek ou lekip.

Minis mon'n ekout ou avek bokou latansyon, e letan ou pe refer avek distrik Grand Anse Mahe nou annan en bon pe problem sosyal. E mwan mon anvi demann ou e envit ou personnelman akoz mwan mon enterese pou ekout en pti pe ki bann diskisyon ki pase lo sa *Inter-Agency Meeting*.

So, Minis mon pe demann *very soon* silvouple pou Grand Anse Mahe vin en kou parey Prezidan pe fer *meeting* piblik, nou a ganny en koze serye pou nou kapab vvar egzakteman akoz mon anvi partisip dan donn solisyon. Mersi bokou.

### **MR SPEAKER**

Mersi Onorab. Napa en kestyon, alor nou a kontinyen. Ah, Minis ou anvi reazir lo la? Silvouple wi, si ou kapab vitman.

### **MINSITER PATRICIA FRANCOURT**

Mersi Mr Speaker. *Very briefly* Onorab mersi mon tann ou, dan bann *Multi-Agency Meeting* i *professional meeting, right?* So, this one i zis bann profesyonnel ki attend.

En keksoz ki petet mon ava ankouraze Onorab, mon rapel dernyen fwa mon ti dan Lasanble Onorab Naidu ti pe koz lo difikilte petet pou konpran nou *process* ki mannyer i marse, e nou ti envit li nou laport i ouver nou, nou ti envit *MNA* nou ti dir li vini. Ti pran en bon pe letan pou konpran ki mannyer tou keksoz i marse.

Petet nou a fer sa lapel avek tou bann *MNAs* ki le konn pli byen ki mannyer sa departman i fonksyonnen i marse, *this is the time* akoz nou pa kapab diskit *special Specific cases*, nou pa kapab diskit sa. nou annan en lobligasyon pou protez zanfan avek lafanmir, me selman konpran prosedir ki mannyer i marse e mon konnen poudir sa zour Onorab Naidu ti byen apresye lenformasyon ki nou ti *share* e *strengthens* nou *relationship as a partner*. Mersi.

**MR SPEAKER**

Mersi Minis. onorab Georges Romain ou kestyon.

**HON GEORGES ROMAIN**

Mersi Mr Speaker. Bonzour Minis avek ou *panel*.

Minis mon osi mon pou tous en pti pe dan menm laliny parey Onorab Monthy in fer resorti, parey ou'n fer resorti ki labi zanfan i konsern tou dimoun dan lakominote mon 100poursan dakor avek ou.

Me par kont yer enn mon zabitant in dir mwan ki i ti rapport en ka kot i ti vwar en zanfan pe viv dan en fason vreman anti sosyal avek sosyal, me larepons ki i ti gannyen ti dir ki fodre son manm fanmir ki *call*. Alors Minis mon ti a kontan konn ou pwennvi lo sa size sa ti yer, si ou ti pou bezwen lenformasyon apre mon a kapab donn ou sa bann lenformasyon.

Mon dezyenm kestyon Minis i ou'n fer resorti pli boner dan ou lantervansyon ki zanfan par ler zot pa oule koze ler zot pe ganny abize, mon kapab konpran sa akoz zot per. Me dan sa bann ka Minis ki ou Minister pe fer ki kapab fer oubyen pou kapab protez sa bann zanfan avan ki i tro tar.

Parey nou konnen in deza ariv dan en sityasyon nou dir si nou ti konnen, mon ti a kontan konn ou pwennvi ankor Minis. Mersi Mr Speaker.

**MR SPEAKER**

Mersi Onorab. Minis.

**MINISTER PATRICIA FRANCOURT**

Mersi Mr Speaker. Onorab sa enn premye mon a reponn *very briefly*, okenn dimoun i kapab call letan i

rekonnet poudir i annan bann sir labi, si fizik, si sexual, si emosyonnel menm i pa bezwen in arive. Si zot war bann sir ki petet sa i kapab koz en danze, nou limero i 116 i *free of charge*. Menm ou kapab vin akoz nou annan *on call social workers* kot *Unity House please come in*.

Again, mon dir 116 e parey mon dir i annan en logmantasyon bann adilt ki pe *call please anybody can call*, pa les arive apre pou *call* prevansyon i enportan, si ou war okenn sir *please call* e ou kapab donn mwan sa lenformasyon apre. Mersi.

Mr Speaker Ms Marie-Agnes Ally pou pran dezyenm bout. Mersi.

**MR SPEAKER**

Yes, Mrs Ally.

**PRINCIPAL SOCIAL WORKER  
MARIE-AGNES ALLY**

Mersi Mr Speaker, mersi Onorab pou ou kestyon.

Kot i konsern zanfan parey ou'n dir ki pa oule koze pou eksprim sa ki'n arive avek li e i vreman difisil dan bann ka parey, akoz menm si nou koman travayer sosyal oubyen menm lapolis nou pou santi baze lo bann sir poudir i annan en keksoz ki pe arive avek sa zanfan.

Me selman se li ki annan sa difikilte pou eksprim son lekor, i fer nou louvraz vin bokou pli difisil dan bann ka koumsa. Me selman ki nou fer, nou annan sa preparasyon servis sosyal kot nou kapab servi led terapi atraver psikolog pou ed sa zanfan *open up* lo sa size ki'n ariv li.

E an menm tan petet i annan sa fanmir ideal ki kapab ed li osi kot nou kapab, si nou bezwen fer sertern

mouvman tir li dan en fanmir nou fer bann prosedir neseser kot li i kapab santi li en pti pe pli an sekirite e dousman, dousman pare pou koz lo sa ki'n arriv li. Mersi.

### **MR SPEAKER**

Mersi. kestyon Onorab Herminie.

### **HON WILBERT HERMINIE**

Bonjour Mr Speaker, Bonjour Minis avek ou delegasyon.

Pou nou pli byen konpran enormite sa travay ki ou Minister avek Departman Lapolis pe fer fas avek lo en size nasyonal ki konsern nou tou. Eski Minis ou kapab *provide* nou avek en pe statistik par egzant konbyen ka ki zot in rikorde e konbyen ka ki zot ankor pe travay lo la. Mersi Mr Speaker.

### **MR SPEAKER**

Wi, mersi Onorab. Minis.

### **MINISTER PATRICIA FRANCOURT**

Mersi Mr Speaker, mersi Onorab.

Onorab nou annan tou bann statistik nou ava *provide* tou sa bann *statistic* akoz i pa ti dan kestyon ozordi pou nou donn sa bann *statistic, but we can provide it.* Mersi.

### **MR SPEAKER**

Mersi. Onorab Loze, ou kestyon.

### **HON JOHAN LOZE**

Mersi Mr Speaker. Minis enn bann *chiffre* ki ganny koz lo la bokou konmela se ki 10poursan nou popilasyon i dan drog. E letan APDAR ti fer son *survey* en gran poursantaz those surveyed zot ti relye zot adiksyon avek *trauma*, sirtou *childhood trauma*.

Mon pou dir ou en keksoz ozordi, en *extravayer servis sosyal* en zour ti dir mwan en parol. I dir mwan koumsa “*it's the wrong people having children Sesel.*” Prezan mon demann li,” Akoz?” I dir mwan, “En bon pe koup, sirtou bann zenn koup *they are drawn together through shared trauma.*”

I dir mwan, Sosyal zot pa'n zanmen konpran *how these people find each other*, me selman toulstan zot remarke en kantite fwa bann koup ki ansanm tou lede fir, garson zot annan en listwar kot zot in ganny abize par lepase.”

Minis be ou lapel pou kominate, pou paran be i paret ki dan nou sosyete en kantite fanmir i annan serten keksoz in ganny normalize serten konportman in vin bann keksoz zenerasyonnel, labi zenerasyonnel ki ganny kasyet i ganny toufe anba gro pannyen dan fanmir.

So, rezon mon pe dir ou sa Minis se ki ou pa pou ekspekte *whether* sa manman ouswa sa papa, akoz bann manman osi i fer labi e papa i kasyet. Akoz pou zot dan zot norm sa i normal, e menm sa granmanman dan sa lakaz li osi i pou kasyet i pou kasyet i pou toufe anba gro pannyen li akoz pou li osi i normal.

Be prezan mon konnen i en keksoz en posib, eski i posib pou zot staff idantifye pa dan zanfan *sign of trauma* dan paran. Dan paran ki petet a donn zot en *added level of alert* ki la sa enn la i danzere la, la i annan danze *the parent herself or himself* i pe *show sign of catastrophe, trauma* ki nou bezwen bouze la pou sa zanfan.

Akoz si paran e kominote i enn ou partner, fanmir i enn ou partner me fanmir li menm ou a krwar en bonm in pet o bor li la i pa pou ed ou li. Apre Minis ...

*(Interruption)*

**MR SPEAKER**

Ok Onorab ou pe fer en long ladres.

**HON JOHAN LOZE**

Eski wi, mon zis annan en pti kestyon. Eski Minis ou ti annan okenn keksoz ki ou ti a kontan demann Lasanble an term sipor Bidze ouswa lamannman Lalwa pou lefitir swa isi ozordi oubyen an ekrir ou ti kapab anvoy lofis Speaker. Mersi Mr Speaker.

**MR SPEAKER**

Mersi Onorab. Minis petet nou ti kapab pas lo premye parti, mon asire ou'n note bann komanter Onorab ki mon byen apresye. Me son dezyenm kestyon i spesifik, eski ou anvi demann Lasanble okenn sipor?

**MINISTER PATRICIA FRANCOURT**

Mersi Mr Speaker, mersi Onorab.

Onorab *very briefly*, tou sa ki ou'n dir la i *step way back*. Pou labi arive i annan en patern ki'n bezwen an egzistans e si sa bann patern parey nou konnen i pa ganny kase, *then it is annan bann chances ki i repeated in people*.

Departman Sosyal e mon konnen tou bann leres lazans i fer sa vreman byen ki si nou rekonnet, zot in ganny *train* zot pou rekonnet bann sir ki nou war. So, i annan en sistenm *referrals* kot i ganny refer avek bann apropriye *agencies*.

Akoz tou dimoun i bezwen konn son *boundaries* ki sipoze fer in *terms of* si i en psikolog, i pa en psikolog, i pa en psikolog *and so on*. So, therefore tou sa ki ou'n dir la i annan en lefe lo *repeated cases of abuse*.

E therefore, *physiologically* i bezwen annan en *assessment* lo fanmir lo endividé *and so on, you right*. So, sa, sa nou konnen mon konnen poudir letan nou pe vin dan Lasanble pou nou Bidze mon *wish* ki zot ava siport nou avek nou bann demann e konpran en pti pe nou bann kontrent ki nou annan osi.

E mon ti a kontan zot sipor in *terms of* korperasyon, kolaborasyon avek nou bann ki annan distrik. Kit sa langazman, kit sa *open dialog* akoz i enportan zot osi zot dan distrik zot annan zorey zot tande pa les naryen pase.

Me selman mon ti a kontan zot sipor letan nou vin *for the budget, please support us* e toultan nou a pe fer bann *request* avek nou bann *partners* lokal, enternasyonal pou nou ganny plis. Semenn pase nou'n ganny *British High Commission* ki'n provide *trainings*, lo kote *trainings* akoz sa ki nou kapab fer nou fer, kot nou pa kapab nou tap laport.

Me selman mon apresye ou konsern. Mersi.

**MR SPEAKER**

Mersi Minis. Parey mon'n dir mon regrete mon bezwen repas lo loter kestyon prezan. Onorab Pillay ou siplemanter.

**HON SEBASTIEN PILLAY**

Mersi Mr Speaker e mersi tou bann Manm ki'n demann kestyon lo sa size

tre enportan, e mon krwar tou kestyon a laliny pou nou sey konpran sa sityasyon e regard dan bann problem ki'n ganny souleve.

Mon kestyon ti komans par demann ou si ou pe rankontre okenn problem, e atraver bann larepons ki'n ganny donnen bann kestyon ki'n ganny demande mon'n kapab idantifye serten ki mon pou apel bann problem.

Premye problem i en mankman resours.

Dezyenm problem i en si oule sa sinerzi ki egziste ant ban diferan lazans.

Trwazyenm problem i konsern *whether* piblik i vin on *board* pou donn lenformasyon oubyen pou partisip aktivman dan bann ka, dan bann ka kot i annan labi.

Prenon kont ki sa i bann *areas* ki nou'n idantifye ozordi bomaten, eski nou kapab premyerman ganny ou langazman ki zot pou fer serten travay pou prezant avek nou kwa ki zot bezwen fer pou kapab adres serten defayans ki egziste dan sa bann *areas* ki la.

Mon pa kapab pretann pou koz lo servis sosyal oubyen pou al dan okenn konponan teknik servis sosyal, akoz mon pa en eksper dan sa domenn.

Mon dezyenm kestyon i konsern sa sityasyon l'investigasyon entern mon le sitye byen sa kestyon, akoz mon ti a kontan nou ganny li kler ki sa kestyon napa naryen pou fer avek al *investigate* en travayer. Me plito *investigate* prosedir ki'n ganny servi *weather* prosedir in *respond* too sa ka spesifik.

I ti annan en ka ki'n arive dan lepase kot ti bezwen annan en

*Commission of Inquiry*, kan en garson ti ganny trouve mor on krwar nou tou nou ava rapel bann ki ti dan 6eme Lasanble.

I pou annan ankor bann ka ki pou vini e *God forbid* i pa kout lavi okenn manrmay, me i kapab annan ankor bann ka. Eski ou annan an plas en mekanizm entern ouswa ki vin ki a kote ou prosedir normal pou regarde kan i annan en ka soupson, oubyen en ka ki'n prouve kot in rezourd in arriv ki en zanfan in perdi son lavi oubyen in ganny en dimal serye.

Eski ou annan en sistèm eksternen ki kapab regard ou prosedir akoz nou pa kapab esper sa *audit* ganny fer. Ou annan plizer ka so eski ou annan en sistèm ki ou kapab met an plas pou regarde si i annan sa bann sityasyon ki pe pase pou asire ki si par egzanp en dokter in fer en rapor dan en ka, sa rapor in ganny akte lo la en keksoz in ganny fer avek sa.

Mon pou fini avek en trwazyenm kestyon Mr Speaker, mon war ou pe regard mwan me sa size, i en size enportan mon ti a kontan premyerman enplor Minis e tou Minis ki vin devan Lasanble. menm si kestyon pa koz lo statistik, nou pou bezwen vin prepare pou nou kapab donn serten lenformasyon pou eksplik natir sa problem.

Mon prezimen i annan en bon pe ka ki zot pe *deal* avek e bann ka i varye. E enn bann pwen ki'n ganny souleve par 2 kestyon;

1 en Onorab in demann pou vin dan distrik.

E lot in koz lo en dimoun dan son distrik.

Seki manm piblik menm i *reluctant* pou vin ver Departman Servis Sosyal dan serten ka kot zot konnen i annan sa labi pe arive. I annan ki vini ki zot annan soupson me i annan ki konnen me zot *reluctant*.

Ki zot pe fer pou sey adres sa mank konfidans pou dimoun kapab vin devan e koz lo sa bann ka labi, e ganny resevwar pou zot kapab inisyé bann lenvestigasyon dan bann ka kot i kapab annan labi ki pe arive.

Mon konnen i pa en keksoz fasil me i en keksoz ki nou bezwen rod en fason pou nou eksploré. An terminan Mr Speaker mon ti a kontan dir ek Minis ki mon osi mon oule lans en lapel, ki dan nou sosyete nou tou nou annan en responsabilite. E nou pa kapab esper en travayer servis sosyal pou vin dir pou dir ki en zanfan pe ganny abize.

Si ou war li ou osi ou bezwen pran ou responsabilite, e si ou bezwen met sa ka devan, ou met li devan. Me pa esper sa ka fini arive en sityasyon i devlope apre pou ou dir mon ti konnen, mon ti anvi dir mon pa'n dir. Mon ti anvi dir pa pou anmenn, pa pou anmenn okenn rezulta.

So, i enportan ki nou tou nou pran nou responsabilite e mon lans en lapel avek nou kominate pou parfwa annou aret ipokrit e nou tou annou pran nou responsabilite. Mersi Mr Speaker.

### **MR SPEAKER**

Mersi, Minis ou ava adres bann kestyón silvoupe.

### **MINISTER PATRICIA FRANCOURT**

Mersi Mr Speaker. Mersi Onorab pou ou komanter avek ou kestyón.

Onorab premye pwen ki ou'n dir *lack of resources* zanmen pou ase, zanmen pou ase pa zis Sesel me dan lemonn antye i toultan mank *lack of resources*. So, sa i en keksoz ki nou travay for lo la e nou sey sa ki nou annan nou sey travay avek nou mye ki nou kapab.

En keksoz ki nou war ki nou annan bann zenn *social workers* ki sorti *NIHSS*, nou bezwen donn zot *exposure* pou vin lo sa bann *cases* pou zot kapab ganny leksperyans. So, partou zanmen i pou ase me selman nou travay avek sa ki nou kapab.

Sinerzi avek bann lazans mon pa pou agree avek ou ki napa, me selman i annan i annan en bon sinerzi parey mon dir ou sa bann diferan fason ki nou *meet*. *Multi agencies, case conferences meeting*, me petet i annan bann *gaps*. E si i annan *gaps we need to strengthen it and we need to look at kisia ki nou kapab fer pli byen*.

Mon pa dir ou i parfe, me selman i kapab annan bann *gaps*. En rapor mon krwar i en pti pe pli *complex's* ki sa i pa *straight forward and this is one of the reasons* ki mon'n nonmen nou pe fer *internal inquiry*. Nou annan en *mechanism* pou fer nou *internal inquiry*, e mwan mon demande ki nou fer *internal inquiry* egzakteman regarde *where could we have done better, pa wrong but where could we have done better* pou fer sir ki i pa repete.

E koumsa ki nou aprann nou tou, nou aprann par keksoz ki ti devret fer dan en fason me ki nou kapab fer pli byen pou *strengthen it*. E pou *external* pou nou louvraz *even better* sanmenm sa ki mon'n nonm

nou annan en *audit*, e nou *audit* pou *tally* avek nou bann standar.

So, nou bann standar *this would be nou practice, right?* So, nou *practice in terms of nou prosedir nou menm regilasyon and so on and so on. But that will be external partner coming in to do the audit.*

Trwazyenm pwen *the public are reluctant* pou zot vin devan, nou pe sey nou mye e se sa par egzanp ki sa limero 116 i en loportinite ki ou komans sa konversasyon e letan dimoun i *call* i *free* sa limero, ler dimoun i *call anonymous* osi ou kapab dir nou ki pe arive ou pa bezwen donn ou non.

Ou kapab dir pou dir mon tel dimoun e mon konsernen avek sa, sa, sa *you give us a lead*, ler ou donn nou en *lead* nou kapab *take* sa *forward*. Mwan mon dir ou poudir tou bann ka ki vin dan nou latansyon *akoz it's logged*, mon demann en *breakdown* letan nou *meet management meeting the breakdown of the calls*, lekel ki ti fer *call?* ki ler nou pe ganny sa bann *call?* nou annan *complete breakdown in term of statistics* pou nou war *the trend*.

Dan en lot fason ankor ki dimoun i kapab *forward* mwan mon ganny bokou let, *PS* i ganny bokou let kot son Sekretarya bann let i vini i annan dimoun i met zot non, i annan dimoun pa met zot non e sa i *ok*, en let anonim i vini nou *investigate* nou regarde.

*Each letter that comes we have to look at it*, letan nou ganny sans fer *public meetings* la par egzanp nou ti fek annan sa *sensitization* ki nou pe fer dan distrik dan tou rezyon zot ti demann mwan dernyen fwa ki mon vini, vin dan rezyon.

Ler nou vin dan *sensitization* ki Lanplwa i fer i annan *ASP* prezanz, i annan sosyal prezanz. Mon ti annan Onorab Labonte semenn pase ou ti prezanz letan nou ti annan nou *sensitization fair* kot ou ti war, ou ti pe koz avek *ASP*, ou ti pe koz avek sosyal *this is akoz i public sa this is where people can come another louvertir* pou vini demann kestyon e konpran nou prosedir me osi donn nou lenformasyon dan en fason diskre nou ganny lenformasyon.

So, nou pe sey nou mye *but the public must take responsibility*. Mersi.

#### **MR SPEAKER**

Mersi. Onorab nou *overtime* silvouple, ou kapab fer en dernyen pwen vitman bref.

#### **HON SEBASTIEN PILLAY**

Mersi Mr Speaker. Mon pou fer en dernyen pwen vitman bref.

Minis anliny avek pou nou fer nou louvraz *oversight*, eski ou pou pare pou donn mwan en lasirans *as to when* ki sa *external audit* pou ganny fer? E lekel ki pou fer sa *external audit?* Mersi Mr Speaker.

#### **MR SPEAKER**

Mersi, Minis si ou kapab dan en fraz ou 2.

#### **MINISTER PATRICIA FRANCOURT**

Dan 2 fraz, nou met dan nou *budget* Onorab pou nou ganny en konsiltan pou fer sa. mersi.

#### **MR SPEAKER**

Mersi Minis. Mon remersye ou ek ou *panel* pou zot partisipasyon lo sa kestyon e mon swet zot bon kouraz

dan kontinyasyon zot travay tre enportan. Mon ava envit zot fer zot depar, *bonne journée*. An menm tan madanm rapporter ou ava apel Minis pou bann kestyon seri kestyon.

Bonzour Minis pou ledikasyon Dokter Justin Valentin e avek li Mrs Merna *Eulentin* son *Principal Secretary* pou *Education Services*, e Mr John Lesperance son *PS* pou *Education Sector Development*. Mersi pou vin kot nou pou reponn kestyon bann Manm.

Manm a remarke mon annan 8 kestyon lo *Order Paper* an plis nou'n azout en Kestyon *Without Notice*. So, mon pou bezwen vey letan tre strik. Nou pou annan aepre 15 minit par kestyon makkisonm. Premye kestyon nou a komans avek kestyon Onorab Rocky Uranie, kestyon limero 43.

### **HON ROCKY URANIE**

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou koleg Onorab e byensir en bonzour spesyal pou tou zabitant Zil Pros. Minis mon premye kestyon;:-

Eski Minis i kapab konfirm ek nou Lasanble, konbyen etidyan ki'n fini zot letid pos-segondier lannen 2022 e ki'n kalifye pour en labours liniversite?

Mon dezyenm;:-

Konbyen i espekte kout Gouvernman zis pou sa group etidyan? Mersi.

### **MR SPEAKER**

Mersi Onorab. Minis ou repons.

### **MINISTER JUSTIN VALENTIN**

Mersi Mr Speaker. Bonzour Mr Speaker. Bonzour *Leader Zafer Gouvernman*. Bonzour *Leader Lopozisyon*. E bonzour tou bann Manm Onorab e bonzour tou bann dimoun ki a lekout.

Mr Speaker i touzour en plezir pou Minister Ledikasyon vin dan Lasanble pour reponn bann kestyon, akoz ledikasyon i en keksoz ki tou dimoun i konsernen avek. E nou, nou kontan ler sa i arive. E mon ava remersi bann Onorab ki'n anvoy kestyon e mon a komans par reponn sa premye kestyon.

Pour lannen 2022, en total 184 etidyan ti kalifye pou en labours iniversiter. Dan sa 184, 109 in kalifye pou en labours aletranze e 75 in kalifye pou en labours lokal avek Liniversite Sesel ouswa avek Lenstiti Guy Morel.

Nou osi annan 35 etidyan, bann meyer 5, sorti dan bann differan sant profesyonnel apard SALS ek SBSA ki kalifye pou en labours iniversiter. An total sa i fer 219 etidyan. I merit ganny note ki bann etidyan pli kalifye koman meyer 5 dan sa bann sant profesyonnel, i selman kapab fer zot laplikasyon apre ki zot in fer zot *graduation*.

Dan sa 109 etidyan ki'n kalifye pou en labours aletranze, i annan 96 etidyan ki'n fer laplikasyon avek seksyon labours pou ganny en labours Gouvernman. Pour sa 75 ki'n kalifye pou en labours lokal ziska preznan, 54 ki'n fini fer zot laplikasyon.

E an se ki konsernan kou Gouvernman pour sa bann etidyan, pour le moman nou pa pou kapab donn en larepons konkret lo konbyen i pou kout en Gouvernman, akoz

bann etidyan ki ankor pe fer zot bann prosedir laplikasyon avek liniversite.

Bann etidyan i swazir liniversite baze lo zot filyer letid ki zot anvi aprann, e apre bann diferan veni, ki bann diferan landrwa, diferan lenstitisyon ki Gouvernman i aprouve e konseye. E sa osi i baze lo la kantite pwen akademik ki zot annan.

E sak liniversite i annan son pri *tuition* e sak pei i annan son prosedir *visa* e lezot peyman ki bezwen ganny fer. Par egzanp lasistans, lasante e baze lo pei ki en etidyan in swazir e si i annan bann *stipend*. Tou sa i bezwen fini ganny etablier avan kalkilasyon total i ganny determinen pou sa 3an letid ou plis.

Sa prosedir i ganny fer pou sak etidyan, akoz sakenn i annan son bann pri diferan. Nou pa kapab donn Lasanble en larepons sa kestyon la a ler aktyel akoz lafen lannen nou pou dan en bon pozisyon. E parey mon'n dir akoz sa prosedir i ankor pe ganny fer pou etidyan ki'n fini zot letid 2022. Mersi Mr Speaker.

### **MR SPEAKER**

Mersi Minis. Onorab ou siplemanter.

### **HON ROCKY URANIE**

Mersi Mr Speaker. Mersi Minis pou ou larepons. Minis vi ki ou'n dir ou pa kapab donn nou en desizyon final konbyen pou koute, ou bezwen fer li *case by case* pou sak etidyan;-

Eski i vedir ki bann etidyan ki kalifye lokal 12 a 17 pwen la sak paran pou ganny gete dapre zot merit ki zot kapab siport zot zanfan *partially*, oubyen Gouvernman ki pou *take up* zot pri total lo li menm? Mersi.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mr Speaker tou zanfan ki etidye isi Sesel zot kou total i ganny antreprann par Gouvernman. Mersi.

### **MR SPEAKER**

Mersi Minis. Nou a pran lezot siplemanter bann Manm. Onorab Pillay.

### **HON SEBASTIEN PILLAY**

Mersi Mr Speaker. Mr Speaker mon oule return lo sa pwen ki Minister Ledikasyon pa ankor etablier en kou;

Eski Minis i pa krwar poudir si ou pa ankor etablier en kou, i pou arriv en lenstans kot finalman i pou vin en sistèm *first come first served*?

Kot ler mwan mon'n fini mon bann prosedir mon vini mon annan larzan pou peye e ler en lot i vini larzan in riske fini depandan lo bann lenstitisyon ki bann etidyan pe ale - parey ou'n dir - sak landrwa son bann *tuition level* i diferan.

So akoz ki Minister pa kapab dir nou ozordi si zot annan en maksimonm *allotment*? Akoz mon pe get zot Bidze la, zot annan en maksimonm *allotment* - akoz mon pe get zot Bidze la - zot annan en maksimonm allotment ki zot in mete pou kouver fre bann etidyan ki'n kalifye pou *scholarship* an 2022.

Dezyenmman Mr Speaker an relasyon avek bann etidyan *SITE* ki dan en lenstitisyon *training*, zot in sipoze *graduate* depi Zilyet lannen pase. Ziska la mon ganny en mesaz la Mr Speaker, ki dir poudir zot pa ankor ganny okenn kontak depi

Zilyet lannen pase. Mon ava lir avek ou:-

Sipoze in *anvoy confirmation list* pou *process e in return* zot in dir zot pa ankor *receive okenn email confirmation from the Ministry of Education*. E sa depi Zilyet lannen pase. Lefe ki zot annan en mankman *teachers* e nou pe koz bann etidyan SITE ki'n kalifye e mon krwar Minis ou senpatiz avek sa.

So eksplik nou egzakteman, eski i annan en problem oubyen eski zot pe fer en keksoz pou rezourd sa sityasyon Mr Speaker? Akoz i annan konsern ki petet Minister Ledikasyon pa pe *attend to* serten keksoz ler i arive.

Par egzamp Minis an pasan mon pou dir ou, ou ti vizit lekol English River, bann *teachers* lakres i dir ou pa'n zanmen vizit lakres English River. Ou konnen mon pa pe dir ou pa'n vizit okenn fason mal, me i annan konsern ki i an bann keksoz ki pa pe arive pou adres bann problem ki pe arive. Mersi Mr Speaker.

### **MR SPEAKER**

Mersi Onorab. Minis repons *please*.

### **MINISTER JUSTIN VALENTIN**

Mersi Mr Speaker. Mr Speaker sa prosedir *scholarship* pe ganny fer pou en pe letan e eski i annan larzan ki'n- i annan sa zafer ki nou pe dir *first come first serve* i annan ki ganny drwa pa ganny ankadre akoz larzan i riske fini? Non, sa pa zanmen leka.

Nou annan en valer ki nou pe travay avek baze lo sa ki pase lo bann lannen presedans. Par egzamp lannen pase in annan lannen avan, ti annan environ R174milyon ki ti en

sonm ki ti ganny mete pou sa bann etidyan premye lannen an tou.

E Mr Speaker, Gouvernman in met a lokasyon en sonm R205milyon pou sa prosedir, e nou zer sa larzan byen. E bann etidyan, bann *desk officers* ← i konn egzakteman ki bann *average cost* bann diferan pei. E nou konnen kantite etidyan nou pou pran pou pa depas sa sonm petet ki'n ganny *allocate*.

Donk ozordi la lefe ki i annan differan etidyan ki ankor pe swazir nou pa pou kapab dir zot egzakteman ki pe arive. Me sa ki nou kapab reasir tou bann etidyan la bomaten se tou bann etidyan ki'n kalifye pou en letid, en letid avanse liniversite 2022 e ki dan sa prosedir pe fer, pou annan larzan pou zot al etidye.

Sa i lasirans ki mon pe donn tou bann etidyan. Pa bezwen panik ozordi pou tay isi, tay laba. Fer zot bann prosedir parey bann *desk officers* pe koz ek zot, fer li byen, swazir zot bann- fer zot swa byen, zot pou ganny siporte pou zot al etidye, parey zot in ganny prevwar.

An se ki konsern SITE Mr Speaker, Minister Ledikasyon i an kontak ek bann etidyan, i an kontak ek bann etidyan. Donk mon pa krwar akoz ki bann etidyan pe dir zot pa ganny an kontak.

E la ozordi ankor mon pe fer sa lapel ek okenn etidyan SITE ki'n fini son program e in ganny dir i pe al *study overseas*, i pa ankor ganny sa kontak la mon pe fer sa lapel pou li vin kontakte mwan, mon a gete ki mannyer e akoz ki i pa'n ganny kontakte. Mersi Mr Speaker.

### **MR SPEAKER**

Mersi. Onorab si ou annan klarifikasyon annou pa al lo lot kestyon, nou'n ganny 3 kestyon deza.

**HON SEBASTIEN PILLAY**

Non, Mr Speaker. Klarifikasyon i *straight to the point*. Premye klarifikasyon i an relasyon avek sa ki ou'n dir lo sa Bidze, mon'n note e mon'n rikorde ki ou'n donn nou lasirans i tou bann etidyan ki'n kalifye pou *scholarship* pou annan larzan pou zot.

Kestyon lo la i se ki prenon kont ki i annan sa- i annan sa sityasyon ki'n ganny kree pou sa *student loan*, e *given* ki dan bokou pei ler mon pe get resers in prouve osi ki *student loan* i en problemm ki anmar lipye bann zenn pli tar.

Eski ou pe osi dir nou ki anba sa planifikasyon ki zot pe fer, zot pou annan larzan pou kouver *scholarship* pa zis pou bann etidyan ki'n klarifye 2022, me dan lezot sirkonstans, akoz zot pe fer en travay aprofondir pou etablir *manpower needs* vizavi demann ki i kapab annan?

Mon lot klarifikasyon konsern bann etidyan *SITE* Mr Speaker. (Mr Speaker eski Onorab Georges i kapab reste trankil les mwan demann mon kestyon?)

**MR SPEAKER**

Well, be mon...

(*Interruption*)

**MR SPEAKER**

Onorab! Onorab! Ou ki'n enteronp mwan la. Mn pa'n tann Onorab Georges mwan.

**HON SEBASTIEN PILLAY**

Be i pe enteronp mwan Mr Speaker!

**MR SPEAKER**

Silvouple les li trankil - ou... Premyerman mon pe demann ou pou silvouple kalkil byen ou klarifikasyon, la ou pe demann en bann kestyon ki an plis. E mon pe ganny en problemm avek sa size klarifikasyon lo kestyon, akoz i-

**HON BERNARD GEORGES**

(*Off-Mic*)

**MR SPEAKER**

(Onorab Georges silvouple les mwan koze!)

Akoz ziska konmela mon war tre pe ka kot dimoun i vreman demann klarifikasyon olye al en lot size. Bon mon pa devret koz tro bokou mwan osi. Terminen silvouple Onorab Pillay.

**HON SEBASTIEN PILLAY**

Mersi. An relasyon ek bann etidyan *SITE*, mon pou zis refer avek ou sa en. Mon'n ganny enformen, ou a koriz mwan si mon mal, ki sa *scholarship* ki zot sipoze pe ale, i annan en *intake* ki sipoze ganny fer Zilyet sa lannen. Sa lenformasyon ki zot, zot in gannyen.

**MR SPEAKER**

Mersi Onorab Pillay.

**HON SEBASTIEN PILLAY**

So si ou kapab klarifye- an sa ki konsern zot *Scholarship* zot pou'n fini ale *by Zilyet, or* eski pou annan retar an relasyon avek bann *teacher SITE?* Mersi Mr Speaker.

**MR SPEAKER**

Mersi. Minis annou sey klarifye sa vitman, mon annan lezot kestyon e mon oule termin sa 10er edmi. Minis.

**MINISTER JUSTIN VALENTIN**

Mersi Mr Speaker. Mr Speaker mon anvi ankor donn lasirans bann etidyan, pou si i annan zot ki annan konplikasyon zot kontakte *HR* zot Minister, me pa kontakte en Onorab, kontakte *HR* zot Minister!

**(APPLAUSE)**

**MR SPEAKER**

Mersi. Ou'n terminen Minis? Mersi. Onorab Cosgrow ou kestyon.

**HON SEBASTIEN PILLAY**

*(Off-Mic)*

**MR SPEAKER**

Onorab Pillay silvouple! Non ou'n ganny- mon konnen *hold-on* silvouple!

Onorab Pillay mon konn byen ki ou *point of order* kantmenm mon pa en kler vwayan, mon konnen ou pa satisfe avek kestyon Minis. Me in reponn nou pou kontinyen. Onorab Cosgrow, Onorab Cosgrow ou kestyon.

**HON WALLACE COSGROW**

Mersi Mr Speaker. Kestyon bomaten ki'n ganny demande par Onorab Uranie i lo kantite etidyan ki'n kalifye pou ganny labours Gouvernman, e Minis in donn nou serten sif e in nonm nou labours Gouvernman.

So eski Minis i kapab dir nou, dan sa bann sif ki in donn nou, eski tou sa bann etidyan pe ganny kouver avek sa ki nou apel en *full labours*?

Akoz nou'n war dan Bidze 2023 ki i annan en eleman *student loan*.

So eski bann etidyan pou bezwen serten al pran *student loan*, ouswa i en *full labours* ki Gouvernman pe donnen pou tou sa bann etidyan ki ou'n nonmen? Mon krwar i enportan nou klersi sa Mr Speaker, akoz i annan bokou dout deor pour ki bann paran zot ava kapab konnen ki mannyer pou bouze e zot pa bezwen vi kot Minis.

Akoz sa ki nou pe war se ki menm si Minis in dir al kot *HR*, sa ki nou pe war dan bann *meeting piblik* i pran 2an pou ganny en *meeting* pou war Minis, prezan mazinen kan ou pou war son *HR*. Mersi Mr Speaker.

*(Interruption)*

**MR SPEAKER**

Onorab ou'n fini demann ou kestyon les Minis reponn. Minis.

**MINISTER JUSTIN VALENTIN**

Mr Speaker tou bann etidyan ki kalifye pou al *overseas* ek zot paran i pran zis 2 semenn apre ki zot in fini ganny zot rezulta, pou zot ganny kontak avek *ANHRD* sa lepok, la konmela Minister Ledikasyon *Scholarship section* pou zot kapab konnen egzakteman ki zot pou fer. E sa i kler.

Donk kestyon bomaten ti pe demann mwan konbyen kou pou arive e nou'n dir nou pa kapab dir la egzakteman, konbyen kou pou arive akoz sa prosedir pa ankor ganny fer.

Si sa pou ganny fer par- akoz i annan sa ki nou apel osi \**part rental*, i annan bann paran ki swazir pou zot osi fer en kontribisyon, pou zot etidyan kapab bouz devan e sa osi

mon retir sa *statement-part contribution* pa "rental" - "contribution". *Part contribution sorry*, pou zot zanfan kapab ariv devan i annan sa prosedir.

Donk tousala ansanm letan nou pran en *average cost* dan lepase mon'n dir zot konbyen i arive, e nou pou etablir sa pour sa lannen ler nou'n ganny sa *value*. Be la nou napa sa *value*; nou napa sa *value* pou lannen 2022.

Mon konnen kestyon petet ti pe mazin 2021 mwan, me selman in dir 2022, akoz nou kapab konn pou 2021. Ozordi - la nou ozordi an Me, an Me 2023, nou pa kapab koz lo kou *scholarship* 2022 - etidyan ki'n fini 2022, nou pa pou kapab sa.

Nou kapab donn en estimasyon baze dan lepase. Me nou pou kapab konn son lannen avan konbyen in pase. Sa mon pwen ki mon anvi fer resorti.

### **MR SPEAKER**

Mersi Minis. Onorab Loizeau mon a pran ou kestyon silvouple.

### **HON NORBERT LOIZEAU**

Meris Mr Speaker. Mon pou byen bref. Mr Speaker mon anvi demann Minis. Minis vi ki dan lepase *scholarship* ti ganny donnen avek bann etidyan, me selman apre ler zot retournen sorti zot labours aletranche ti napa lanplwa pou zot, zis zot ti'n ganny anvoye.

Eski sa voyaz parmi sa bann dimoun ki'n sa bann etidyan ki'n kalifye, eski ou Minister pou fer sir ki en bon pe sa bann etidyan, pou ganny anvoye fer zot labours ki apre bezwen ki pei pe demande? Sa mon kestyon. Mersi.

### **MR SPEAKER**

Mersi Onorab. Minis si i dapre pei bezwen ki pei i bezwen? Minis.

### **MINISTER JUSTIN VALENTIN**

Mersi Mr Speaker. Mr Speaker nou rekonnetai nou osi ki parfwa bann etidyan, pa neseserman ganny sa dyob, ki zot in mazinen pou fer e ki zot in etidye pou fer.

Donk sanmenm sa ki Minister Ledikasyon in war li neseser pou transfer sa domenn *Manpower Planning Human Resource* avek Minister Lanplwa, pou kapab byen etablir en *manpower plan* pou Sesel. E an menm tan *advise* Minister Ledikasyon pou osi letan nou pe fer bann klasman, bann *recruitment*, bann plasman pou bann etidyan kapab fer en bon swa.

Donk developman ki pe annan dan sa kote, se sa pou nou travay ver en *manpower plan*, pou nou kapab etablir egzakteman bann mank dan pei pou plizoumwen kapab ed etidyan fer en swa, ki letan zot fini zot *scholarship* zot kapab ganny plase dan bann landrwa kot zot in etidye. Mersi Mr Speaker.

### **MR SPEAKER**

Mersi. Mon pou termin la pou sa kestyon. Nou a pran poz e nou a repran kestyon 11er. Mersi.

**(BREAK)**

### **MR SPEAKER**

Mon pou demann bann Manm pou limit zot siplemanter apard loter kestyon, pou limit zot siplemanter pou 2 kestyon siplemanter. E mon pou akord loter orizinal - loter

kestyon orizinal en klarifikasyon, mon pa pou pran klarifikasyon avek lezot Manm. Mersi.

Apre i annan serten kestyon ki tre spesifik, ki mon pa pou pran siplemanter lezot Manm lo la. Nou a kontinyen avek lalis kestyon e kestyon 44 Onorab Egbert Aglae.

### **HON EGBERT AGLAE**

Mersi Mr Speaker. Minis bonzour ek ou *panel*. Kestyon *comme* swivan;

Swivan rezulta legzanmen enternasyonal dan lekol Leta, ki'n demontre en nivo performans tre feb, eski Minis i kapab eksplik sa Lasanble ki plan son Minister pou redres sa sityasyon? Mersi.

### **MR SPEAKER**

Mersi Onorab. Minis ou repons?

### **MINISTER JUSTIN VALENTIN**

Mersi Mr Speaker. Mr Speaker Minister Ledikasyon nou'n rekonnert performans bann etidyan e nou'n pran 3 mezir enportan, pou nou redres sa sityasyon.

Premyerman, nou pe kontinyen donn bann formasyon, sirtou bann *leaders* dan lekol.

Dezyenmman, nou'n etablis en *Attainment Leaders* dan sak bann lekol pou zot kapab *monitor* progre, *advise* zot bann *teachers* lo ki fason pou devlope, akoz bann *Attainment Leaders* i pou ganny bann *training* siplemanter pou zot pa'n bouz dan sa direksyon.

E trwazyenmman an servan bann levidans ki nou'n annan dan lepase, sirtou par egzant dan en proze matematik ki nou ti fer, nou'n dekouver poudir rezulta legzanmen e

performans bann etidyan i monte ler i annan bann proze.

Donk nou'n form bann *working group* pou sak bann size akademik. Nou pe fer sa pou zisteman pour ki bann diferan group i fer bann proze, pou zot kapab lev nivo ledikasyon, lev nivo sa size li menm.

E an plis ki sa Mr Speaker, mon anvi azoute ki nou pe demann osi bann paran pou zot pran en gran lentere - pli gran lentere osi dan performans zot bann zanfan, sivre zot bann zanfan donn zot bann zanfan lankourazman, pour ki ansanm avek nou dan Minister Ledikasyon, nou kapab konplemant sa pou fer ki i vin performans zot bann etidyan i monte.

E zis osi mon pou bezwen azoute Mr Speaker, ki dan ledikasyon an se moman la nou pa pe ziz zis performans bann lekol baze lo rezulta legzanmen, parske i annan en kantite ki bann lekol pe fer bann ansennyan pe fer.

Donk nou pe met lanfaz osi lo bann lezot domenn dan laspe lekol - par egzant bann aktivite sportif, kiltirel, rekreatif pou ki zanfan i devlop li dan en lanvironnman konplet. Mersi Mr Speaker.

### **MR SPEAKER**

Mersi Minis. Onorab Aglae ou siplemanter?

### **HON EGBERT AGLAE**

Mersi Minis pou ou larepons. Minis eski Minister Ledikasyon in antreprann en evalyasyon, pou get efikasite bann *teaching and learning practices* ki pe ganny adopte dan bann lekol, sirtou atraver bann *curriculum* pou vwar son efikasite e si

fodre petet aziste? Akoz sak *teacher* i annan son fason ki li i pran serten size pou *teach*. Sa i enn.

Dezyenmman, ozordi i annan bokou bann paran ki pran son ledikasyon son zanfan ase serye, ki zot menm al lo nivo *extra class*. Baze lo sa Minis, ki lankourazman petet zot pare pou donn bann paran e osi ankouraz bann *teachers* ki pare osi pou pran bann *extra class* avek bann zanfan?

Akoz parfwa i annan dimoun ki vin devan Minis, zot in menm demann en laklas apre ler lekol e swa sa *Headteacher* i refize e i dir ou swa ledikasyon pa pou le, eski zot kapab get en pe ladan pour ki i ava annan *condusive* ki zot a ganny landrwa osi pou fer sa? Mersi.

### **MR SPEAKER**

Mersi Onorab. Minis repons.

### **MINISTER JUSTIN VALENTIN**

Mersi Mr Speaker. PS pe sinal mwan ki i kontan ou bann propozisyon. Mr Speaker pou nou ariv lo sa 3 mezir neseser - sa 3 mezir ki nou'n pran, in annan bann evalyasyon, in annan bann diskisyon e in annan bann lobzervasyon ki nou'n fer. Donk sa in ganny fer.

E se pour sela ki mon dir bann *working group* zot zisteman sa evalyasyon i pou en kontinite - i pou kontinyen fer, pour ki nou kapab prezan devlop bann proze spesifik pou nou kapab devlop sak size.

An se ki konsern *extra class*, e bann paran byensir ki pe pran ledikasyon zot zanfan serye, sa Minister Ledikasyon i ankouraze e i kontinyen donn zot sipor e felisit zot. Donk i en ta paran pe fer zot, pe pran

zot responsabilite tre serye e zot pe apiy zot zanfan bokou. I annan enn de ki ankor pa kapab vin devan.

E pa kapab vin devan i annan plizyer rezon i annan wi - pa serye e i annan petet zot pa pe war li sa nesesite. Be nou, nou pe demann bann paran pou ariv devan, vin devan. E si zot pa kapab koz avek zot lekol, akoz nou pe donn bokou responsabilite bann lekol pou pran bann desizyon lo zot menm.

*Extra class* Mr Speaker, i annan bann etidyan, bann group ouswa bann endividé ki pe servi bann resours Minister Ledikasyon, pou zot donn *extra class*. Me solman nou-*extra class* i bon e bokou ansenyan i involve dan *extra class*.

Be selman sa ki nou, nou pa anvi i vin *unethical*, kot en etidyan kot en ansenyan pa delivre dan laklas me apre servi *extra class* pou li ansenyan son prop etidyan an servan larzan, sa nou krwar i pa *ethical*, alor nou pa ti a kontan sa arive.

Me osi lontan ki annan ansenyan - akoz mon konnen i annan ansenyan ki pran bann lezot zanfan dan bann diferan lekol, ouswa ki pran bann ansenyan dan *state school* ki pran bann etidyan dan *private school*, pou montre lesон sa osi i annan. Donk i bann mouvman ki nou siporte. E nou kapab nou siporte e si zanmen-

Akoz nou, nou bi se ed zanfan Seselwa *attend* zot bi se pou ed zanfan Seselwa *attend* zot bi, si nou kapab siporte donn resours nou pou fer li. Mersi Mr Speaker.

### **MR SPEAKER**

Mersi. Klarifikasiyon Onorab. Wi?

**HON EGBERT AGLAE**

Mersi Minis pou ou larepons. Minis alor mon ti a swete ki petet si Minister, malgre ki lekol i annan son lotonomi, parey ou dir sak lekol i pran son desizyon.

Me selman pour bann rezon liniformite ki swa ou a fer en sirkiler, swa ou a met li dan ou Polisi ki okenn dimoun ki anvi ede, ki kapab ganny akse avek swa en *classroom* apre ler, pou zot kapab deservi sa koz ki nou pe diskite la. Mersi.

**MR SPEAKER**

Mersi. Minis oule adres sa?

**MINISTER JUSTIN VALENTIN**

Mr Speaker nou kapab al dan sa direksyon. Mersi.

**MR SPEAKER**

Mersi. Onorab Gill ou kestyon.

**HON CHURCHILL GILL**

Mersi Mr Speaker. Bonzour Minis ek ou delegasyon. Bonzour tou Manm. Minis mon annan zis en kestyon.

Sa *working group* ki ou'n eksplike, i zot ki prepar sa bann *projects* ki *anticipate* ki i ava ed manrmay. Eski ler zot in fer sa bann *project*, zot menm zot ki evalye, oubyen i annan en lot group dimoun ki evalye sa?

Akoz si meton sa proze ki'n ganny fer - nou pa dir i pa bon - me selman si meton i pa pe al *achieve* sa lobzektif, mon santi petet ti a bon annan en lot fason ki sak *working group* zot, zot ganny evalye pou asire ki sa lobzektif ki'n ganny *set* i ganny *achieve*. Eski i annan sa? Mersi Minis.

**MR SPEAKER**

Mersi. Minis repons.

**MINISTER JUSTIN VALENTIN**

Mersi Mr Speaker. Mr Speaker en proze i pou pran diferan laform. Sak proze i pran diferan laform e sak *working group* i kapab vin osi avek diferan metod, diferan proze e menm diferan metod evalyasyon.

Me i pou toultan osi annan dan sistenm ledikasyon bann *inspectors*, bann *inspectors* ki fer sir ki bann diferan size pe ganny byen pratike e tou dimoun pe fonksyon dapre bann standar ki Minister Ledikasyon pe mete. Donk...

E mon konnen dan lepase osi kot bann *working groups* wi in fonksyonnen. E la anba mon direksyon, mon pe osi dir bann *working groups* dan laliny ki ou pe ale, pou parfwa wi zot bann proze pa neseserman evalye tou zot proze zot menm, i bon kontrer annan de ler ou donn en *external partners* pou vwar si ou kapab, kot ou kapab amelyore.

Donk i en propozisyon ki konsistan avek nou plan. Mersi Mr Speaker.

**MR SPEAKER**

Mersi. Onorab Samynadin, kestyon.

**HON KELLY SAMYNADIN**

Mersi Mr Speaker. Bonzour Minis avek ou delegasyon e tou dimoun a lekout. Minis koman en faktor motivasyon, eski Minister Ledikasyon pa pe mazin konsider revwar *pass mark IGCSE* avek *DELF* ki pe plizoumwen demotiv bann etidyan pou travay lo bann aktivite ki zot kapab? Mersi.

**MR SPEAKER**

Mersi Onorab. Minis.

**MINISTER JUSTIN VALENTIN**

Mersi Mr Speaker. Mr Speaker mon panse lo kestyon pe koz lo *selection tests*. Lefe ki pri- nou konnen bokou zanfan i anvi fer *Extended* e mwan sa ki mon'n konstate dan lepase, e bann ansennyan, i tant pour fer zot bann zanfan fer *Core* akoz la zot asire ki zot pou ganny zot, sirtou bann etidyan ki en pe ase solid pou ganny ensi.

Be mwan mon pe ensiste lefe ki sa 2 pri i parey - mwan mon pe ensiste ki bann ansenyan i toulstan pous zot bann etidyan en pe pli devan. *Enroll* zot dan *Extended* si posib.

E pou sa arive byensir sa pwen ki ozordi i 70poursan pou en etidyan ganny selekte pou fer *Extended*, mon pe demann bann dimoun pou nou revwar sa.

Si nou pa kapab fer sa pwen-ou konnen akoz ler en etidyan- la par egzamp la semenn prosenn ankor dan 2 semenn bann etidyan pou al komans fer zot legzanmen pou zot ganny gete zi zot pou ganny swazir pou al *Extended* ou *Core*.

I annan ki pa ankor pare, me zot pou pare an Desanm, zot pou pare an Novanm ouswa an Oktob. Donk si nou met bar tro o, i fer zot perdi sa sans letan zot i pare.

Donk wi, si i annan posibilite revwar sa bann pwen. E apre pa zis pwen nou pa kapab zis baz keksoz toulstan lo pwen. Nou bezwen osi get profil sa etidyan. En etidyan in dan sa lekol pour 5an, mwan si mon'n ek en etidyan pou 5an, mon pou konnen si i pou kapab. Pa ni fodre donn li en

legzanmen pou determinen si i pou kapab fer en *Extended* ouswa fer en *Core*. Son profil pou dir nou sa.

Donk profil en etidyan in enportan e sanmenm sa ki nou oule met lanfaz lo ki ansennyan i gard profil bann etidyan, i konn son etidyan. Mersi Mr Speaker,

**MR SPEAKER**

Mersi Minis. Onorab Pillay ou kestyon?

**HON SEBASTIEN PILLAY**

Mersi Mr Speaker. Mr Speaker Minis dan enn bann *statement* ki i ti fer resaman, i ti koz lo sa size *school autonomy* e i ti dir poudir li i krwar poudir en antite i vin *autonomous* ler i ganny *financial power*. E ou ti dir sa an 2022.

La ou'n mansyon nou ou pe donn lekol plis lotonomi. Eski ou kapab klarifye pou Lasanble, ler ou pe koz lo plis lotonomi pou bann lekol, an sa ki konsern laprantisaz, kwa ki ou pe sey dir par lotonomi? Pour ki sak lekol i pran an konteks spesifik son bann etidyan pou zot kapab *improve attainment* dan sa lekol *at school level*? Sa i premye pwen.

Dezyenm pwen prezan Minis, mon konnen ou pa kontan bann *teachers* i kontakte bann *MNA*, be zot in fer - enn bann konsern eksprimen par bann *teachers* se ki zot pa pe kapab vwar vreman en direksyon an sa ki konsern *attainment*.

So eski Minister Ledikasyon in idantifye atraver lanaliz sa performans ki nou pe koz lo la, ki bann *areas* ki bann lekol spesifikman i bezwen *focus* lo la?

Zis pou klarifye Mr Speaker, dan mon leksperyans *across* sak lekol ou vwar poudir dan serten lekol laprantisaz serten konsep, i kre kondisyon pou ki zanfan pli tar pa performen dan legzanmen, baze defayans ki'n arive *at school level*.

So eski zot in idantifye e ki metod oubyen stratezi ou pe met an plas, pou kapab *tackle* sa sityasyon?

E an sa ki konsern bann *specific projects* mon konnen kekfwa ou pe *refer to EPAM*. Kan eski sa bann proze ki ou pe koz lo la sa ki nou pou apel bann lentervansyon direk? Kan eski sa pou komanse dan bann diferan lekol oubyen eski ou pou target serten lekol pou komans sa bann lentervansyon? Mersi Mr Speaker.

### **MR SPEAKER**

2 kestyon Onorab. Mersi. Minis.

### **MINISTER JUSTIN VALENTIN**

Mersi Mr Speaker. Mr Speaker premyerman mon pa'n dir mon pa kontan ansenyan kontakte *MNA*. Me selman sa ki mon anvi dir, i annan bann keksoz enportan ki ansennyan i devret konnen, *MNA* i riske pa sa dimoun ki pou donn zot larepons.

Donk i annan zot Minis - tou *teacher* i koz ek mwan e tou *teachers*, tou *Headteachers*, mon dan en group ek tou *Headteachers*, tou *teachers*.

Mwan annan mwan Mr Speaker dan sak lekol en *teacher* ki reprezent tou zot *teachers*, ki zwenn mwan omwen 2 mwan, tou le 2 mwan zot zwenn mwan e mon dan sa group avek zot. Donk tou dimoun dan Ledikasyon i annan *access* direk avek mwan.

**(APPLAUSE)**

### **MINISTER JUSTIN VALENTIN**

An se ki konsern bann kas lotonomi pour bann lekol, akoz mon koz lotonomi serten bann lekol? Akoz Mr Speaker, fodre nou aret- mwan dan mon konsep ledikasyon, fodre nou aret vwar lekol tou lekol parey. E anba sa filozofi aret vwar tou lekol parey se la kot lotonomi i vini.

E lefe ki lekol *A* pa parey lekol *B* ou donn sa sans sa group *management* ek sa *Council* pran bann desizyon spesifik pou adres serten pwen. Me byensir i annan bann paramet ki zot bezwen *operate* ladan. An se ki konsern bann diferan *attainment group*; bann *attainment leaders* ansanm koman sa *working group*, nou pe donn zot osi zot lotonomi pou zot form zot lekor an mezir ki zot progrese.

Ozordi la, napa en proze spesifik ki'n ganny fer. Me selman sa group pe zwenn, zot pe etidye sityasyon pou zot kapab vin avek en proze, ki zot krwar i pou neseser pou bouz ledikasyon devan. E sa i zisteman parey bann diferan *working group*.

So la a ler aktyel bann *working group* ki pe ganny formen, sa i en stratezi ki pe ganny formen, pa tou ki annan en prose egzakteman ki zot pe al fer. Me selman sa ki zot konnen, zot konnen ki semen zot pou pase pou zot kapab ed devlopman zot size. Mersi Mr speaker.

### **MR SPEAKER**

Mersi Minis. Mon annan kestyon Onorab Gervais Henrie, eski? Anr ou ki pou poz kestyon pou li. Onorab Arissol?

**HON SANDY ARISSOL**

Mersi Mr Speaker. Bonzour Mr Speaker. Bonzour Minis ek tou dimoun ki a lekout. Lo non Onorab Henrie Mr Speaker, mon ti a kontan demann son kestyon;-

Eski Minis pou Ledikasyon i kapab dir avek nou Lasanble, ki Polisi son Minister vizavi partisipasyon e rol en Manm Elekte Lasanble Nasyonal lo Konsey Lekol sa distrik kot in ganny elekte? Mersi.

**MR SPEAKER**

Mersi. Avan Minis i reponn mon a zis, mon konnen Onorab Henrie i enplike avek delegasyon asosyasyon Parlmanter *COI* dan sa peryod, so mon ekspekte sa i son rezon ki i pa la. Minis ou repons, eskiz sa enteripsyon.

**MINISTER JUSTIN VALENTIN**

Mersi Mr Speaker. Mr Speaker i annan en *S.I.* 65 2010 ki koz Konsey Lekol ki fer provizyon pou Konsey Lekol.

E dapre sa *S.I.* Manm ki sipoze lo sa Komite Konsey Lekol se i annan en *Chairperson* ki ganny apwente par Minis Ledikasyon;- i annan *Headteacher* ki en *ex ufficio* lo sa group. I annan 2 reprezantan ansennyan *Chairperson PTA*, Administrater Distrik epi nenport bann Manm dan kominote ki eksprim lentere pou zwenn sa Konsey.

Me selman sa ki nou'n war Mr Speaker - nou pe war sa dan lepase e nou pe war sa osi la konmela, kot bann Manm bann Manm *MNA* i montre gran lentere dan lavi lekol. E sanmenm sa ki mwan mon

kontinyen ensiste ki *MNA* i annan en rol pou zwe dan lavi lekol.

Donk, sa lentere ki zot pe montre i kler e zot pe siport zot lekol byen, zot pe siport zot lekol byen, zot pe ed lekol bouz devan. I annan ki pe rod *sponsor* i annan ki fer bann aktivite e nou pe war sa tou lazournen lo televizyon.

Donk pozisyon Minister Ledikasyon se ki, i anvi met azour sa *S.I.* pou reflekte dinamiz ki pe arive dan kominote e dan pei ozordi. E atraver mon larepons ozordi la Mr Speaker mon pe envit bann Manm Onorab pou debat lo sa size, pou koz lo sa pwen ler nou pou vin avek sa *S.I.*

E nou, nou pe santi poudir ki bann *MNAs* ki'n ganny elekte akoz zot in ganny elekte dan en distrik e kot i annan en lekol zisteman e ki zot pran bokou lentere dan sa lekol. Donk nou ti a kontan zot vin en Manm lo sa Konsey. E nou pou met azour parey mon'n dir met azour nou *S.I.* pou fer sir ki sa dinamiz i reflekte sa ki pe arive la dan kominote osi dan pei. Mersi Mr Speaker.

**MR SPEAKER**

Mersi. Siplemanter Onorab Arissol?

**HON SANDY ARISSOL**

Mersi Mr Speaker. Mersi Minis pou larepons. Mon ti a kontan demann ou 2 pti siplemarter lo kestyon orizinal Onorab Henrie.

Premyerman mon ti a kontan demann Minis si ou kapab *provide* Lasanble Nasyonal avek lalis bann *School Council* Konseye Lekol, ki nou annan lo nivo bann distrik, pour ki nou tou bann Manm Lasanble nou

ava azour pou konnen lekel sa bann dimoun e lekel zot *Chairperson*?

Dezyenmman mon ti a kontan demann ou pou leksplikasyon pou piblik ki pe ekout nou; ki vreman rol sa Konsey Lekol lo nivo nou bann lekol ki nou annan ozordi, ki vreman zot rol? Mersi bokou Mr Speaker.

### **MR SPEAKER**

Mersi. Minis ou repons.

### **MINISTER JUSTIN VALENTIN**

Mersi Mr Speaker. Wi Mr Speaker nou ava fer *available* sa dokiman, kot i annan bann lalis diferan manm Konsey Lekol bann diferan distrik a laporte bann *MNA*.

Rol prensipal Konsey Lekol se pour ed lekol dan son zesyon gouvernans. Gouvernans lekol. I ed lekol etablir son bann plan stratezik, evalye son bann plan. I ed bann *Management* Lekol pour fer fas avek bann defi ki zot annan.

Me selman nou war dan lapratik sa rol, i osi elarzi. Nou war bann sirtou bann *Chairperson* ki laplipar di-tan zot pe fonksyonnen dan lavi lekol.

Mwan mon krwar en bon pe zot pe fer menm an plis ki zot devret pe fer. Zot konsey bann ansennyan zot konsey bann travayer kot lekol. i annan ki vvar paran lo non bann diferan lekol. Donk zot pe swe en rol enportan. Konsey Lekol i- ou konnen i donn en lapiy *Management* Lekol.

E mwan mon'n war sa i en rol enportan. E la an mezir ki nou pe koz lo donn plis lotonomi bann lekol, i annan bann Konsey Lekol ki zot annan zot bann dimoun i annan diferan konesans dan lasosyete e diferan *skills*. E zot pe servi sa bann

skills pou ed lekol fer fas avek zot bann defi toulezour. Mersi Mr Speaker.

### **MR SPEAKER**

Mersi Minis. Onorab Gill ou kestyon?

### **HON CHURCHILL GILL**

Mersi Mr Speaker. I *more or less* en klarifikasyon baze lo larepons ki Minis in donnen konsernen Manm Elekte pou siport sa Komite.

Eski Minis pe dir ki ziska ki sa *S.I.* i ganny amande, *then* Manm Elekte pou bezwen espere? Oubyen Manm Elekte i kapab al lo sa Konsey la? Mersi.

### **MR SPEAKER**

Mersi Onorab. Minis.

### **MINISTER JUSTIN VALENTIN**

Mersi Mr Speaker. Manm Elekte i fonksyonn egzakteman parey zot pe fer konmela. Zot pa lo konsey me zot partisip dan lavi lekol. Me byensir pou antre lo konsey formelman i pou ler sa *S.I.* i aranze. Me la zot kontinyen egzakteman parey.

I annan ki menm al partisip dan bann *meeting* ki bann Konsey lekol i fer. Sa nou ankouraze e nou les sa arive. Osi lontan ki bann *MNAs* parey zot pe fer pe travay pou devlop ledikasyon, Minister Ledikasyon i siporte. I ankouraze. Mersi Mr Speaker.

### **MR SPEAKER**

*Thank you.* Onorab Pillay ou kestyon.

### **HON SEBASTIEN PILLAY**

Mersi Mr Speaker. Mr Speaker Minis pe donn nou 2 larepons. Ler i ti pe

reponn kestyon premyerman in donn lenpresyon ki en Manm Lasanble-

Akoz la kestyon Onorab Henrie i dir rol en Manm Elekte Lasanble Nasyonal lo Konsey Lekol, in donn lenpresyon ki nou kapab pa al lo sa Konsey.

E sanmenm ki'n fer Onorab Arissol probableman demann li lalis bann Konsey. La ler Onorab Gill i demann li sa kestyon nou *go back to* sa S.I.

So mon klarifikasyon ki mon annan pou demande, egzakteman ler ou sorti la anndan la eski en Manm Elekte oubyen en Manm Lasanble Nasyonal ki dan sa distrik i kapab vin en manm lo sa Konsey parey bann manm ki ganny en dapre zot tit DA, oubyen non?

E ki alors ou pe propoze pou fer, akoz ler ou pa en manm lo sa Konsey, ou pa en manm lo sa Konsey ou *still* kapab partisipe, me ou pa en manm lo sa Konsey. So ki ou pe ekspekte sa Manm Elekte i fer egzakteman pou li kapab vin en manm lo sa Konsey?

Akoz ki Onorab Gill pa'n azoure ki ler bann Manm Elekte Praslin ti demann ou menm kestyon ou larepons ti en pti pe diferan. So se sa ki nou oule klarifye, akoz nou oule konnen si nou kapab vin partisip lo sa Konsey oubyen non. Mersi Mr Speaker.

### **MR SPEAKER**

Mersi. Minis.

### **MINISTER JUSTIN VALENTIN**

Mersi Mr Speaker. Mr Speaker mon war Onorab Gill ti'n sakouy latet an siny ki in konpran mwan.

So ki mwan mon anvi dir, sa S.I dapre mon konsyans mon krwar i en zouti legal. Osi lontan ki sa S.I. pa ankor sanze ofisyelman en Manm MNA ki anvi lo Konsey i pou kapab ale selman i pa pou ofisyel lo Konsey. Si i annan en sans kot i pou fer en desizyon pou li vote son petet son vot son lavwa pa pou ganny tande. Me i a ganny pran koman en *advice*.

I pou lo la me pa ofisyel. Me nou kontinyen fonksyon parey nou pe fonksyonnen la ozordi, napa okenn difikilte me ki Mosyon pe demande- pa Mosyon, ki kestyon pe demande, kestyon pe dir annou fer sa vin ofisyel. E mwan mon pe dir Minister Ledikasyon i anvi bouz dan sa direksyon. Mersi Mr Speaker.

### **MR SPEAKER**

Mersi Minis. Nou a pas lo lot kestyon. Limero 46 Onorab Regina Esparon.

### **HON REGINA ESPARON**

Mersi Mr Speaker. Bonzour Minis ankor ek ou delegasyon. Mr Speaker, eski Minis i kapab dir Lasanble ki plan son Minister, pou revwar lafason ki bann *school librarian* i ganny ankadre avek bi;

(1) revwar bann *school librarian* an operasyon pandan vakans, e dezyenmman, ancouraz bann *school-leavers* pou pran *school librarian* koman en karyer pou ki lekol ava ganny ranplase pou sa ki pe pran retret, e anpeste ki i annan en mankman dan sa sekter? Mersi.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mersi Mr Speaker. Mr Speaker, i annan en lankadreman formel pour bann *librarians*, e sa i pandan letan normal lekol. Pou le moman napa en kad formasyon pou zot pandan letan vakans.

Me sa ki nou'n war dan sa dernyen vakans la, sa mouvman ki bokou paran i anvi zot zanfan angaze dan bann aktivite rekreadyonnal osi byen ki ekstraskoler, nou pe mazin ki mon krwar i neseser la preznan, revwar bann... sa kad *librarian* pou zot kapab osi konpran mannyer pou ankadre bann zanfan dan vakans. E petet pa zis *librarian*, me osi bann lezot dimoun ki anvi partisip dan lavi literatir e lektir.

Pour reponn dezyenm bout kestyon Mr Speaker, rol *library* pe sanze, e an konsekans, rol *librarian* osi pe sanze. Wi, nou bezwen *librarian* avek novo *skill*, novo talan pou zot bouz avek letan. Nou'n komans bann programm pou *train* bann *librarian* e osi ankouraz bann novo zenn atraver Minister Lanplwa, an kolaborasyon avek Minister Lanplwa pou zot zwenn sa profesyon.

I annan en premye group la ki'n deza konmanse, pou zot kapab zwenn sa metye, e zot aze ant 15 a 17an, bann ki'n fini zot Lekol Segonder. Pou le moman i annan 2 lo Praslin e i annan 7 lo Mahe. Donk, nou pe komans mazin larelev pou bann *librarians* osi. Mersi Mr Speaker.

### **MR SPEAKER**

Mersi. Onorab Esparon. Siplementer, wi?

### **HON REGINA ESPARON**

Mersi Mr Speaker. Mr Speaker mon pa konnen si Minis i annan sa lenformasyon avek li? Petet i ti kapab konmans par dir nou ki kantite *school librarian* i annan lo nivo primer ek segonder? E dan sa *batch school librarian* ki annan, ki kantite ki pe pran retret dan sa prosen 2an?

E Minis, apre en lot kestyon mon ti a kontan demann ou, pandan vakans, problem ki bann *librarian* i fer fas avek se ki, zot ganny demande toulstan pou travay pandan vakans, e zot, zot pa pe gannyen sa vakans parey *teachers* i gannyen pou ki zot vin travay 3 zour avan larantre, oubyen 3 zour apre larantre.

Epi lo kote teknolozi. Minis, eski a lavenir ou pe mazinen anvi ki nou pe bouz ver teknolozi, ou pe mazinen petet a lavenir *merge* petet... Akoz *library* zot servi plito bann *analogue*. Konmsi bouz en pe ver teknolozi pou *merge school library* ansanm avek *computer centre* dan bann lekol? Mersi.

### **MR SPEAKER**

Mersi. Onorab in al lo 3 pwen. Nou a konsider sa koman en klarifikasyon ansanm avek kestyon. Minis, reponn silvouple.

### **MINISTER JUSTIN VALENTIN**

Mersi Mr Speaker. Mr Speaker, bann *statistics* ki Onorab in demann mwan, nou kapab fer li gannyen. Avek nou la, napa. Dezyenm pwen, wi nou okouran poudir pa zis *librarian* - i osi annan bann *lab technicians*, bann diferan... Bann *non-teaching role*, bann *non-teaching staff* ki pe osi demande pou zot ganny zot vakans. Nou pe konsidere

sa, akoz zot bann demann i *genuine* e zot bann demann i *fair*.

E akoz annandler ler nou gete, *library* par egzanp. *Library* wi, pa ti pe *operate* dan vakans, alors bann *librarian*, nou kapab fer zot, donn zot, pou zot ankouraz zot. Zot kapab zot osi pou ganny en vakans. Be la par egzanp la ki mon pe dir, i annan sa demann pou bann diferan aktivite ekstraskoler, rekreasional.

Pa zis *librarian* e osi lezot ansennyan ki anvi partisip ladan. La nou ava gete petet, ki bann kalite programm nou kapab fer, pou devlope lo nivo bann lekol.

Trwazyenm pwen kot i koz lo teknolozi, mon'n dir dan mon lentervansyon, Mr Speaker, ki rol *library* pe sanze, rol *librarian* osi pe sanze. Wi, pou annan sa bann diferan demars, kot nou pou war lentegrasyon. Evantyelman, nou pou war bann lentegrasyon teknolozi.

Nou'n komans vwar, par egzanp; Nou'n komans war bann programm kot zanfan i aprann lir, zot aprann lir an servan teknolozi, e sa i dan *library*. En bon pe lekol sa *platform* i dan zot *library*. I annan byensir ki lo zot prop *devices*.

Ler le moman in arive, wi, nou pou napa swa, nou pou bezwen bouz dan sa direksyon. Alors nou annan gran lespwar ki *library* pe sanze e bann *librarian* parey mon pe dir, zot osi zot pou sanze pou fer fas avek sa realite. Mersi bokou, Mr Speaker.

### **MR SPEAKER**

Klarifikasiyon in fini pase.

### **HON REGINA ESPARON**

En pti klarifikasiyon. Non, Mr Speaker, mon ti zis anvi dir Minis.

Anvi ki pou annan sa sanzman, mon mazinen osi zot *Scheme of Service* i pou bezwen ganny revize, pou kapab accommodate sa sanzman ki ou pe koz lo la ki pou vini a lavenir. Mersi.

### **MR SPEAKER**

Mersi. Minis, ou'n note?

### **MINISTER JUSTIN VALENTIN**

Mersi. Mr Speaker, PS i enform mwan ki i annan en diskisyon avek *DPA* e pli tar nou kapab... Mon retire. Avek *PSB*. E, pli tar nou kapab fer sa diskisyon... sa lenformasyon vin an publik. Mersi.

### **MR SPEAKER**

Mersi. Onorab Samynadin, ou kestyon?

### **HON KELLY SAMYNADIN**

Mersi Mr Speaker. Minis, nou konnen ki enn bann rezon prensipal pou ki bann etidyan, zot nivo performans lo nivo langaz i desann, set akoz lektir... Zot abilite lektir pa o nivo.

So, mon ti a kontan konnen kwa ki pe ganny fer lo nivo Minister Ledikasyon, pou re ankadre bann *librarians*, pou kapab *tackle* sa sityasyon lektir, ankouraz zanfan pou lir, e avek bi pou elev nivo bann etidyan lo konteks langaz? Mersi.

### **MR SPEAKER**

Mersi. Minis?

### **MINISTER JUSTIN VALENTIN**

Mersi Mr Speaker. Mr Speaker, an se moman la en proze direk ki mon kapab koz lo la, se sa proze renesans ki bann lekol pe fer, e ki sa proze byensir pe fer pou zisteman al lev

nivo lektir dan lekol. E nou'n war apre detrwa bann differan vizit ki bann tim renesans, in vini, kot sa proze pe mars tre byen. E nivo lektir dan bann lekol pe amelyore. I pa lo sa nivo ki nou ti a kontan, me selman i a pe amelyore. E sa i pozitiv.

E nou ti a kontan osi, pa met lanfaz zis lo lektir Angle, me osi met lektir lo nou bann lalang nasyonal. Ki mon anvi dir osi dan sa... an relasyon avek sa kestyon, *librarian* i pa pou le sel group dimoun ki nou devret byen ankadre zot, pou zot kapab montre zanfan lektir. Zot bann ansennyan. Zot bann ansennyan. Menm zot bann paran.

E nou swete la byento letan *Library Nasyonal* i ava ouver, la i ava osi en lokazyon pou nou kapab... Minister Ledikasyon zwenn avek bann tim *librarian* nasyonal pou kapab - ou konnen, kontinyen propaz la lektir. La lektir o nivo nasyonal.

E pou ankadre bann *librarian* - bann *librarian* pe ganny formen dan tou laspe. Dan laspe ki mannyer pou zot *gère* zot *library*, e an plis ki sa, ki mannyer osi pou ankouraz bann zanfan lir lo nivo lekol.

E nou pou war dan bann lekol, i annan bann letan ki bann zanfan i sorti dan laklas i al dan *library*. E letan zot al dan *library*, laplipar ditan, bann zanfan primer, se en *librarian* ki akonpanny zot dan sa demars.

E apre mwan, mon pe ankouraz zanfan, bann etidyan, kontinyen lir, kontinyen lir. Pa depan zis lo *librarian*. Ozordi nou annan en kantite keksoz pou lir ki a zot laporte, donk letan dan zot lanmen i annan en *mobile*, i annan *data* lo la. Zot

kapab osi al lo en *site* kot i annan... Zot *download* vitman en zoli liv, ouswa en zoli *text* e lir.

Zot kapab lir *silencieusement*, ouswa zot kapab lir *haute voix*, depandan lo zot stil e lafason ki zot konpran. Donk, i en mouvman ki ozordi nou kapab demann bann zanfan, pou pa esper *librarian*, pa esper ansennyan. Zot osi pran kontrol lo zot lektir. Mersi Mr Speaker.

### **MR SPEAKER**

Mersi.

### **MINISTER JUSTIN VALENTIN**

Mr Speaker, PS ti anvi azout en pti keksoz koman en ansennyan langaz.

### **MR SPEAKER**

PS, ou a azoute *please*?

### **PS MERNA EULENTIN**

Ok. Mersi Mr Speaker. Bonzour Mr Speaker ek tou bann Manm Onorab. Zis pou azoute, en pti pe pli spesifik, i annan en group 14 biblioteker ki pe swiv laklas kot SITE, pou devlop en pti zot abilite pou travay avek zanfan. Laklas in konmans an Out 2022, i pou ale ziska Desanm 2023. Apre sa bann biblioteker dan bann lekol pou kontiny en Programm *Diploma and Library and Information Science*. E sa i pou konmans 2024.

*En faite* i annan en travay konzwent ki pe ganny fer ant SITE, TGMI, e osi Minister Ledikasyon, kot nou pou kapab anmenn sa programm kot SQA pou ganny valide. E osi nou pe travay lo en Programm Pedagozik, kot bann biblioteker, avek bi pou ansenny zot lo bann pli bon fason e

teknik koman pou ansennu lektir bann zanfan.

Donk, osi nou'n vwar dan lepase ki bann ansyen *librarian* in travay avek bann zanfan, sirtou dan bann lakkas en pe feb, pou ogmant en pti pe zot performans. Malgre zot pa pou ganny sa bann A. Me selman zot a sorti *from* en *U to an F or an E*. So, nou pe travay lo la. Mersi.

### **MR SPEAKER**

Mersi PS. Onorab Cosgrow, kestyon?

### **HON WALLACE COSGROW**

Mersi Mr Speaker. Mr Speaker, eski Minis i kapab dir avek Lasanble, an vi bann diferan devlopman ki'n dir pou annan dan *school library service* - bann sanzman, eski *school library service* pou 2023 in ganny en Bidze? E si wi, konbyen?

E osi vi ki nou pe koz... kestyon pe koz lo servi *library* pandan vakans, mon ti a kontan zis met dan latansyon Minis ki par egzanp; *Library* Lekol Segonder Mont Fleuri ozordi i pa eggiste, i non-eggistan. Tou liv i dan en kwen. E, kan eski Minister *or* sa lekol, pou kapab ganny en *library* pou *at least* zot kapab fer serten laprantisaz pandan letan lekol? Akoz an se moman i non-eggistan. So, mersi Mr Speaker.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mersi Mr Speaker. Mr Speaker, lo sa ki konsern bann diferan devlopman dan *library*... Mr Speaker, mon ti a kontan si Onorab ti kapab repet son premye bout kestyon *please*.

### **HON WALLACE COSGROW**

Yes, Mr Speaker. An vi ki Minis ti pe eksplik nou bann diferan devlopman ki zot anvizaze war dan servis *library*, bann mouvman ki zot pe fer, eski seksyon servis *library* i annan en Bidze pou 2023? E si wi, konbyen zot annan silvouple? Mersi.

### **MR SPEAKER**

Mersi. Mersi, Onorab. Minis, wi?

### **MINISTER JUSTIN VALENTIN**

Dakor. Mersi Mr Speaker. Mr Speaker, Bidze *library* i form parti... I pa spesifik sa *library*, me i form parti devlopman laprantisaz dan lekol. Donk pou devlopman laprantisaz dan lekol byensir i annan sa Bidze. E ki *librarian* li osi letan i submit son Bidze, i submit li anba sa parasol.

Dezyenmman, nou *library* Mont Fleuri; Mr Speaker, malerezman mon vin zwenn en *library* enpitwayab ki delo in anvair, ki'n ganny andomaze partou ek delo, e sa i regretab. E nou pe fer nou demars pou nou kapab *restore* sa *library* Mont Fleuri. Mersi Mr Speaker.

### **MR SPEAKER**

Napa klarifikasiyon lo bann siplemanter! Mersi.

(*Interruption*)

### **MR SPEAKER**

E mon dezole...

### **HON WALLACE COSGROW**

Mr Speaker, nou pa kapab annan en pwa de mezir dan Lasanble!

**MR SPEAKER**

Mersi!

**HON WALLACE COSGROW**

Ou'n *allow* Onorab Espanon en siplemanter. Mon kapab ganny 1 silvouple? Zis 1. Mr Speaker, mon pa pou tenny mon *micro*, mon pa pou sede. Be in *allow* lot kote, be akoz i pa kapab *allow* mwan?

**MR SPEAKER**

Onorab, trankil silvouple! Mersi. E mon dezole pou annons lezot Manm ki mon'n *run out of time* lo sa kestyon. So, mon a pas lo lot kestyon, Onorab Regina Espanon, numero 47.

**HON REGINA ESPARON**

Mersi Mr Speaker. Mr Speaker, eski Minis i kapab dir Lasanble ki plan son Minister pou ki Lekol Glacis i ganny en *playing field*? Mersi.

**MR SPEAKER**

Mersi. Minis? Minis ou repons?

**MINISTER JUSTIN VALENTIN**

Mersi Mr Speaker. Mr Speaker, an sa ki konsern sa kestyon. Yer mon ti fer li mon devwar pou mon al vizit sa site egzakteman pou gete ki pe arive. E mon ti anmenn mon tou bann lezot dimoun ki'n oparavan avek sa proze. Mr Speaker, i en teren difisil. Difisil.

E la pou le moman, Minister Ledikasyon pa pe mazin devlop sa teren pou fer en laplenn pou lekol. Lekol Glacis dan sa plas kot i ete.

Me selman nou annan en solisyon. Sa solisyon ki nou pe vin avek, se nou pou gete ki mannyer... Sirtou pou bann zanfan ganny sans fer zot lesion ledikasyon fizik. Nou

pou travay avek Gouvernman Lokal, Minister Gouvernman Lokal, Departman Spor, e menm Lapolis, pou nou vwar ki mannyer sa teren ki egziste, sa laplenn ki egziste o bor Sant Kominoter Glacis. Ki mannyer sa i kapab ganny servi pou akey bann zanfan pou zot fer zot devlopman ledikasyon fizik.

Donk, nou ava diriz nou bann resours, e lenerzi dan amelyor sa lespas pou fer ki nou a servi li olye ki nou servi sa teren kot ozordi bann dimoun pe dir; akoz zot pa devlop li la? Mersi Mr Speaker.

**MR SPEAKER**

Wi, Onorab Espanon? Siplemanter.

**HON REGINA ESPARON**

Mersi Mr Speaker. Mr Speaker, mon konpran me selman an menm tan mon en pti pe dezapwente ek sa larepons ki Minis pe donn mwan bomaten la, parski oparavan, bann paran lekol ti'n menm fini ganny dir zot pou ganny sa teren pou fer sa *playing field*. E zot ti'n menm depanse, aste bann pti lekipman ki zot pe *store* kot lekol konmela, pou zot kapab met lo sa teren ler i pare. Me selman an menm tan mon konpran sa ki ou pe dir.

Me sa alternativ ki Minis pe met devan mwan Mr Speaker, enn, mon vwar li i lwen. E sa deplasman pou tir zanfan kot lekol pou anmenn laba, i pran letan. Sirtou bann zanfan ptiti en pe pli dousman. I pran letan pou ariv laba dan sa landrwa, si zot pou marse, i pou pran zot omwen en 10 minit pou ariv laba, 10 minit tournen, ki deza zot in deza fini deza perdi en pe dan zot letan *PE*.

E pou mwan i vin lo en lot dezapwentman, parski lannen pase,

bann zanfan Lekol Glacis in fer byen dan *sport*. E nou ti anvi en teren pli pre avek lekol, pou zot kapab devlop zot plis dan spor e pou zot kapab konmsi amelyor zot performans. Me la letan ou pe dir ek mon nou pou servi laba, Minis, mon lebra i tonbe. Mersi.

### **MR SPEAKER**

Mersi, Minis in note. Minis, mon pa konnen si ou bezwen reazir lo la? Selman, vitman silvouple.

### **MINISTER JUSTIN VALENTIN**

Mersi Mr Speaker. Mon pou reazir pou lebra Onorab releve. Mr Speaker, ti en gran konversasyon ki mon ti gannyen yer, menm avek direktris lekol. Nou pe mazinen, wi pou deplas bann etidyan. Nou ti pe mazin petet nou envesti dan en *coaster* ki pran marmay kot lekol, i anmenn li lo sa laplenn laba. Sa i kapab redwir lakantite letan. Me selman de lot kote, en ansennyan Fizik.

Sanmenm mon'n met sa zwe, akoz laba lo sa teren i en pe gran ouver. Nou bezwen i osi an sekirite. E osi lo sa larout kot zanfan pou traverse, kot lekol pou al kot sa teren, i osi i en pe...I napa *pavement*.

I napa trotwar. I kapab danzere. Me selman dan pwennvi ledikasyon fizik, i annan dimoun ki kapab dir ou koumsa; Marmay i taye, i *warm up* letan pe al lo sa laplenn. Son premye 5minit i *warm up* pou ariv kot sa laplenn ledikasyon fizik, wi,

Me selman pou le moman... E menm si - menm si Mr Speaker, ozordi dizon nou dir nou pou fer en teren la, pa pou arive dan sa prosen 2an. I pran en pe letan pou fer sa

teren. I annan en kantite keksoz pou fer la. An 2018, plan ki mon annan 2018 ti pou kout R2.4milyon pou convert sa lespas.

E ozordi, mon panse i pou bezwen bokou plis ki sa. Donk, i en lespas difisil. E menm si en teren i ganny fer letan ou'n gete. Ki grander i pou ete? I pa pou en gran laplenn tro gran pou kapab.

Donk, annou rod sa alternativ Mr Speaker. Mon *believe* dan annou rod sa alternativ pou nou redonn zanfan Glacis. Wi, zot fer byen *sport*, mon konnen annandler - akoz mon osi mon pe get mon la koman en pti garson dan en lekol primer, san en teren ki mannyer nou ti tay vit. Donk, annandler nou bezwen osi rod bann lezot alternativ.

Sesel pa tro ptipiti. Si nou annan nou en *coaster*... Mon si nou annan en *coaster*, nou ganny *coaster*, nou kapab bouz bann etidyan kot bann diferan teren ki annan pou zot kapab partisip dan zot ledikasyon fizik. I pou pli fasil servi en *coaster* ki petet al envestir dan sa lespas, pou le moman.

### **MR SPEAKER**

Wi, zis...

### **MINISTER JUSTIN VALENTIN**

Be selman Mr Speaker, si nou ganny lezot lapiy, Minister Ledikasyon i *welcome* sa avek tre gran ker.

### **MR SPEAKER**

Mersi. Klarifikasiyon Onorab?

### **MINISTER JUSTIN VALENTIN**

Mersi Mr Speaker. Mon ti zis anvi klarifye avek Minis. An vi ki sa teren ti'n ganny *allocate* pour Lekol Glacis,

ki plan zot annan preznan pou sa teren, parski an se moman i annan konplent ki sa teren pe ganny les abandonnen, i sal, i pe fer lera, i pe fer moustik e piblik pe konplent ki pa pe ganny *maintain* sa *ground* la. Ki plan zot annan alternativ pou sa teren? Mersi.

### **MR SPEAKER**

Mersi. Sa klarifikasyon. Minis?

### **MINISTER JUSTIN VALENTIN**

Mr Speaker, la akoz sa bann desizyon la, pe ariv la, la. Nou napa en plan la a ler aktyel la dan nou lanmen, ki nou pou fer ek sa teren. Pa ankor ganny diskite. Mersi bokou.

### **MR SPEAKER**

Mersi. Mon a pran siplemanter Onorab Pillay.

### **HON SEBASTIEN PILLAY**

Mersi Mr Speaker. Mr Speaker, an 2021 Onorab Espanon ti lev menm kestyon avek Minis pandan sesyon Bidze. Mon war i drol ou pa ti ankor vizit sa teren, akoz ou ti donn li sertenreasirans ki zot pou rode en teren laplenn pou zanfan Glacis. La ou dir nou ou'n al vizite e ou war ou pa ankor kapab.

Savedir sa ki ou pe dir nou an 2021 ou pa ti ankor vizite pou ou war? Mon pa pou al lo la mwan. Sa ki mon le al lo la konmsi, akoz nou bezwen sey rod en solisyon. Mon osi mon en zabitan Glacis, mon'n lekol Glacis. Mon ti a kontan war sa teren ganny servi pou Lekol Glacis.

Eski laport in fini fermen? Akoz mannyer ou'n koz ek Onorab. Zot in ale, zot in fini *move* lo solisyon rod en *coaster* ki personnelman mon pa krwar i pratik.

Dezyenmman, mon pa krwar i pratik pou bann zanfan sorti kot lekol pou al ziska kot laplenn i ete. Sirtou bann zanfan ki en pe pli pti.

Eski Minister Ledikasyon i pare pou angaz li avek bann akter dan distrik, ki a sey rod en fason pou regarde ki mannyer kominote i kapab vin ansanm pou kontribye, pou fer sa teren materyalize pou Lekol Glacis? E ki ou pa ferm laport, e donn nou en lasirans...

Donn nou en lasirans ki Minister Ledikasyon, *as we speak now*, pou fer sir ki sa teren i reste pou Lekol Glacis. Akoz mon'n tande dan *meeting* piblik ki i annan lezot... lezot lentere lo sa teren. E mon pa ti a kontan krwar sa bann lezot lentere pe konmans manifeste.

So, si nou kapab ganny sa bann langazman, *then* mon krwar *then* zabitan Glacis e bann dimoun ki annan Lekol Glacis aker, a sey rod fason. Si pa marse, i pa marse. Me nou bezwen seye, vi ki Minister i dan sa difikilte pou kapab fer sa realize. Mersi Mr Speaker.

### **MR SPEAKER**

Mersi Onorab. Minis?

### **MINISTER JUSTIN VALENTIN**

Mersi Mr Speaker. Mr Speaker mon pare pou zwenn Onorab, koman Minis Ledikasyon, pou zwenn Onorab dan sa demars pou nou petet rod en... Angaz avek bann zabitan Glacis. Mon napa problem ek sa. Napa laport ki fermen. Laport pa zanmen fermen. Bann konsiltasyon i toultan enportan. I toultan enportan. Donk annou koze. Mersi Mr Speaker.

### **MR SPEAKER**

Mersi. Mon a pas lo prosen kestyon  
48. Onorab Egbert Aglae.

### **HON EGBERT AGLAE**

Mersi Mr Speaker. Kestyon i lir konm swivan; Eski Minis i kapab eksplik sa Lasanble dan ki size ki i annan mankman *teachers* dan lekol, e ki plan son Minister pou redres sa bann defayans? Mersi.

### **MR SPEAKER**

Mersi Onorab. Minis, ou repons?

### **MINISTER JUSTIN VALENTIN**

Mersi Mr Speaker. Mr Speaker, mon anvi - mon anvi bouz sa diskisyon lo en lot nivo, e mon pe demann Onorab pou nou fer sa. In toultan mank ansennyan dan nou lekol, e i ankor manke. I mank ansennyan dan preski tou sistem ledikasyon. Menm dan bann pli gran pei devlope ki nou i mank ansennyan.

E size ki mank plis ansennyan la pou nou Sesel, i bann size lasyans e matematik. E apre bann size teknik osi. E la PS, bann detay ki nou annan, nou osi mank ansennyan dan bann size larelizyon.

Plan Minister Ledikasyon se pou nou revwar lafason ki lekol i fonksyonnen. Nou pe deza komans fer sa bann transformasyon. Dabor nou bezwen rekonnnet, Mr Speaker - nou bezwen rekonnnet ki nou en pti pei, e nou devret rod bann model ki apropiye pou nou.

Lo nivo primer, zot pe fer fas avek en letap la pou le moman. Nou pe gete ki mannyer nou kapab retransform nou *timetable*. Ki size ki nou tire, ki mannyer nou tir li. Ki mannyer nou adres bann diferan size. Mon nepli krwar ki nou kapab, ki nou devret, tou lekol nenport ki

grander ou ete, ganny menm kantite size par semenn, par lannen. Nou bezwen revwar sa.

O nivo segonder, mon'n lans Direkter Zeneral pour Developman Polisi dan en proze spesyal pou li travay ek bann lekol, e gete ki mannyer nou kapab ganny bann laklas pou fer en laklas *multimedia*, ki petet nou kapab servi li pou fer bann lesion *online* an servan teknolozi. E sa i petet i kapab servi mwens resours imen, mwens *teachers*. Nou pe fer sa.

Nou pe osi *train* bann etidyan. Bann etidyan pou zot kapab konpran sa konsep *contact* ek *non-contact time*. E ki mannyer letan zot napa en ansennyan, ki mannyer efektivman zot kapab osi servi *non-contact time* baze lo bann keksoz ki zot in gannyen letan zot ti annan kontak ek en ansennyan, pou zot progrese.

Mr Speaker, mon osi krwar ki nou pe tro met lanfaz lo kantite, ki la kalite. Donk nou bezwen redwir sa. Ki mon pe sey dir sa. Akoz annandler letan mon pe koz avek bann ansennyan pou dir zot koumsa, nou pou redwir en size, met en lot, zot per pangar zot pou perdi letan.

Be mwan, mon krwar annandler depans lenerzi dan en size. Depans lenerzi - pa dan en size - dan en peryod, i riske bokou pli efektiv ki fer 25 ti peryod san abouti dan naryen.

Donk, ki mon pe sey dir la Mr Speaker, nou bezwen revwar lafason ki nou fonksyonnen. Me selman an atandan - an atandan ki tou sa bann *thinking*, sa bann diskisyon i ganny fer, nou kontinyen avek nou proze *recruitment*.

Nou kontinyen avek nou proze pou demann bann ansennyan ki partou, partou, ki anvi zwenn ledikasyon, ki annan en letan pou donnен.

E la nou pe fer bann *scheme* osi pou nou kapab gete ki mannyer nou kapab rekonpans bann dimoun ki vin donn zot letan kot ledikasyon. Donk *recruitment* pou kontinyen. Demann ouver laport pou bann lezot dimoun ki anvi ansennyan pou kontinyen, anmezir ki nou fer sa bann diferan *thinking*, pou fer sa transformasyon, pou anmenn...

Pou nou kapab *deal* avek sa konteks, i mank ansennyan. Akoz i pou toultan mank ansennyan. Menm si ou pou annan tou ansennyan ki ou anvi i pou manke. Osi lontan ki napa en ansennyan pou en etidyan, i pou mank ansennyan. Mersi Mr Speaker.

### **MR SPEAKER**

Siplementer, Onorab Aglae?

### **HON EGBERT AGLAE**

Mersi Mr Speaker. Mersi Minis pou larepons. Minis, mon konsyan poudir i pou touzour annan mankman ansennyan, akoz mon osi ler mon ti pe lekol, in annan ansennyan *expatriate* ki'n antre, e se sa ki fer ki nou pou napa zanmen annan ase *teachers* Seselwa. E se sa ki nou bezwen bann ansennyan *expat*. E sa in touzour koumsa, e dan lemonn i mars koumsa.

Sa ki mon anvi konpran Minis la mwan. Baze lo sa bann mankman ki annan, nou war poudir i annan serten konsern ki i al en pti pe pli lontan, kot napa en ansennyan pou serten laklas. Sa i size ki nou ti a kontan petet adrese.

Baze lo sa Minis, eski zot pe mazin petet *recruit* en pti pe plis ansennyan *expat*?

Dezyenmman Minis, kot i konsern formasyon lo bann *teachers* Seselwa. Petet si ou annan statistik la, si ou kapab dir nou konbyen nou ekspekte *graduate* dan en peryod letan, ki pou kapab *fill* osi sa bann pos?

E dernyen, bann kad ki nou napa ansennyan ki pe spesyaliz dan tel, ou tel *field*, eski bann provizyon neseser i annan pou ranplas zot, ouswa pou fer nou lekol resevwar sa bann ki annan sa bann kad spesifik ki nou *teachers* pa pe neseserman *train* ladan. Mersi.

### **MR SPEAKER**

Mersi Onorab. Minis, repons?

### **MINISTER JUSTIN VALENTIN**

Mr Speaker, sa lannen in annan zis 21 etidyan ki sorti dan S5 ki'n swazir pou antre dan lansennyman. Nou annan en problem. Ansennyan, bann zanfan Seselwa, mon panse baze lo sa ki zot pe war kot lekol, baze lo sa ki zot in war dan lepase kot lekol osi, zot pa pe ganny ankouraze osi pou vin *join* lansennyman. I en gro defi sa.

Nou fer bann *recruitment* ek bann *expatriate*, apre zot premye kontra, zot dekouraze zot ale. Nou pe pas dan en faz difisil. Menm si parey mon pou dir ou nou pou kontinyen *recruit*, i pou annan sa bann difikilte.

Nou dir i annan tro bokou letan ki en ansennyan, en zanfan i napa laklas. Pirman akoz bann dimoun i kontinyen *operate* dan tradisyonnal. E mwan mon pe

anmenn sa laspe, annou osi edik zanfan ki mannyer pou etidye.

Donk i annan de ler kot i pou napa en ansennyan. Me i annan travay. I annan travay ki pou li fer. I kapab fer sa travay. Bann *independent learning*, i kapab fer sa. Be nou bezwen depans lenerzi pou nou fer sa. Donk mwan, mon war sa deba lo mankman ansennyan dan Sesel, i devret sorti lo sa laspe, annou rod lakantite ansennyan, ranpli laklas. Sorti dan sa nivo, pou vin lo en lot nivo.

Annou ed etidyan pran kontrol lo son ledikasyon. Annou fer bann transformasyon avek nou *timetable*. I pou nou sa. I pou nou sa *timetable*. Nou kapab sanze, rearanze. E annou osi...

Mwan i annan menm en nouveau ledikasyon ki mon anvi dir avek nou bann ansennyan. Ou pa bezwen krwar ki ou pou en ansennyan dan zis 1 lekol ozordi. Ou annan 2 lekol o bor ou, ou kapab bouze. I depan dapre ou size. Ou kapab bouze sorti lo en lekol A al lo en lot lekol B, depandan lo lakantite size ki ou annan, lakantite zanfan ki annan dan ou laklas.

Donk, i en letap ase konplike, me i pa enposib, nou kapab fer li. Me selman fodre nou sorti dan sa tradisyon. Sorti dan sa tradisyon pou nou bouz devan, avek en lot nide, en lot *thinking*, pou nou kapab rezourd nou problem ansennyan dan Sesel. Mersi Mr Speaker.

### **MR SPEAKER**

Onorab Aglae, ou'n demande siplemanter, non? Klarifikasyon koman loter kestyon, wi mon a les ou enn.

### **HON EGBERT AGLAE**

Minis, mersi pou ou larepons. Anvi ki taler ou'n fer resorti osi ki i annan ansennyan ki pa *perform, ok*. I annan serten ansennyan ki konplent pou dir serten presyon i ganny mete lo zot, pou taye fini sa *curriculum*. E la lanmenm ler i annan zanfan ki ganny kit deryer, akoz i pa pe retourn laba deryer li. So, baze lo sa...

### **MR SPEAKER**

Onorab, ankor enn fwa, ou pe al lo en lot pwen la, en.

### **HON EGBERT AGLAE**

Minis, ba...

### **MR SPEAKER**

Lo en lot pwen.

### **HON EGBERT AGLAE**

Be i relye avek sa larepons ki Minis in donnen. Minis, par termin la. Baze lo sa...

### **MR SPEAKER**

Silvouple.

### **HON EGBERT AGLAE**

Eski zot osi zot pe revwar sa? Pe demande ki sa osi i ganny revwar dan son totalite ler zot pe mazin osi *overhaul* en pti git sa ki ou'n koz lo la Minis. Mersi.

### **MR SPEAKER**

Mersi. Minis, ou repons?

### **MINISTER JUSTIN VALENTIN**

Mersi Mr Speaker. Mr Speaker, sa bann *working group* ki mon ti koze taler, i annan koneksyon direk osi avek bann diferan size. Sa bann

*working group* osi pou pe revwar tou sa bann keksoz, la. Tou sa bann keksoz ki annan pou fer avek laprantisaz.

Donk, ti en *narrative* sa zafer degaze fini *curriculum*. Depi ler mon'n vin Minis, zanmen mon'n deza koze sa mwan, akoz mon konnen menm si ou taye ou fini *curriculum*, pa pe abouti ou dan naryen. Zanmen mon koz sa *narrative* mwan.

Mon, mon dir ek dimoun annou revwar, annou revwar nou *timetable*, revwar nou *curriculum*. Mon'n menm demande, demande pou nou tir en pe size, tir en pe topik lo *timetable* dan bann diferan size akoz i tro bokou, pa pe abouti nou dan naryen.

Donk Onorab, i annan en mouvman dan sa *thinking* ki ou pe mazinen, pou nou kapab fer ki presyon i sanze lo *teacher*. E zisteman dan primer, mwan sa ki mon ti anvi. Letan mon'n demann zot pou zot revwar zot *timetable*. Revwar lafason ki nou get bann size.

E mon ti apel sa bann *key subject* ek *non-key subject*, zisteman pou nou fer sir ki nou, nou rekalibre nou, pou fonksyonn dan en lot letap. Akoz sansan nou pou vir an ron dan zafer i mank *teacher*, mon *overload*, mon napa letan *and so on and so forth*.

Mon'n al pli lwen pou tir presyon lo bann ansennyan. Mon'n menm dir zot koumsa, *planning*. Annou arete sa zafer toulezour ou bezwen prepar en leson. Lezon ki'n ganny prepare par bann *late teachers* eksperyanse, zot kapab al *borrow*. Zot kapab al *borrow*. Akoz sa i bann leson ki en *teacher* in prepare, in

deza *teach*, e i santi i annan valer ladan.

E mon'n demann zot pou al *online*. Al *online*, servi bann lenformasyon ki egziste partou pou zot kapab fer zot lesion byen.

Mon'n menm koz bann *lesson plan*. En *bank of lesson plan* ki Minister Ledikasyon i kapab *coordinate*, pou fer ki bann *teachers* i gannyen.

Donk, i annan en mouvman pou fer ki nou tir sa presyon lo ansennyan pou li fer li kapab *teach* en pe pli dan en *mood* pli *relaxed*, me pli byen efektiv. PS, Mr Speaker, i anvi dir en pti keksoz ki i santi mon pa pe dir.

### **MR SPEAKER**

PS, wi. Ou ti a kontan azoute?

### **PS MERNA EULENTIN**

Thank you, Mr Speaker. Mersi Onorab Aglae pou ou bann sizesyon. Par egzanp ou'n demande, ki Minister pe fer dan le ka ki napa osi ansennyan ki pou ranplas bann *teachers* dan lekol. Par egzanp nou'n komans en diskisyon o nivo *part-timers*. I annan bann dimoun ki anvi vin *teach*, me selman sa lapey, sa pti *allowance* i en konsern. Zot pe dir ki i feb. E nou nou'n met sa devan Minister Finans osi pou petet revwar alokasyon *allowance* pou bann *part-timers* ki vin ed lekol.

E osi pou detrwa size. Par egzanp zot pa bann *teachers* me selman zot formen dan zot domenn. Nou'n *reach out* bann *professional centres* pou bann *graduate* ki annan en *diploma*, e osi *advance level certificate*. Par egzanp pou

*Technology and Enterprise*, zot a kapab osi ansennny konstriksyon.

*Food and Hospitality, Agriculture, Design and Technology, Fisheries, Textile and Fashion*, i plito bann domenn teknik. Deza detrwa graduate in ranpli zot form, zot in montre sa lentere pou zot zwenn lansennyman. E apre nou lo nou kote Minister, nou a donn zot sa formasyon ansanm ek SITE sa bout formasyon Pedagozik.

E nou pe mazin osi *revamp* sa *Aspiring Teacher Program through SITE* ki deza i annan bann zenn ki kot SITE zot ti dan sa programm. Zot ti form parti dan sa programm letan zot ti dan segonder. E osi nou pe vvar bann dimoun petet ki napa sa sertifika, me ki zot annan en serten potansyel pou zot kapab vin *teachers*. Ki mannyer nou lo kote ledikasyon, nou kapab travay ek sa bann dimoun pou fer ki zot annan en baz dan *teaching*. Mersi Mr Speaker.

### **MR SPEAKER**

Mersi PS, mon regrete mon'n arriv a lafen letan pou sa kestyon. Mon pou pas lo lot kestyon. Eskize. Onorab Gervais Henrie. Onorab Arissol ki pou demann kestyon 49?

Mon remarke... En pti remark Onorab Arissol. Mon remarke i annan 4 pwen dan sa kestyon. Normalman nou'n dir bann Manm, *limit* zot pou 3 pwen. Me selman, tan ki la i mon lafot ki mon pa'n fer atansyon lo la, Onorab Arissol, poz kestyon.

### **HON SANDY ARISSOL**

Mersi Mr Speaker. Kestyon Onorab Henrie i lir koumsa: -

Eski Minis pour Ledikasyon i kapab donn nou Lasanble sa bann lenformasyon swivan konsernan programm gadyak dan lekol:

Premye, Konbyen zanfan ki'n anrezistre?

Konbyen larzan letan in depanse dan sa programm depi ki in inisyé?

Trwazyenm, eski i annan lakonpannyen prive ki pe ede dan sa programm?

Katriyenm e dernyen, eski i annan langazman paran dan sa programm?

Mersi Mr Speaker.

### **MR SPEAKER**

Mersi. Minis repons.

### **MINISTER JUSTIN VALENTIN**

Mersi Mr Speaker. Mr Speaker sa programm gadyak dan lekol i enn pli zoli programm ki la ler mon'n vini ki Gouvernman in mete dan lekol la pou lemoman. En zoli programm.

E sa programm i asire - Son filozofi se asire ki napa okenn zanfan ki antre dan lekol pou komans en lazournen lekol, avek en lestoman vid.

Dan primer i annan 8,046 etidyan ki anrezistre lo sa programm, e sa i reprezent 73poursan bann zanfan primer. Dan segonder i annan 1135 etidyan ki lo sa programm ki reprezent 17poursan bann etidyan segonder.

Donk an total i annan 9,181 etidyan. E sa i reprezent en total 52poursan bann zanfan ki pe lekol dan *state school* ki lo sa programm.

Larzan ki'n ganny depanse depi komansman sa programm i *comme* swivan, depi Septanm ziska desanm 2022 ti R4milyon455mil.

Zanveye ziska Avril 2023 in annan environ R3milyon ki'n ganny depanse lo sa programm.

Wi i annan bann boulance, bann fermye e osi bann serten bann biznes ki *deal* avek bann lavyann. E serten lotel e lakonpannyen prive ki fer bann donasyon.

Wi i annan langazman paran dan sa programm sirtou lo nivo primer kot paran i vin asiste, i donn zot kouraz e menm osi zot donn bann keksoz ki zot annan dan lakour.

Mr Speaker, mwan mon le fer resorti ki *Caritas Victoria* ti partisip dan sa programm par donn *breakfast* 3 lekol primer lannen pase. E sa lannen la, zot pa pe neseserman angaze akoz zot santi ki sa bann programm la prezant in byen ganny antre dan lekol.

E Mr Speaker mon le re fer resorti osi, ki STC i en siporter mazer dan sa programm. E STC i met a dispozisyon lavalier R250mil par mwan, pou nou kapab servi pou donn *breakfast* dan lekol. Mersi Mr Speaker.

### **MR SPEAKER**

Onorab Arissol par pou siplemanter?

### **HON SANDY ARISSOL**

Mersi Mr Speaker. Mersi Minis pou ou larepons. Mon ti ava kontan Mr Speaker lo mon non personnel koman en paran, ek tou bann paran ki pe benefisyé atraver sa servis anba Minister Ledikasyon pou dir mersi Gouvernman e osi bann lezot dimoun prive ki mon'n tann ou mansyonnen pou donn nou zanfan sa servis.

Mon ti a kontan demann ou e pti kestyón;

Eski i annan okenn difikilte an relasyon avek lekel ki asiste bann zanfan dan partaz zot pti gadyak dan bomaten? Mon premye kestyón.

Dezyenmmman mon ti ava kontan demann ou, eski i annan en ler spesifik pou bann zanfan e bann paran konnen ki ler i komanse e keler i fini sa pti gadyak ki nou pe koz lo la bomaten? Mersi bokou Mr Speaker.

### **MR SPEAKER**

Mersi Onorab. Minis.

### **MINISTER JUSTIN VALENTIN**

Mersi Mr Speaker, Mr Speaker sa programm dan sak lekol i annan son fason ki in organiz li. I annan bann lekol kot i annan bann *warden* ki ede, i annan bann *general assistant*.

I annan bann lekol ki annan bann ansenyan ki vin boner, pou zot osi partisip dan sa programm.

Donk, sak lekol i annan son fason fer. E nou lenformasyon ki nou annan se ki bann lekol sa programm pe mars tre byen dan bann lekol. Donk nou napa difikilte avek sa.

E bann ler, laplipar ditan dan bann lekol pe komans ant, i annan ki komans 7er mwen en kar, i annan osi bann lekol ki komans 7er en kar. Ankor sa i depan lo lekol. Donk sak lekol parey mon pe dir la i annan son ler komanse, me osi annan son ler fini.

Me nou, nou pe dir 8er edmi se la letan kot nou demar bann letan akademik normal. Mersi Mr Speaker.

### **MR SPEAKER**

Mersi. Pran en pti letan pou siplemanter lezot Manm, selman mon ti ava kontan zot fer li bref

silvouple akoz ler pe terminen.  
Onorab Pillay.

### **HON SEBASTIEN PILLAY**

Mersi Mr Speaker. An relasyon avek sa programm, i byen ki nou'n finalman aksepte poudir i annan zanfan ki annan difikilte pou zot kapab ganny en *breakfast*.

Sa ki mon ti ava kontan klarifye avek Minis, eski Minis ou'n fer okenn *meeting personnelman* avek bann *Headteachers* lo nivo *management* sa programm an se ki konsern *management* sa programm lo nivo lekol?

Wi i pe marse, i depan bokou zefor lo bann *teachers*. Me eski ou personnelman ou'n fer okenn *meeting* oubyen eski in annan okenn *meeting* avek bann *teachers* an relasyon avek bann presyon ki sa programm i mete, e ki mannyer nou kapab amelyor sa programm lo nivo lekol?

Dezyenmman, dan *meeting* piblik mon ti tann ou mansyonnen poudir i annan en zofisyen Minister Ledikasyon ki vin verifye. Mon'n fer li mon devwar mon'n al kot mon zanfan i lekol, mon pa'n war sa zofisyen Minister Ledikasyon.

So eski ou pe fer sa lo en baz rotasyon, oubyen eski ou pe etablir en fason, en sistèm pou ou fer en *quality control*, menm lo bann keksoz ki STC i provide bann lekol pou sa programm e asire ki sa programm i kontinyen marse? Akoz i byen ki i annan en programm pou bann zanfan, i byen ki nou ed bann zanfan?

Mersi Mr Speaker.

### **MR SPEAKER**

Mersi Onorab. Minis repons.

### **MINISTER JUSTIN VALENTIN**

Mersi Mr Speaker. Mr Speaker nou zwenn bann *Headteacher* lo en baz kontinyel. Nou ti annan en *meeting* semenn pase, de semenn pase avan larantre i komanse, pou nou zisteman koz lo bann diferan pwen.

E parmi letan bann *Headteachers* annan de ler bann keksoz i *burning* e zot ki lev sa bann Mosyon.

Mwan mon annan gran plezir pou dir dan nou *Headteachers Meeting*, *breakfast* pa ti sorti lo en pwen azanda, ki montre ou poudir bann *Headteachers*, ni dan *AOB* pa'n sorti. I montre ou poudir sa programm in byen ganny ankadre dan lekol. E bann lekol pe fonksyonnen.

I annan vizit, Mr Speaker wi i annan en zofisyen Minister Ledikasyon ki ansarz *breakfast*. I pa kapab dan tou lekol an menm tan. Malerezman ler ou'n pase i pa ti la, me selman si ou pou demann li ki'n arrive kot lekol kot ou zanfan ti ete, i pou dir ou egzakteman ki i annan. Ki mannyer in pase.

Donk, sa bann zofisyen ki pas lo non Minister Ledikasyon pou verifye, akoz sak zofisyen dan Minister Ledikasyon. Onorab ou konn byen sa, ou osi ou'n en zofisyen Minister Ledikasyon.

Ou konnen poudir ou ganny atase avek en lekol, ouswa ou ganny atase avek en rezyon e ou pa kapab dan tou rezyon an menm tan. Ou konn sa tre byen.

Donk e bann dimoun pe fer zot travay byen. Mwan pou lemoman koman Minis Ledikasyon mon

konfortab e mon konfidan ki bann zofisyen Minister Ledikasyon ki pe pase, pe gete ki pe arive avek *breakfast*, pe fer li byen.

Pe fer li byen e mon felisit zot. la, la o plenn er lo radyo e televizyon Nasyonal.

### **MR SPEAKER**

Mersi Minis.

### **MINISTER JUSTIN VALENTIN**

Mr Speaker i annan sa dernyen pti bout pou zis etablir, pou etablir ki bann keksoz pe byen fer, ki byen pase, pe ganny byen zere. Ankor mon demann bann lekol pou kit zot rikord e sa bann dimoun ki pase i verifye bann rikord. I verifye bann rikord.

E mwan mon pe demande preznan, si i annan okenn dimoun ki santi poudir i annan bann pti glisaz ki nou, nou pa pe war. Ankor, sa i en loportinite pou zot fer konnen.

Me selman la pou lemoman mon konfidan ki sa programm pe mars byen. E ki tou dimoun i satisfe. E zanfan Mr Speaker, zanfan i kontan sa programm. Mersi.

### **MR SPEAKER**

Mersi. Kestyon Onorab Naidu.

### **HON SATHYA NAIDU**

Mersi Mr Speaker. Bonn apre midi Minis ek ou delegasyon. Zisteman lo prezantasyon ki ti'n ganny fer en pe pli boner, mon krwar lo kote primer 73poursan, apre lo kote segonder solman 17poursan.

Pou ki rezon 17poursan? Eski akoz i annan en diferans ant en *mindset* lo nivo lekol primer avek segonder?

Eski i annan en analiz ki'n ganny fer pou kapab ankouraz bann marmay segonder, ki osi mwen fortinen ki napa le mwayen pou vreman vin devan, pou kapab pran sa benefis dan plas let *peer pressure* pa les zot pran sa benefis.

An menm tan lo kote *packaging*, lafason ki i ganny prezante, eski i annan okenn travay osi ki'n ganny fer pou kapab revwar sa en pti gin?

Mersi Mr Speaker.

### **MR SPEAKER**

Mersi Onorab. Minis.

### **MINISTER JUSTIN VALENTIN**

Mersi Mr Speaker, Mr Speaker bann etidyan segonde i en pti pe pli konplike ki primer. Mon krwar byensir petet zot annan mon pa konnen si *peer pressure* osi, zot pa le vwar konmkwa zot pe manz en keksoz ki zot in ganny donnez gratwit.

Me sa ki mon kapab dir sa menm etidyan ki swazir pou li pa manz sa ki lekol pe, sa ki sistem pe donn li, i fer letour i al aste.

Sa i montre ou poudir sa i en *mindset*. E bann lekol, bann lekol sirtou bann *councillors* kot i santi i annan bann zanfan ki devret pe pran sa *breakfast ouswa* sa repa skoler, i koz ek zot. I fer bann *counseling* avek zot.

E mwan mon pou ankouraz bann etidyan, tir presyon lo zot paran. Sa programm se pou tir presyon lo zot paran.

Donk si zot partisip dan sa programm, ki Gouvernman pe met a zot dispozisyon zot pou pe ede pou tir presyon finansyel lo zot paran.

Alor nou demann zot etidyan segonder, napa okenn dezoner pou partisip dan repa skoler. Alors partisipe e parey mon pe dir tir presyon finansyel lo zot paran.

E Mr Speaker Onorab in koz lo *packaging*. I annan bann lekol i konsyan sa e i annan petet pe donn dan bann pti bwat.

Dan bann lekol primer zot *packaging* i ekselan, ekselan. Mon pa pou nonm bann lekol la, pangar zot ava krwar mon defavoriz en lot. Me selman mon pe dir bann lekol in fer sa bann pti *packaging* zisteman pou atrakte.

Donk dan bomaten ant 7er ziska 8er i annan en zoli pti latmosfer kot bann lekol. E mon envit bann Onorab pou pase pou al get sa bann pti latmosfer.

Mersi Mr Speaker.

### **MR SPEAKER**

Mersi. Bon mon pou pas lo lot kestyon, 50. Mon pou pran kestyon sipleanter loter kestyon pou sa enn, me mon pa pou pran sipleanter lezot Manm pou rezon letan.

Me selman mon espere ki ou ava ganny en *full answer* Onorab. Kelly Samynadin Onorab poz ou kestyon.

### **HON KELLY SAMYNADIN**

Mersi Mr Speaker. Kestyon limero 50 i lir koumsa: -

Eski Minis i kapab dir Lasanble ki zistans travay in arive avek proze renovasyon elektrisite kot Lekol Au Cap? Mersi.

### **MR SPEAKER**

Mersi. Minis repons?

### **MINISTER JUSTIN VALENTIN**

Mersi Mr Speaker. Mr Speaker travay in komanse e i pres pou fini. Blok P1 a P6 travay *wiring* in fini. Dan ladministrasyon avek dan lasal a manze travay osi in konplete.

Sak blok pe ganny son bann diferan *breaker* pou anpes ki annan sa zafer kot i sote tanzantan. Sa osi in ganny met ladan.

Kontrakter i lo site pou pe *monitor* travay. Koneksyon bann *fans* pe ganny fer. Travay pou amelyor sistem e rezourd sa problem elektrisite kot Lekol Au Cap i dan en staz tre avanse. Mersi Mr Speaker.

### **MR SPEAKER**

Sipleanter Onorab.

### **HON KELLY SAMYNADIN**

Mersi Mr Speaker. Minis prenon kont ki Lekol Au Cap i enn parmi sa 2 lekol ki pe ganny transformen pou vin en lekol enkliziv.

E an se moman i annan serten defi ki a lekol pe fer fas avek an-term lenfrastriktir li menm. Eski Minister pe mazin antreprann en *survey* pou vwar ki bann defayans ki sa lekol i annan an-term lenfrastriktir?

E ensi eski zot pe mazin fer en proze *maintenance* mazer lo sa lekol, an vi ki pandan sa dernyen 10an ki sa lekol in ouver in napa okenn proze mazer ki'n ganny fer lo la - proze *maintenance* mazer ki'n ganny fer lo Lekol Au Cap. Mersi.

### **MR SPEAKER**

Onorab klerman ou'n al lo lot size la en. Lenfrastriktir, *maintenance*. Minis silvouple, silvouple.

Onorab mon krwar poudir ou kestyon i vo en kestyon ekrir an

antye. So, mon pou dir Minis annou les sa pou en lot letan e nou ava pran sa. Mersi.

Ok mon pou pran en Kestyon *Without Notice* kantmenm nou letan in preski terminen, selman mon pou *extend* letan en pti gin pou sa.

Mon pou apel Onorab Vidot pou poz son kestyon. Mon pou les Onorab poz son siplemanter, me mon pa pou pran siplemanter lezot Manm.

Onorab Vidot ou kestyon.

### **HON AUDREY VIDOT**

Mersi Mr Speaker pou aksepte mon kestyon. Mon kestyon pou Minis.

Swivan plizyer konsern ki mon'n resevwar par serten paran konsernan zot zanfan ki pe kontinyelman ganny *bully* dan Lekol Plaisance Segonder, eski Minis i kapab dir nou Lasanble ki son Minister pe fer pou adres sa bann problemn *bullying* dan lekol e ki siper ki bann paran pe resevwar?

Mersi.

### **MR SPEAKER**

Mersi. Minis ou repons.

### **MINISTER JUSTIN VALENTIN**

Mersi Mr Speaker. Mr Speaker, mon kontan ki sa Lasanble Nasyonal la ozordi pou reflekte lo sa topik. Me selman i malere ki *bullying* in ariv en topik nasyonal.

Atraver mon larepons mon pou donn lespwar bann zanfan ki pe ganny *bullied* pou zot osi avek zot paran, pou zot konnen ki relman zot lekol pe ganny siporte pou fer fas avek sa sityasyon. E bann paran zot osi zot ava konpran ki zot devret fer pou zot *deal* avek sa sityasyon.

En paran i anvoy son zanfan lekol pou etidye e devlope. E i espekte ki sa zanfan i kapab partisip dan lavi lekol an pe e an sekirite.

E la mon pe dir kler e for. En lot zanfan pa kapab anpes en lot etidye ouswa aprann.

Diskisyon ki mon'n gannyen avek bann zofisyne dan ledikasyon, i demonstre ki *bullying* in en konsern, in en konsern pou en bon pe letan. Lekol in fer son bout, e i ankor pe fer son bout ek sa sityasyon. Me sa sityasyon pe persiste.

Donk i annan en pe letan ki mon'n dakor pou mwan ranforsi nou lapros, pou nou get sa sityasyon byen menm.

Dan nou plan stratezik Minister Ledikasyon *Ethos and Culture*, i enn parmi sa 6 *domain* ki nou pe travay avek, pou fer ki nou target se amelyor disiplin dan lekol.

La resaman, tou resaman an Mars 2023 nou'n anbark dan en proze ledikasyon etik, moral e valer. Zisteman pou fer zanfan konpran pli byen zot rol e zot relasyon antre kanmarad.

Minister Ledikasyon pa tousel lo sa demars. Lenstitisyon parey NCC, Servis Sosyal, Departman Lafanmir e menm Lapolis pe partisip ek nou.

Mr Speaker, bann lekol i annan zot stratezi ki zot servi pou zot *deal* avek *bullying*. Me annan de ler sa stratezi ki zot servi, i pa neseserman vin efektiv.

Akoz la dan laplipar di-tan, i annan bann paran ki zot zanfan pe *bully* lezot zanfan, letan zot ganny demande pou vin kot lekol pou bann diskisyon, zot pa vini.

Donk mwan ozordi mon pou pe dir e mon pou pe *lead* Minister Ledikasyon dan sa direksyon, si apre ki tou demars in ganny fer, pou nou kapab rezourd sa bann problem kalmeman, mwan mon pou demann bann paran ki anvi anmenn sa zafer lo en nivo zafer Lapolis, fer.

Akoz nou bezwen enn fwa pour tou *deal* ek *bullying*, akoz mwan mon anvi ki zanfan i vin lekol i an pe e i an sekirite. Si ou permet mwan Mr Speaker, PS i annan bann detay spesifik ki sak lekol i fer, i kapab prezant zot, me sinon mon termin lo sa pwen. Mersi Mr Speaker.

### **MR SPEAKER**

Mersi. Wi PS nou ava donn ou laparol. Mon pa espekte tou detay konplet, be selman zis pou ekliersi sa kestyon.

### **PS MERNA EULENTIN**

Ok mersi Mr Speaker, mersi Onorab Vidot pou ou kestyon. Mersi Minis pou donn mwan laparol.

Anfet diferan letap in deza ganny etabli par en komite anba direksyon *Allied Education Services Division* pou nou relans sa konpanny kot nou dir pou *reduce incidences of bullying and anti-social behaviours*.

E ladan i annan 5 *priority area* ki mon pou nonm briyevman, apre nou kapab donn ou lenformasyon petet pli o profon.

Premye *priority area* se nou *data collection*. Akoz nou anvi ki nou etabli en *database* ki ase fyab e ki realis, an sa ki konsern bann diferan ka *bullying* ki egziste. Akoz i annan diferan fason. Parey nou annan *cyber bullying*, nou annan osi *physical harassment*, pou zis nonm enn de.

E la nou ti ava kontan felisit lekol atraver bann *Headteachers, Deputy Headteacher* en *counsellor* ki provide nou sa bann lenformasyon.

Dezyenm *priority area* ki komite pe travay lo la se revwar *Anti-Bullying Policy* ek *Strategy* pou nou kapab aport led en pti pe profon. Deza i annan travay kin ganny fer. Donk nou pou vvar bann keksoz kin marse, ki pe marse, e bann ki pa pe marse ki mannyer nou kapab ansanm avek lakominote amelyore.

E trwazyenm *priority area*, se *resensitization of training of school communities*. E la lobzektif se pou sansibiliz osi lakominote lo lefe *bullying*.

E devlope a training package on *bullying* kot ansanm lekol e osi lakominote, tou dimoun *at large*, i kapab partisipe pou nou *empower* nou bann *staff as well*.

Katriyenm *priority area*, se bann *value-based education program*. Lobzektif se pou enstitisyonaliz bann diferan programm pou promouwar bann bon konportman e respe pou lezot.

E la nou kontan pou anonse ki Minister Ledikasyon in deza komans en konversasyon ek bann diferan *NGO* e groupman ki'n pare pou vin donn en koudmen *as well*.

E dernyen *priority area* ki nou pe focus lo la, se bann *media campaign* kot nou pou raise awareness of the negative impact of *bullying*. E nou pou servi nou bann zanfan menm pou fer bann promosyon;-par egzanp zot kapab fer bann pti *video*, bann senaryo pou montre zot bann lezot koleg lo bann diferan lefe *bullying*.

E zis pou terminen Minister Ledikasyon in komans en konversasyon lo en *healing program*, pou vwar serten lakoz fondamantal bann move konportman. Akoz parfwa nou pe *deal* avek bann problemm ki'n fini *escalate*. Me selman nou bezwen vwar par egzanp bann problemm entern ki pa vreman evidan.

Sa zanfan osi byen ki son paran i annan keksoz ki parfwa i pa, nou pa kapab war li fizikman. Me petet si nou kapab travay en pti pe lo prevansyon. *Heal bann places* ki nou santi i merit *healing* avan ki bann problemm *bullying* i kontinyen.

Akoz parfwa i zis reaksyon bann problemm ki sa zanfan e menm sa lakour zot pe *deal* avek personnelman *and then they bleed on other people*. So nou pe travay lo en *healing program* ansanm ek bann NGO pou get en pti pe o profon ki nou kapab fer. Mersi Mr Speaker.

### **MR SPEAKER**

Mersi PS. Bon en repons byen detaye. Ou annan siplemanter Onorab Vidot.

### **HON AUDREY VIDOT**

Wi Mr Speaker. Mersi Minis avek PS pou zot larepons. PS premyerman mon annan paran ki le dir mersi ki ou ti entervenir dan serten sirkonstans, kot Lekol Plaisance Segonder. E lo sa laliny eski zot annan en striktir ki zot pe met an plas.

Petet pa neseserman zis pou Lekol Plaisance, me ki pou asire ki lezot lekol osi? Ki fasil pou Minister Ledikasyon annan bann lenvestigasyon entern, ki vwar poudir kot bann serten lekol ki pe

kontinyelman annan *bullying*, pou vwar petet akoz paran i vwar zot al apres dimoun an deor olye vin pres ek lekol pou zot kapab adres sa size.

Apre mon annan en paran ki'n war lentere letan sa kestyion in vin lo medya. In dir mwan dir lo nivo Lekol Belonie, ki son garson i ganny *bully* fizikman, akoz petet si zot kapab revwar osi zot, si i dan zot plan pou revwar zot Kod Kondwit? Akoz i annan serten laspe ladan.

Par egzanp kot zanfan letan i koup seve, i annan bann petet laparans fizik ki zot tant pou petet pa neseserman *meet* sa standar. Ki petet Minister Ledikasyon pe avoue, e sa zanfan i ganny anvoye kot li pou li al rekoup son seve, e sa paran i dir poudir petet zot devret revwar, annan konsiltasyon pou zot revwar sa Kod Kondwit. Mersi.

### **MR SPEAKER**

Mersi. Minis ou kapab adres sa silvouple?

### **MINISTER JUSTIN VALENTIN**

Mersi Mr Speaker. Mr Speaker bann stratezi ki PS in pas lo la zisteman i osi anglob en pe bann lenvestigasyon ki ganny fer.

E wi nou war li en konsern nou sirtou letan bann paran i al an deor. Me selman sa ki mon demann paran mwan, sa al deor ki zot pe fer an se ki konsern *bullying*, zot pe rod en dimoun pou zot kapab koz avek.

Be selman evantyelman sa ki nou, nou pe dir, sa dimoun i bezwen - akoz *bullying* i en keksoz enportan ki nou bezwen *deal* avek. Donk sa dimoun avek ki sa problemm in ganny rapporte donk i devret li ariv evantyelman kot lotorite, e sa lotorite

dan sa konteks i Minister Ledikasyon pou kapab ede rezourd sa problem lo kote lekol.

Donk wi, paran-paran li si i bezwen koz ek nenport dimoun ki annan konfyans avek pou kapab rezourd sa problem, fer. Me selman sa dimoun avek ki sa problem in ganny mete, fer nou konnen, pou nou kapab nou osi prezant ed sa paran rezourd son problem. Ed sa zanfan kot sa lekol viv an pe an sekirite.

E dernyen lezot, sa problem ki ou'n koz lo la an relasyon avek Kod Kondwit, ou konnen i vre, sa Kod Kondwit i donn en nide zeneral ki mannyer bann keksoz i devret ete.

Me i vre i kapab annan bann keksoz spesifik. Par ler i annan serten bann blesir ki en zanfan petet pe kasyet. Lala kot nou demann bann paran pou vin kot lekol e koz avek sa ansenyan, ek ansenyan ouswa byen ki *Headteacher*.

Once ki ou'n koze ou'n eksplike akoz sa i koumsa, bann dimoun pou konpran. Be selman zot pa fer li, sa dimoun, sa bann zofisyel kot lekol pa pou konpran.

E la petet mon pe demann bann ansenyan, bann *Headteachers* osi kot lekol pou konpran bann paran, apres bann paran. Antre dan sa diskisyon. I enportan sa diskisyon.

I pa en keksoz anvoy zanfan sispann, pini. Nou anvi ki sa dyalog i vin en pratik normal. Me selman fodre zot koze, fodre zot diskite pou nou kapab bouz devan.

Donk Mr Speaker mwan mon annan en gran lespwar ki si nou met zefor ansanm. E la ki Lasanble Nasyonal pe ganny sans reflesir lo sa topik. E si sa topik i ganny byen

reflesir lo la parey nou ti ava swete, nou anvi ki *bullying* enn fwa pour tou i ganny redwir e eliminien kot lekol.

Akoz parey mon pe dir, en zanfan ki kit son lakour - en paran ki anvoy son zanfan lekol, i anvi son zanfan anpe. I napa letan pou li retournen pou li vin *deal* avek bann keksoz *bullying*.

Donk alor mon ti ava kontan sa enn fwa pou tou i ganny rezourd. Mersi Mr Speaker.

### **MR SPEAKER**

Mersi Minis. Nou ava termin la pou sa kestyon. Mon remersye Minis e son delegasyon pou zot partisipasyon. E mon ava envit zot fer zot depar, e bonn zournen.

Bann Manm zot a donn mwan en pti gin pasyans, mon annan ankor e size pou adrese. Minis ek delegasyon zot kapab fer depar.

Bon, i ankor en kestyon. Mon annan ankor lot kestyon. Onorab Gill ti apres mwan pou li demann en Kestyon Irzan e parey zot kapab realize mon pa kontan kestyon irzans. Sirtou bann ki son *emergency* pa tro evidan.

Me selman mon ti envit li anvoy en kestyon pou en *written answer* ki mon krwar Manm pa servi tro bokou. E i ti aksepte pou servi sa i ti adres Minis Finans. En kestyon ki mon pou lir;

*Request for payment of compensation:*

*Reference is made to your announcement during the 2023 Budget presentation in the National Assembly in December 2022, in relation with the provision for contingency, whereby you confirmed, that payment for compensation to the*

*residents residing next to the PUC Power Station in Baie Ste Anne district effective April, 2023.*

*The residents have come to my office enquiring, requesting on the status for the said payment, given that the time has elapsed, and this letter is requesting an update from your good office.*

E Minis Finans in avoy sa let kot Minis Lanvironnman, e Minis Lanvironnman in avoy mwan en repons ki mon pou lir e Onorab Gill i annan en kopi.

*Payment for compensation for the residents living by the PUC Power Station at Baie Ste Anne:*

*I acknowledge receipt of the letter dated May 17<sup>th</sup> from MNA Gill addressed to Minister Hassan, regarding payment for compensation for the residents living by the PUC Power Station at Baie Ste Anne Praslin.*

*The Minister for Finance did indicate in the budget speech in December 2022 that residents will be paid compensation this year.*

*I can confirm that work is continuing within Government to finalise the proposed compensation scheme, such that we can then proceed to make offers to those residents who have been affected.*

*Whilst it is regrettable that this work has not yet concluded, it is, as you will no doubt agree important that we get this exercise right. The team is currently finalising the proposals and ensuring that the necessary procedures are put in place, to allow for offers to be made to those residents who have been affected.*

*Although I cannot give you a specific date by which the work will be concluded, officials in Government*

*are progressing matters at pace and hope to be in a position to meet with the residents before the end of June 2023 to present compensation offers.*

*Thank you for your understanding.*

E in sinyen par Minister Flavien Joubert.

So, la i larepons Onorab Gill. E eskize Onorab Gill mon pa kapab pran siplemanter. Mersi.

Nou a termin la pou kestyon. Nou ava retrans Lasanble 2er 30 apre midi pou donn zot, zot letan poz. E Madanm Clerk kekfwa i ava mazinen pou notifye delegasyon pou sanzman letan.

Bon nou ava pran poz.

#### **(BREAK)**

#### **MR SPEAKER**

Bonn apre midi tou dimoun. Manm Onorab, zofisy e nou piblik. Nou a komans nou travay pour apre midi. Mon pour donn laparol Onorab Pillay pour adres en size ki konsern son Manm ki nou'n dakor. Onorab mon pa'n demand ou pour ekrir sa ki ou pour dir, me selman mon kont lo ou pour adres li mannyer nou'n dakor. Thank you. Onorab.

#### **HON SEBASTIEN PILLAY**

Mersi Mr Speaker e bonn apre midi tou koleg Onorab. Mr Speaker mon ti enform ou e mon ti montre ou en serten komanter ki'n ganny fer lo rezo sosyal, vizavi en Manm madanm lo mon kote.

E ou'n vvar e ou menm ou, ou'n kapab aksepte poudir sa bann komanter i vreman deplase. Sirtou i en komanter ki dirize ver madanm e mon ti a kontan osi demann Chairperson Caucus Madanm dan

Lasanble, pour zwenn avek mwan pour kondann sa bann kalite komanter.

In deza annan menm sityasyon kot komanter in ganny fer a en regar en lot Manm, e Lasanble ti pran en lapros pour kondann sa bann komanter. Mon pour demann ou apre midi - akoz sa bann komanter i en al ver bann lensilt personnel - e i kapab dekouraz bann fiy, bann madanm pour partisip dan politik akoz si zot vwar sa i kalite keksoz ki ganny dir lo zot.

Alors mon ti ava demann ou Mr Speaker, pour zwenn avek mwan pour kondann sa aksyon. Me mon ti a kontan al pli devan osi ki ou lyez avek bann lotorite konsernen, pour fer serten travay lenvestigasyon, pour asire ki sa bann komanter pa repete e ki dorenavan ki nou tou nou denons bann komanter parey ler i ganny fer.

Akoz i pa al dan lespri la demokrasi parey nou ti a kontan vwar li. Mersi.

### **MR SPEAKER**

Mersi Onorab. Mon siport ou dan sa kondannasyon ki ou'n avanse. Wi ou ti montre mwan sa post e mon'n vwar poudir i ti vreman pa akseptab. E mon krwar ou sizesyon ki mon pran li e anmenn li devan lotorite ki konsernen, pour demann zot si zot kapab pran aksyon.

Mon'n deza fer sa dan lepase, mon pa'n vreman ganny okenn rezulta. Me selman Lasanble i konnen poudir mon'n adres sa size dan lepase. E mon profit sa lokazyon pour repet mwan lapel personnel ki manm piblik e osi Manm Lasanble byensir. I obzerv sa ki prop, sa ki onnet e sa ki serye dan mannyer zot

adres zot bann komanter lo rezo sosyal. Onorab Esparon ou le fer en komanter lo la. Wi.

### **HON REGINA ESPARON**

Mersi Mr Speaker. An vi ki Onorab *LOTO* in mansyon mon non, koman *Caucus Madanm* pour kondann sa, me selman mon zis anvi met a son latansyon mon pa okouran kwa ki i pe koz lo la.

Petet met dan mon latansyon demen nou pou annan *meeting Caucus Madanm*, nou a pran li koman en *Caucus* en size nou a diskite e nou a fer en kondannasyon lo nivo *Caucus* antye. Mersi.

### **MR SPEAKER**

Tre byen Onorab Esparon. Mersi. Nou ava aprezan prosede avek en *Bill* ki lo nou *Order Paper*. Madanm rapporter i ava apel Vis-Prezidan ki pe vin travay avek nou lo sa *Bill*.

Bonn apre midi Vis- Prezidan Ahmed Afif e byenveni dan Lasanble avek Mr Frank Ally *Attorney General* pour nou konsiderasyon lo *Criminal Procedure Code (Amendment) Bill, 2023*. Vis-Prezidan nou a komans avek ou prezantasyon lo sa *Bill*. Oh! Eski mon'n mank - mon'n mank, mon'n mank en letap, evidaman se Mosyon pour *Second Reading*, nou lo *Second Reading* sa *Bill*. Onorab *Leader Business Gouvernman* ki pour fer sa?

### **HON BERNARD GEORGES**

Wi.

### **MR SPEAKER**

*Thank you. Nou'n pare.*

### **HON BERNARD GEORGES**

Mersi Mr Speaker. Bonn apre midi Mr Speaker, Vis-Prezidan, *Attorney General* tou bann koleg Manm Lasanble e tou dimoun ki pe swiv nou. Mr Speaker anba *Order 69(2)* nou *Standing Order*, mon move ki *the Criminal Procedure Code (Amendment) Bill, 2023* i ganny lir en Dezyenm Fwa. Mersi.

### **MR SPEAKER**

Mersi mon a ganny segonnman pour sa *Bill*. Onorab Arissol. Wi.

### **HON SANDY ARISSOL**

Mersi Mr Speaker bonn apre midi *VP* avek *AG*. Ankor enn fwa mon ti a kontan segonn Mosyon prezante par Onorab Georges Mr Speaker. Mersi.

### **MR SPEAKER**

Mersi. Bon *VP* prezan nou annord pour ekout ou en lentrodiksyon sa *Bill*.

### **THE VICE-PRESIDENT AHMED AFIF**

Mersi bokou Mr Speaker. Bonn apre midi Mr Speaker, *Leader of Government Business* e tou bann Manm dan Lasanble Nasional e tou Seselwa e tou dimoun a lekout.

Sa lamannman devan nou ozordi, i konsern sanz zis de mo, dan seksyon 295(1) Kod Penal. Sa de mo dan sa sou seksyon, se pour sanz term lanprizonnman pour sorti 6 mwan pour vin 2an. Permet mwan elabor en pe plis Mr Speaker.

Parey nou okouran kan en lakize, i ganny kondannen pour en lofans anba Kod Penal oubyen lezot Lalwa, Lakour i annan pouvwar koman pinisyon pour ordonn sa

kondannen pour pey en lanmann. Setadir en sonm larzan.

Sa lanmann kapab annan adisyon okenn santans lanprizonnman. Dan ka kot Lakour i enpoz en lanmann e sa kondannen pa pey sa lanmann, dapre Lord Lakour - anba Seksyon 295(1) ozordi. Ziz i kapab ordonnen ki sa kondannen i ganny anprizonnen pour pa plis ki 6 mwan.

Sa Lalwa ti ganny pase an 1964, e sa letan bann lanmann ti relativman ba, an konparezon avek sereten bann lanmann ozordi. Avek letan, bokou novo lofans in ganny kree anba diferan Lalwa, e bokou sa bann lofans zot lanmann i reprezent bann sonm ki tre o. I osi i annan bann lofans ki zot sonm in ganny ogmante. Nou vvar sa dan logmantasyon atraver *Misuse of Drugs Act, 2016* ki annan lanmann ziskan R1milyon

*Prohibition of Trafficking in Persons Act 2014* lanmann ziska R800mil, *Anti-Money Laundering and Countering the Financing of Terrorism Act, 2020* lanmann ziska R5milyon. *Fisheries Act* ki annan lanmann ziska R3milyon.

E kot nou vvar ki bann sa bann lanmann ki'n ganny prewvar, i an de santenn mil Roupi e menm milyon.

Mr Speaker malgre tou sa bann logmantasyon dan lanmann pandan sa peryod, sa penaltı 6 mwan prizon si ou pa peye anba Seksyon 295(1) ki date depi 1964 li in reste parey. Ki sa i fer alors, ler Lakour i ordonn en kondannen pour pey en gro sonm larzan koman lanmann, i annan kondannen ki revize peye

akoz i prefer fer 6mwan prizon e debaras li ek sa gro lanmann.

An fet nou'n vwar sa resaman dan bann *case* drog, e trafik imen e detrwa *case* lapes ilegal, kot bann kondannen i refize pey lanmann e plito servi en peryod lanprizonnman ziska 6mwan.

Vi ki sa peryod lanprizonnman i tre kourt par rapor avek bann lanmann ozordi, nou, nou pe propoze amann sa Lalwa pour ogmant sa peryod sorti 6mwan prizon pour vin 2an prizon.

Vwala Mr Speaker, mon alor demann Lasanble pour vot an faver sa Prozedlwa. Mersi bokou.

### **MR SPEAKER**

Mersi. Mon ava apel bann Manm pour zot entervansyon dan deba lo sa *Bill*. Sa en *Bill* tre, tre spesifik. Donk i pour vreman teste zot pour zot reste lo size sa *Bill*. Onorab Naidu.

### **HON SATHYA NAIDU**

Bonn apre midi Mr Speaker. Bonn apre midi *VP* ek *AG* e tou koleg Onorab. Parey *VP* in fer resorti pli boner, de pti mo ki pe sanze, selman konsekans ki atase avek i enn ki serye.

E byensir ozordi direksyon ki pe ale vizavi bann Lalwa ki'n sanze kot bann lanmann i pli o, fodre ki nou kapab fer sir ki santans ki mars ansanm, ler en endividé i ganny trouve koupab e pa pe pran son responsabilite ki kalite konsekans ki atase avek.

I paret baze lo leksplikasyon ki'n ganny rann, serten dimoun ler zot ganny trouve koupab, anba en serten Lalwa, i trouv li pli profitab

pour pas anler Montagne Posee dan plas pran zot responsabilite.

E an menm tan konmela sa ki mon'n remarke atraver plizyer zizman, ler en Ziz pe pronons li lo en ka, i osi donn sa endividé ki'n ganny trouve koupab bann diferan mwayen pour kapab pey son lanmann koman bann *instalment* sak fwa i annan en revi.

So i annan fleksibilite dan en tel lenstans, e malgre sa si i annan endividé ki pa pe pran zot responsabilite, i vin en pwen konsern espesyalman pour sa viktima. E alors ozordi, i kler ki nou bezwen fer met devan bann santans ki pli server pour bann *non-payment of bann fines* e byensir, bi en lanmann i varye pour diferan rezon, tel ki pey domaz en endividé, ouswa menm konn propriete ki'n ganny andomaze, ouswa senpleman en form pinisyon.

Alors bann lanmann i la pour deservi en fonksyon signifikan, pour protez striktir sosyal nou soryete pour kapab anpes lezot dimoun komet en lofans e an menm tan kree en serten lafreyer ki sak aksyon i annan son konsekans.

E ler ou pa pe pran ou responsabilite ou kapab fer fas avek en dirasyon letan an prizon ki pli serye e byensir 2an, i enn ki klerman enn ki met devan en pwen de refleksyon - ou kapab dir pour sa dimoun ki'n komet sa lofans mazin byen e pour li kapab pran responsabilite.

Alors i kler ki sa *Bill* pe met en pe disiplin avek nou bann dimoun, ki parfwa zot pa pe obeir Lalwa parey zot merite. Alors mon pour siport sa *Bill*. Mersi Mr Speaker.

**MR SPEAKER**

Mersi Onorab Naidu. Wi Onorab Loze.

**HON JOHAN LOZE**

Mersi Mr Speaker. Mr Speaker parey ki'n ganny dir, lamannman i zis de pti mo dan Lalwa. Me selman mwan sa ki mon ti a kontan met an konteks se ki mon en Lezislater e koman en Lezislater mon bezwen koz lo en Lalwa *whether for or against* dan konteks, sa ki pe deroule dan sisyete Sesel ozordi.

Mon pa kapab divors Lalwa ki pe pase devan Lasanble Nasional, avek sisyete Sesel. So mon koze, i bezwen kapab ankadre, *encapsulate* tou sa bann keksoz.

Mr Speaker Lalwa parey in ganny prezante e etale par Vis-Prezidan, e prezantasyon ki'n ganny fer par Onorab Sathya Naidu, mon koleg *Bills Committee*, i parfetman lozik, fer sans e i annakor avek bann valer en sisyete normal. E mwan, mon napa problemm avek nanryen ki'n ganny dir. E tre byen, *on the surface*.

Vis-Prezidan in etal bann keksoz ki AG ti deplase li menm personnelman, vin eksplik nou dan *Bills Committee* e pour sa nou remersi AG osi, in dedye son letan. E lo sirfas sa bann keksoz napa nanryen pour ou propoze, napa nanryen pour ou al kont.

Be selman mwan, mon annan serten *issues* avek ladministrasyon Mr Speaker e mon krwar ou konn tre byen. Mon'n fer sorti e mon'n fer kler dan lepase ki *there is mistrust*, mon pa fye zot mwan. Mon pa fye zot en sou! E ozordi pour sa ladministrasyon vini demann mwan

pouvwar, demann mwan ankor plis pouvwar. Uh... Non! Sa i mwan personnelman Johan Loze. Non, Mr Speaker.

Ou konnen ozordi nou vvar nou dan en sityasyon kot i annan bokou rakontre zistwar dan nou pei, e i annan bann *forums going around* kot dimoun i zis i akont zistwar.

Ozordi nou akont en zistwar lo tir pei lo *blacklist*. Travay ki pe ganny fer pour tir pei, tir Sesel lo *blacklist*, be dimoun pa met Seselwa dan konteks ki kontribusyon ki zot, zot in annan pour met pei lo *blacklist*. Bann Lalwa ki zot, zot in amande pour rezon koripsyon, ki'n ede pouse pour met pei lo *blacklist*.

Zot pa eksplike bann *threats* ki zot, zot ti fer ler kanmarad ti dir zot be non mon poudir Prezidan Faure pa bezwen *assent* sa enn Lalwa, sa bann dimoun ki pe eksplik sa bann zafer *blacklist* ozordi, pa vini devan poudir Seselwa. Be mon *at the time* ler ti dir pa *assent* mon ti dir "kot Prezidan Faure pour ale ek son bann Lalwa, dir li pa *assent* apre i vin la ankor devan nou ek son bann Lalwa"!

So mwan personnelman mon tre, tre mefyan pour donn pouvwar en group dimoun ki kapab en zour komet en akt de koripsyon ofisyal dan zot sez, par zot lofis, e pouvwar ki'n ganny *vested* dan zot lanmen. Apre demen sa bann dimoun i asize i dir ou be zot pe lite pour zot netway sa, be zot menm ki ti fer. Zot ki ti fer, zot ki'n kontribye pour fer sa koumsa. Me ozordi zot Sen. Prezan la zot vin ankor zot demann mwan pouvwar. Mon mefyans Mr Speaker.

Mon met sa devan ou. Ozordi bann *conteur* zistwar, zot vini zot dir

ou koumsa, la nou'n ale nou'n ratrape drog nou'n anmenn ater. Lotrozour ler nou ti ale, zansla ti ganny sans zete nou pa ti gannyen. Apre kestyon ti demann mwan oli drog.

Mr Speaker me sa bann dimoun i dir bann keksoz koumsa, kan Komisyoner Lapolis ti vin la anndan dan Lasanble ti dir nou drog Franse ki ti atrape, e Franse ki ti zete akoz sa ti Polisi Franse.

Prezan *these are the people who wants more power!* Zot le mwan vote donn zot ankor pouvwar la. Kan en senp lasezi drog, zot akont nou 4 diferan zistwar. Enn i ganny dir ek nou dan Lasanble lot i ganny dir dan *meeting piblik* Mr Speaker.

E zot le mwan lev mon lanmen donn zot ankor pouvwar. E sa i bann konteks keksoz ki pe arive dan nou pei ozordi ki fer mwan Johan Loze mefyan. Mon napa *issues personnel* kont personn mwan. Be selman letan mon get fason ki en keksoz parey sekirite pei. Pran sekirite pei Mr Speaker. Lekel ki ekspekte ki lenformasyon sekirite Leta Sesel i sorti piblikman dan en *meeting piblik*. Be i sorti, i sorti e la ozordi zot demann mwan pouvwar.

Ou konnen Mr Speaker ti napa en *dealer* drog ki ti konnen poudir *Travizory* i ganny servi pour *track* mouvman *drug dealers*. Be depi *meeting* Glacis tou *drug dealers* i konnen poudir *Travizory* i en lenstriman sekirite Nasyonal Sesel ki pe ganny servi pour *track* mouvman *drug dealers*.

In sorti dan en *meeting piblik and these are the people* ki le mwan mon fer zot konfyans ek plis pouvwar. Apre zot asize, devan en

lasal plen ek dimoun *on live television* zot koz lo mekanizm sekirite pei.

### **MR SPEAKER**

Onorab...

### **HON JOHAN LOZE**

Further lo sekirite pei Mr Speaker si ou a permet mwan.

### **MR SPEAKER**

Ok. Ou pe al lo, ou pe al lo *Bill*?

### **HON JOHAN LOZE**

Yes Mr Speaker. Mon pe met an konteks *Bill*.

### **MR SPEAKER**

Wi.

### **HON JOHAN LOZE**

Akoz mon annan en desizyon pour mwan pran e ki sa *constituency United Seychelles* la deor i bezwen konnen la akoz mon vot dan fason ki mon vote. Mon bezwen donn en leksplikasyon. Zis parey *VP* in donn en zoli pti leksplikasyon.

Mr Speaker lo sa konteks sekirite pei la. Ou konnen nou'n ganny dir poudir *Travizory* i nou *border control* e sa bann dimoun ki le pouvwar ek mwan in ganny dir *border control*. Mon prezimen ler zot dir mwan *border control* sa platform i pour *border control* mon prezimen, nou pe koz lo Imigrasyon.

En nenport *sane, normal person* poudir be Imigrasyon. Mr Speaker be Imigrasyon li eski i fer lentelizans li? Imigrasyon i fer analiz lekel ki enport drog, lekel ki pa enport drog li? Be i pa son louvraz sa. Be prezan mwan koman en Seselwa azen, *sane*. Mon poz mon lekor en

kestyon be lekel ki zot pe donn lenformasyon Seselwa ankor?

*Travizory i en lenstriman border control ki tonm anba Imigrasyon be avek ki ankor nou lenformasyon pe ale? Lekel ki pe fer sa bann analiz? Question that needs to be asked.* Sirtou avek bann dimoun ki vini i demann mwan tanzantan zot vini zot demann mwan pou vwar.

Be sa bann zafer amann Lalwa, donn zot pouvwar in fer ki ozordi nou annan dimoun pe asize an detansyon *at the President pleasure.* Ni en sarz napa lo li. 18mwan mon zanmi Leslie Benoiton i anndan, *at the Presidents pleasure back to 1978* letan parti inik. E in vin rezulta ...

#### **MR SPEAKER**

Eski ou pe koz...

#### **HON JOHAN LOZE**

Yes Mr Speaker.

#### **MR SPEAKER**

Eski ou pe koz lo en ka ki anba Lakour.

#### **HON JOHAN LOZE**

Mon pe koz lo mon zanmi! Mon pe koz lo mon zanmi *de longue date.*

#### **MR SPEAKER**

Non! Non! Zanmi napa nanryen pou fer avek sa. Zanmi, pa zanmi ou pa kapab koz lo en ka ki napa...

#### **HON JOHAN LOZE**

Napa ka - ka i vin ek sarz. Napa sarz, napa ka devan Lakour, napa *subjudice* la...

#### **MR SPEAKER**

Ok. Onorab! Onorab! ou pe vreman teste nou prosedir.

#### **HON JOHAN LOZE**

Non-Mr Speaker!

#### **MR SPEAKER**

Ou pa pe koz lo *Bill*. Silvouple, silvouple swa ou adres *Bill*, ou'n fer ou leksplikasyon. Silvouple adres *Bill*, oubyen terminen. Mon *micro* i en pe lwen. Mersi. Selman mon krwar ou'n tann mwan. Ok.

#### **HON JOHAN LOZE**

Non mon'n tann ou Mr Speaker. Mwan pour mwan *its obvious* ki direksyon pei avek direksyon LDS pa anvi mon koze. *This much is clear* Mr Speaker. Pour mwan i pa, i pa en *issue* mon konpran zot mwan. E mon ofet mon menm senpatiz avek zot, bann pozisyon ki mwan mon met zot ladan.

Selman ou bezwen rekonnet osi Mr Speaker, mon pa koz osi kantite lanbara ki mon ti kapab koze anver zot ki mon klerman kapab. Akoz la boner par egzamp mon'n koz lo tir pei lo *blacklist*, sa ki'n koz sa problem pe asize la devan nou li, mon pa'n al laba. Be selman mon kapab fer sa bann keksoz.

*But Mr Speaker parey mon pe dir zot, an rezulta bann Lalwa ki zot anmenn devan nou, ki pe sers plis pouvwar avek nou pour konsantre pouvwar dan lanmen Leta. I ariv sa bann pti derapaz ki mon pe dir la. I ariv sityasyon kot ozordi Seselwa ki ranpli *Travizory* pa konnen kote son lenformasyon pe ale.*

I ariv sityasyon kot mwan mon annan mwan en zanmi 18mwan i anndan san en sarz lo li. I ariv sa

bann keksoz koumsa atraver konsantrasyon pouvwar dan zot lanmen e zot kontinyen vin demande pour konsantre pouvwar dan zot lanmen.

*Now, mwan mon en dimoun tre mefyan, en pe letan mon pe dir zot. I annan en bon Lalwa ki zot in vin avek ki mon'n trankil lo la mwan. Mon'n vvar ki direksyon pe ale, mon'n vvar derapaz kot pe vini be selman ou bezwen donn benefit du doute.*

I ariv en moman kot ou dir ase. *Enough is enough!* Nou pa pe al dan sa direksyon, nou pa pe zwe sa bann zwe ankor. E mwan mon en dimoun fran e onnet, mon koz for, mon fer mon santiman tande, mon pas li tre kler pour tou dimoun konpran.

Mon krwar mon'n adres la sityasyon dan en fason poli, dan en fason kler, dan Kreol senp ki tou dimoun i a kapab konpran. Mon pa'n atak personn, e mon pa'n koz nwizans pour personn. Mersi Mr Speaker.

### **MR SPEAKER**

Mersi. Mersi Onorab. Rezon akoz nou ensiste ki Manm i reste lo *Bill*, se akoz si en Manm i komans lo bann keksoz ki an deor *Bill* konpletman, nou pour ganny lezot Manm ki pour reponn li e deba i fini derape. So mon fer en lapel. I pa - kekfwa dimoun pe rode be ki Speaker i fer dan sa ka.

I pa en ka pour mwan met Onorab deor akoz in pa'n koz lo *Bill*, oubyen pour pran okenn lot soz lo la. Me selman i zis en lapel ki annou pran sa serye e annou sey fer dapre lareg nou Lasanble i dir nou devret

fer. Mon prosen entervenan i Onorab Cosgrow.

### **HON WALLACE COSGROW**

Mersi Mr Speaker. Bonn apre midi Mr Speaker. Bonn apre midi VP, AG ek tou Manm Onorab e manm piblik ki pe ekoute.

Mr Speaker mon kapab konpran mon koleg Onorab Loze ler i fer sa bann lentervansyon ki i fer, akoz nou isi lo sa kote latab nou parey ou'n dir, nou annan en kantite mefyans ler i annan serten bann Lalwa ki prezante devan Lasanble Nasional. E mefyans serten lentansyon par deryer Lalwa e Onorab Loze in donn en kantite legzanp ki mwan mon pa bezwen antre ladan.

Mon krwar in donn en kantite legzanp kot nou vvar ki en serten moman Gouvernman i donn or i vin avek en serten Lalwa. Me ki par deryer ou annan rezon pour krwar ki sa ki i pe sey fer ozordi i pour annan lezot reperkisyon pli tar avek bann lezot keksoz.

*Bill* Mr Speaker i paret senp i enn ki paret senp parey in ganny dir i annan zis de trwa pti sanzman. E mwan pour mwan mon konsernen akoz pa ki sa *Bill* petet napa merit pour vin dan Lasanble. Me mon konsernen avek lefe ki ozordi i annan kantite *pressing issues* dan sa pei, en kantite keksoz ki merit ganny met dan Lezislasyon, kantite keksoz ki bezwen ganny *deal* avek.

Mon konsernen avek nimero enn azanda Lezislativ Gouvernman. Mon konsernen akoz mon pa pour al dan bann detay, me solman mon krwar nou ti kapab fer bokou pli byen adres bokou lezot keksoz, bann

*pressing issues* ki ozordi Seselwa pe fer fas avek. E ki Seselwa pe vwar toulezour.

Mr Speaker toulezour nou asiz dan nou salon, e nou pe vwar bann *summary* lo bann *meeting* piblik ozordi ki pe ganny pase e kot Seselwa pe konplent lo en kantite keksoz dan sa pei.

I annan nesesite pour nou revwar serten lafason fer, serten Lalwa ki ozordi, malerezman mon pa pe vwar Gouvernman met latansyon lo sa bann *issues* ki pour adres keksoz ki tous vreman tous pep Seselwa.

E Mr Speaker parey mon'n dir mon krwar parfwa ler nou get sa bann Lalwa, nou get li souvandfwa avek en lizye, en kote lizye, me nou pa get li dan son totalite e nou pa get son lenpak ki pour annan lo pep Seselwa.

Mon annan trwa keksoz mon le koz lo la an zeneral ozordi ler mon adres sa Lalwa. Enn - nimero enn i si nou asize nou get, petet an 2022 ti annan en kantite bann Lalwa ki ti sanze sirtou relasyon avek par egzanp bann *fines* trafik ki ti ogmante.

E nou konnen mazorite sa bann dimoun ki pey sa bann *fines* sa bann dimoun ki pe *go about their daily business*, mon pa donn, mon pa pe zistifye ki zot pe kas Lalwa, me i arive dimoun i ganny *fine*. E mazorite zot, zot pa bann dimoun ki annan larzan, ki ris e petet souvandfwa zot vwar tonm dan en sityasyon kot zot, i difisil pour zot la pey sa bann *fine* akoz *fine* ogmante.

So parfwa zot vwar zot difisil e menm i annan dimoun, mwan mon'n ganny dimoun ki apres mwan i dir

mwan frer ed mwan sansan mon pou al dan prizon.

So mon konpran i pa - zot pa neseserman zot pa devret pe kas Lalwa. Me i arive dan en sisyete i arive, pa tou dimoun ki parfe, fot i arive e keksoz i ganny fer. E ler nou pe get sa Lalwa Mr Speaker mazorite bann lanmann ozordi i pour bann *minor offences*, mazorite en kantite bann lanmann ki ganny peye devan Lakour i pour bann *minor offences*. En bon pe relye avek trafik e bann lezot pti lofans par isi, par la.

E ti ava enteresan e ozordi *VP* dan son prezantasyon mon krwar in vini in fer en sitan senp. Ti ava enteresan pour nou vwar e *VP* ti ava donn nou statistik par egzanp lo sa bann gro lanmann ki in dir. Kantite ka ki vin devan Biro *Attorney Zeneral*, ki vin devan Lakour, ki zistifye ozordi apre midi letan Lasanble Nasyonal pour nou diskit lo en lamannman *Criminal Procedure Code*, pour amann de sa pour bouz kantite letan ki en dimoun i kapab ganny anprizonnen.

So ler nou pe gete si nou pe get mazorite bann ka ki vini se bann pti ka, bann dimoun ki'n fer bann lofans trafik. I annan la ki pe ganny pourswiv pour bann lofans petet pa met mask letan *COVID*. I annan ki pe komans al Ankour la, i nana ki pe komans ganny zizman.

E sa bann dimoun ozordi zot pe vwar zot avek sa novo Lalwa ki sanze, zot pe vwar zot en sityasyon kot possibleman zot kapab mont en pe letan prizon. Si zot pa kapab pey sa bann *fine*.

E i annan bann *fine* ki ase konsiderab. Ti ava normal si *VP* ti kapab dir nou, an term statistik

konbyen ka trafik imen, konbyen ka *illegal fishing* ki dimoun in opte pour al dan prizon e pa pey zot *fines*. E dayer *VP* in dir in koz lo lofans drog, me mwan mon ti krwar lofans drog i ganny adrese anba *Misuse of Drugs Act* e pa - i ganny adrese separeman. Petet *VP* i ava klarifye taler si sa i pas dan bann *fines*, en sel dan bann *fine*.

Mon dezyenm pwen ki mon ti a i kontan koz lo la Mr Speaker e sa se pwen - lefe e mwan mon ti lev sa pwen dan *Bill Committee* mwan en. Koman en Manm *Bills Committee* mon ti lev sa size, lefe ki sa *increase from 6 mwan pour 12mwan*, pour 2an, 24 mwan napa en, napa serten gidans pour Zidisyer.

Ozordi sa Ziz i ganny li en *freedom* pour li deside lo ki santans i pour pas lo sa dimoun. Avan i ti limite pour 6mwan e i ti kapab zwe *within 6 mwan*. La i *open*, i kapab demen bomaten deside ki santans i pour pase.

E definitivman, Ziz *x, y* ouswa z si zot napa en gidans ki mannyer zot pour pas santans. I a kapab ozordi en dimoun avek *similar* lofans, vi ki napa neseserman presedans, *similar* lofans sa dimoun i kapab vwar li pe ganny pini petet enn pti pe tro sever, anvi ki napa gidans.

E mon - ti enn bann kestyion ki mon ti koz lo la. Mon ti a kontan ki i annan en gidans *initially* pour kapab etablis serten standar lo ki mannyer Ziz i pas sa santans.

Me nou'n ganny dir ki poudir i pa neseser, Ziz i annan zot bann fason ki zot sa. Me mwan mon konsernen ki pour napa en liniformite o komansman *at least* dan bann santans.

E mon trwazyenm pwen Mr Speaker, i enn pti pe relye avek mon premye pwen. E sa i annan pou fer avek - ou konnen toulstan Lalwa enn ler konmsi ou a krwar i ganny fer pour pini bann dimoun ki enn pti pe mwen fortinen, ouswa - akoz *the bulk of* sa bann, sa bann *fines*, sa bann zafer tou kou i bann pti *fines*, kot bokou plis dimoun i gannyen. Si ou al Lakour, toulezour ou vwar kantite bann *fines* dimoun i vin peye.

So i plizoumwen bann pti lofans. E tou kou ou a krwar zot pe kontinyen. Sa Gouvernman i tou kou ou a krwar pe kontinyen pe met plis presyon lo bann dimoun ki pa neseserman annan dimoun ki pe viv zot lavi, bann dimoun ki pe ki nou apel sa bann *middle class* ki pe viv zot lavi *day to day*, zot pe *struggle* avek ozordi kou lavi, zot pe *struggle* ek bann diferan problemm ki Gouvernman pa pe kapab *deal* avek.

Zot annan zot prop fristrasyon lavi, enn ler zot sey vin larg sa dan *meeting* piblik, zot ganny dir nou pour *sort out* ou problemm, pas la deor Minis i ava vwar ou lot, lot, lot.

Konmsi dimoun i annan en pake problemm deor. Akfer konmsi nou ti bezwen al antre dan tousala e pour kontinyen pini bann dimoun ki malerezman zot pa neseserman pli fortinen dan sa sisyete.

So Mr Speaker mwan mon santi, mon pa pe dir napa en merit. Be mwan mon santi poudir ozordi mannyer Lalwa ti ete, i ti napa gran nesesite. Me zot in vwar nesesite pour sanze, mon pa konnen si zot annan serten dimoun petet ki zot pe targete, ouswa si zot annan serten motif pli tar par deryer sa. Kot si ozordi mon pa kapab kondann ou,

mon ava *slap* en *fine* lo ou, mon a met ou dan prizon pour 2an, ma tenir ou touzour apre ma gete ki mannyer mon *deal* avek ou pli tar.

So tou sa eleman *mistrust* Mr Speaker pour mwan i fer li difisil pour mwan kapab ozordi vot lo sa Lalwa e mon pa konfortab. Mon pa krwar ki a sa pwen nou ti merit tousala.

So avek sa de mo Mr Speaker, mon a *I rest my case* la. E mon ava *allow* lezot Manm osi pou fer zot kontribisyon lo sa Lalwa. Mersi.

### **MR SPEAKER**

Mersi. Mersi Onorab Cosgrow. E prosen se Onorab Herminie.

### **HON WILBERT HERMINIE**

Bonn apre midi Mr Speaker. bonn apre midi VP avek AG. Bonn apre midi tou koleg Onorab. Mr Speaker mon anvi zis kontiny en pe, kot Onorab Cosgrow in kite. Ler mon ti pe lir sa Lalwa premye keksoz ki in vin dan mon lespri, mon'n kontan sa prezantasyon ki VP in fer, in donn nou an detay lo en kote, lo kote drog sa nou pa kapab defann sa, mon toutafe dakor.

Me solman i pa'n al an detay lo bann *misdemeanors* bann pti, pti bann pli pti lofans. Ki mannyer gidans, Ziz pour ganny gidans pour ler i pe pas santans lo sa bann sarz parey en dimoun ki'n met son *tint*, ouswa en dimoun ki pa'n met son *seat belt or parking ticket*. Konmsi mon vvar li en pe ouver pour sa lofans avek son santans i en pe *hefty* parey nou dir.

So mon ti a kontan VP i al enn pti pe plis dan detay lo sa kote, pour donn nou en pe plis leksplikasyon

pour nou konpran ki lentansyon deryer. Akoz ler i annan de pti sanzman dan mo, nou pa tro konpran lentansyon par deryer sa, nou anvi konpran li tre byen konmsi. Akoz ler nou pe lir sa nou annan dimoun ki pe *text* nou, pe demann nou be sa ki mannyer pour afekte nou dan sa fason?

Akoz nou tou nou kapab fer en lofans *parking*, nou'n sot en kou farmasi nou'n rod - ler nou vini nou'n ganny en *fine*. Prezan sa *case* in arriv devan. So mon ti a kontan en pe plis leksplikasyon dan sa bann direksyon ki mannyer, ki mannyer sa - ki gidans pour annan. Akoz nou pa anvi pa pey en *parking ticket* pour ou kondann 2an prizon. I enn pti pe, i enn pti pe for.

Si mon mal ou a koriz mwan VP, mon zis pe fer mon lentervansyon pe demann ou kestyon ki pe monte pour ou fer leklersisman senp ki sa. Akoz parey mon koleg in dir, nou en pe mefyan akoz bokou keksoz ki'n dir nou'n koz lo limite selman zot dir koumsa US ki pe trenn lipye dan lanplwa.

Konmsi tousala i fer nou, i met serten lenkyetid dan nou lespri. Zis parey semenn pase, zot ti dir mwan deryer rido ki pour *attend meeting* me selman dan Lasanble ler nou vini nou koz lo en lot topik. Ou konpran? Sa bann sityasyon i fer mefyans lo kote US.

Zot koz en parol dan Lasanble epi deryer rido zot *call*, zot *apologies*. Ou ganny en konpran so nou, klersi nou byen. Klersi nou byen VP. Klersi nou, met keksoz an konteks pour nou kapab, pour nou kapab, pour nou kapab pran en desizyon

enformen lo sa Mosyon, sa Prozedlwa. Mersi Mr Speaker.

### **MR SPEAKER**

Mersi Onorab. Onorab Sebastien Pillay.

### **HON SEBASTIEN PILLAY**

Mersi Mr Speaker. Bonn apre midi. Bonn apre midi VP avek *Attorney Zeneral* e bonn apre midi tou koleg Onorab. Mr Speaker ler nou ti zwenn koman en *Caucus* pour diskit sa Lalwa. Nou ti divize, lo bann Manm ki annan serten mefyans, e lo bann Manm ki si oule ti ankor *on the fence*, pa tro sir e pe esper VP fer son prezantasyon.

E mwan mon ti parmi enn bann Manm ki ti annan serten konsern, sa size mefyans i toulstan la Mr Speaker. Akoz si i annan en keksoz ki mon vwar petet ki'n ilistre sa pli byen se sa bann *meeting* piblik, kot ou tann dir en keksoz me apre i en lot keksoz, i en lot realite konpletman.

E resaman menm VP par egzanp ti vin lo televizyon ti dir nou an relasyon avek sanzman dan mezir ki zot ti vin devan Lasamble ki nou ti aprouve R25, R50, R75 pour bann etablisman ki ou ti'n fer konsiltasyon.

Me lo SBC yer swar nou tande poudir tou sa lotel ki zot in koz avek, ti annan menm lopinyon an relasyon ek lenplimantasyon sa Lalwa. Ou ti dir sa ler ou ti koz lo *Cabinet* e ou ti ganny en - ou ti ganny en - ti en *press conference* ki ou ti pe fer avek bann zournalist.

Rezon mon pe dir ou sa akoz i dan konteks ki sa Lalwa pe pase. E sa i en legzanp tanzib akoz ou, ou ti

dir sa e yer swar ler mon ti swiv Nouvel mon'n en pe soke. Akoz ou, ou ti dir poudir zot ti'n diskite avek bann letablisman. Me SBC i dir tou letablisman ki'n kontakte, 21 an tou. Tou sa bann dimoun ti refize koz ek zot e sa dayer i devret en keksoz ki konsern Gouvernman, dimoun pa le vin devan pour koze.

Be selman zot tou *off the record* zot ti eksprim menm lopinyon. I pa mon parol, i parol zournalist, i parol tou sa ki ti pas dan Nouvel.

Mon pa pe koz lo *whether* en keksoz ki'n pas dan Nouvel i vre, mon pa konnen prezan si nou poudir sa ki SBC in dir i vre oubyen pa vre. Me selman i enteresan ki ou, ou ti dir poudir ou'n fer konsiltasyon. E mwan pour mwan se sa ki pe *raise* en serten konsern.

E ler ou'n komans koze, mon pe ekout ou e mon'n dakor ek ou lo komansman. Akoz sa Lalwa in la en pe letan, i bezwen ganny sanze akoz byensir i bezwen annan evolisyon dan Lalwa.

Me *as soon* ki ou entrodwir sa eleman drog dan sa Lalwa. Mon demann mon lekor be akoz ou pour entrodwir eleman drog dan sa Lalwa, akoz en lofans drog si i en lofans serye pour drog, sa dimoun pour ganny kondannen anba *Misuse of Drugs Act*.

E la son bann lofans pour en dimoun ki'n trafik drog, tou dimoun in vwar son lofans i pa 2an prizon. Son kondannasyon i bokou plis, so mon'n vreman pa ganny en konpran akoz ou'n sey zistifye sa Lalwa.

Mon ti a konpran si ou ti a'n servi zistikasyon par egzanp sa *case* ki ti pas Ankour an, *around* lannen 2000. E kot ti annan en *case* ki ti

konsern en sityasyon *illegal fishing*, kot en dimoun ti ganny sarze pour R250mil or 6 months imprisonment.

Mon ti a konpran si ou'n servi sa ka. E lo sa kote mon dakor. Be ler ou, ou entrodwir en lot eleman ki konsern en lofans ki li i deza pe ganny pini anba en lot Lalwa ki bokou pli sever. *Either ou -mon pa pe dir ou fer sa - either ou pa'n pran sa o serye ou menm, ler ou'n prezant li devan Lasanble, ou'n zis dir poudir be i en senp Lalwa Lasanble i pase i fini, ou annan en mazorite or ou'n entansyonnelman anvi fer referans ek sa Lalwa, avek sa lofans drog.*

E mwan mon konsernen avek sa. I montre serten move -mon pa pe, ankor enn fwa mon pa pe *impute improper motive*. Be i montre - i fer mon demann, i kestyonn ou lentansyon. Konpran? Akoz Mr Speaker mwan en keksoz ki mon konsernen avek se ki mon vwar ki pandan sa bann dernyen mwan, Gouvernman i go back lo bokou keksoz ki'n ganny diskite avek Lasanble, san ki Lasanble i ganny sans pour repran sa bann keksoz.

Petet ou a permet mwan pour ilistre mon konteks byen, ankoz sa i al ver prensip e merit sa Lalwa dan konteks ki pe pase. Lasanble nou aprouv Bidze avek son bann Polisi. Nou ki aprouve, nou aprouv li ek sa bann Polisi e nou aprouv li avek bann mezir e bann prononsman ki ladan.

Me selman Gouvernman i vire e sanz bokou sa bann mezir komansman lannen 2023, without menm ki i annan swa en statement, swa okenn prononsman Gouvernman ki pour retourne devan Lasanble, pour li eksplike ankoz i pe sanz sa bann keksoz.

E sa i raise en konsern lo mon par ankoz mon santi poudir eski alor Gouvernman i santi ankoz i annan en mazorite absoli, i kapab fer sa ki i anvi avek Lasanble? E i en konsern serye ankoz si nou pa adres sa, *then mwan mon krwar Gouvernman pe mank respe, L'Egzekitiv pe mank respe pour Lasanble Nasyonal dan lafason ki i pe fer sa bann keksoz.*

E i zis vin bann *statement*, bann *blanket statement* ki ganny dir e ki apre nou vwar poudir keksoz i ganny fer diferaman.

En lot legzanp kardinal Mr Speaker, Lasanble in bezwen pran en langazman atraver ou ankor enn fwa mon demann ou lendilzans pour mwan eksplik sa pwen. In donn en langazman, in bezwen pran en langazman ek Gouvernman ki tou dimoun pour travay dapre en *performance system* dan Gouvernman. Tou dimoun.

Me dan bann *meeting* piblik, bann Minis pe ganny demande pour pran bann *case* dan sa bann *meeting* piblik. Me selman, bann dimoun ki'n f ini ekrir oubyen telefonnen, zot bann *case* pa pe ganny pran. E still nou, nou Lasanble nou les sa pase e nou pour Ziz tou travayer lo zot *performance appraisal*, apre sa e nou pour aksepte sa i ganny fer.

Mon krwar i bezwen annan en fason fer, e ler mon pe get sa fason fer premyerman an relasyon avek leksplikasyon ki nou pe gannyen ek sa Lalwa mon pa santi ki nou pe fer zistik ki mannyer Lasanble pe ganny eksplike, ankoz Gouvernman i le anmenn sa sanzman ki zot le pe anmennen. Lekel *mischief*, lekel keksoz ki mal ki Gouvernman i

bezwen korize atraver sa Lalwa? Sa i premye pwen kardinal.

Dezyenm pwen se popilasyon prizon. Mr Speaker dapre tou dokiman e dapre tou largiman ki nou'n gannyen koman en pei otour prizon, i se ki popilasyon prizon i deza tro o.

En Lalwa ki fer ki ou al plis letan dan prizon pour pa pey en *fine, means* ki ou kit en dimoun pour plis letan dan prizon. E *therefore*, konsekans direk, se ki ou pe ogmant ankor popilasyon prizon.

So kestyon ki mon demann mon lekor, se eski Gouvernman in pran an konsiderasyon sa ramifikasyon sanzman dan sa Lalwa? E mon ti ava'n apresye si Vis-Prezidan ti ava dir nou, si ti annan en prezantasyon detaye e prepare pour konsider bann diferan laspe sa size, ti ava'n montre nou ki mannyer sa pour enfliyans oubyen afekte lakantite dimoun, oubyen pour nou met plis dimoun dan prizon e ogmant popilasyon prizon, e ogmant depans ki Gouvernman i bezwen fer pour soutenir en popilasyon prizon dan en pe plis letan.

Parey mon'n dir mon konpran nide deryer annan en *strong deterrent*, mon napa problem avek sa mwan. Akoz si ou pa peye *then vwala* konsekans. Me ler mon pe lir sa par egzanp sa enn zizman ki la devan mwan, sa dimoun ti ganny kondannen en *fine R250mil e 6mwan imprisonment in default of payment*. Savedir ou pe dir mwan sa dimoun pour prefere pran sa 6mwan pour li pa pey sa 250mil.

Be ler sa *case in al lo appeal* apre Ziz in aparan *set aside* sa 250mil. Menm dan sa ka. Ou

konpran? Savedir i pa egzakt science ki si ou pour met 2an ou pour pe rezourd sa ki ou ou'n prezant devan nou.

Mon pa ganny en konpran ki mannyer ou kapab dir ek nou koumsa poudir pour en lofans drog, en lofans drog - ou'n ki'n dir, ou'n dir pour en lofans drog e si en dimoun pour al pey R250mil lanmann pour en lofans drog i bezwen en trafikan en *narco* trafiker ase enportan ki i pour ganny pini anba sa Lalwa? I pa fer sans! Be ou ki'n koz lo la, ki mannyer ou pa'n koz la.

E se pour sa reson Mr Speaker ki toulstan sak fwa nou ganny bann Zofisyen Gouvernman ki vin devan Lasanble, akoz Gouvernman i annan en mazorite, zot kontinyelman menm mank respe pour sa mazorite ki zot annan dan Lasanble, san fer en leksplikasyon ki kler, ki konkret, lo rezondet deryer kote zot le ale avek zot Lalwa.

Mr Speaker apriyori mon lo komansman mon sel konsern primordyal sete lo popilasyon prizon, ki mon'n diskit ek bann lezot eksper, pour mwan kapab konpran si mon annan en konsern ki *genuine*. E dezyenmman zistifikasiyon an relasyon ek bann ka.

Be sa apre ki mon'n ekout Vis-Prezidan, mon konsernen ki eski i annan en *ulterior motive* deryer Gouvernman anmenn sa lamannman devan Lasanble? Gouvernman ti dir ek nou koumsa lamannman dan Lalwa ACCS ti napa en *ulterior motives*.

Me son 2 zour pli tar ki sa Lalwa ti pase, dan Lasanble, sa menm Lalwa ki Lasanble ti pase ti pe ganny servi devan Lakour. So ler ou,

ou dir mwan ou napa en *ulterior motives* ozordi, *nothing* avek sa Gouvernman i dan mwan okenn konfyans ki pour napa en *ulterior motives* demen.

Se pour sa rezon Mr Speaker ki mon ti a kontan i annan serten kestyon ki Vis-Prezidan in ganny demande, ki ou sey klarifye lavantaz. E an tout lonnekte, pour montre nou respe. Mon'n fer en kantite resers konsyans pour mwan fer sir poudir mon pa vin mank respe pour personn. Be mon santi poudir ler ou fer, ou konekte serten eleman dan ou leksplikasyon ki ou'n konekte, ou pa pe fer zistis sa ki ou sipoze pe fer devan nou.

Savedir se donn nou, en rezondet konkret akoz ou le amann sa Lalwa? E sa i ava enportan pour nou kapab konpran dan ki fason nou pour fer en desizyon lo sa Lalwa. Mersi Mr Speaker.

### **MR SPEAKER**

Mersi Onorab. Onorab Larue.

### **HON FLORY LARUE**

Bonn apre midi Mr Speaker. Bonn apre midi tou dimoun. Bonn apre midi VP avek *Attorney General*.

Mr Speaker nou vwar devan nou en amannman ki parey nou'n dir i ase kourt dan son prezantasyon. Me solman letan nou pour get byen son *mother Act*, nou pour vwar ki i en *Act* vreman gran, avek 359 seksyon dan sa bout Lalwa.

E la nou pe koz spesifikman lo sa morso seksyon 295 ki nou pe fer amannman, kot nou pe tir sa limit 6 mwan pou fer li vin 2an, pour kondannasyon si en dimoun i manke pey en *fine*.

Mr Speaker nou bezwen klarifye ki pe pase dan Lasanble Nasyonal. Piblik Seselwa i servi sa platform isi pour kapab konpran ki mannyer Lalwa ki nou, nou pase i afekte zot.

E deza lo lot kote latab i dir zot pe ganny *text* pour demann zot, ki savedir sa sanzman pour zot. E olye koman bann Manm responsab, dan en Lasanble responsab pour ede klarifye sa lafreyer ki sa bann sitwayen pe met devan zot, nou vwar ki zot pe kree plis konfizyon, par komans avek en move enterpretasyon sa *Bill*.

Sa i dan mon lopinyon Mr Speaker. Mon santi ki zot pe servi sa platform ki zot annan la, pour anmenn en move lenterpretasyon. Mr Speaker dan zis sa sanzman de mo, kot nou pe sanz 6 mwan, pour vin 2an si en dimoun i manke pey en *fine*, nou ganny dir poudir ki VP dan son kapasite pour sa dimoun ki anmenn sa *Bill* devan nou, i en rakonter zistwar dan nou pei.

Mr Speaker sa serten Onorab in spesifye pour dir ki i pe met sa alegasyon kont nou Vis-Prezidan. I pe servi en Lalwa ki la dan sa kad, i pour ganny servi direkteman dan en Lakour par en Mazistra ouswa en Ziz, pour li enterpret son zizman letan i donnen, pour li donn en dimoun en pinisyon, dapre sa lofans ki'n fer si i pa'n pey en *fine*.

Par kont sa bann lakizasyon ki pe ganny fer, pe ganny fer direkteman avek en politisyen Vis-Prezidan i osi en politisyen, e letan i pe - zot dir zot servi sa mo ki zot mank konfyans, zot annan mefyans, Mr Speaker i montre ou kot zot vwar nanm, kot napa nanm, akoz zot vwar

move lentansyon deryer en morso Lalwa ki annan sanzman, avek detrwa mo.

Mefyans Mr Speaker i ek zot. Pa nou ki donn zot mefyans Mr Speaker. Zot par zot natir zot mefye tou keksoz. Zot rod linterpretasyon kot napa. Mr Speaker nou ganny dir nou pe sers plis pouvwar. Ki mannyer Vis-Prezidan *State House* dan son biro, i pour servi sa Lalwa? Mon pa konpran Mr Speaker. Nou pei i annan trwa lebra gouvernans. I annan nou isi ki fer Lalwa koman Lezislater, nou annan L'Egzekitiv, apre nou annan Zidisyer.

Mr Speaker eski ozordi dan nou Lasanble Nasyonal bann Manm US pe dir klerman ki zot napa konfyans dan lebra Zidisyer? E eski zot krwar ouswa zot pe dir ki Zidisyer i pa endepandan koman en lebra Gouvernman e i travay direkteman anba lenfliyans L'Egzekitiv?

Mr Speaker fodre pa zot annan mefyans pour fer zot *statement*. Fodre pa zot servi rakonter zistwar, lot kalite Lalwa ki ti vini sepa ki zour, pou dir tousala.

Mr Speaker ozordi nou, ozordi nou, nou'n lager pour anmenn en demokrasi dan sa pei. Nou, nou respekte laliberte Lakour e Zidisyer e laliberte pep Seselwa pour zot anmenn en *case*, pour zot ganny ziz-e.

Mr Speaker lontan ki Lakour, ti *Maison Du Peuple!* Lontan ki ou ti ganny ziz-e *State House!* Mr Speaker sa sistem in sanze ozordi. Nou pa kapab prezant detourn nou fason fer ek labitud ki nou ti annan fason fer avan, pour nou detourn en Lalwa ki kler. E se en Mazistra ouswa en Ziz

dan en Lakour ki enterpret sa Lalwa pour donn en penalizasyon.

Mr Speaker nou'n ganny nonm *meeting* piblik. Mr Speaker me ni dan *meeting* piblik napa en Lakour. *Meeting* piblik i annan lopinyon Seselwa, zot vini, zot zwenn *Leader* politik, zot fer zot *Leader* pei ki bann *Leader* politik osi, zot fer bann sizesyon, zot met zot pwen devan, zot ganny en larepons.

Mr Speaker nou en letan, letan - *meeting* piblik pa novo Mr Speaker, lontan i la. Letan dimoun ti ale zot ti ganny dir, nou a get ladan, nou a get ladan, nou a get ladan. Mr Speaker zot ki ti dir dan zot *meeting* piblik.

Prezan la ozordi zot annan en problem, pour konfiz pep Seselwa poudir ki sa ki nou pe fer ozordi i donn zot mefyans. Akoz sa ki ganny dir dan *meeting* piblik pa sa ki ti ganny dir yer, pa sa ki ti ganny dir avan yer. Mr Speaker sa ki nou pe fer la en fwa nou vote, i pase, i ekrir *black – nwani* ek blan dan Lalwa pei Sesel.

Letan nou fini nou ale koman en parti, nou kit li lanmenm. *Ok.* *Meeting* piblik sa ki nou ganny dir - sa en lot zafer pa vin konfiz Seselwa pour fer krwar atraver detrwa mo nou pe rod pouvwar. Mr Speaker pouvwar nou'n fini gannyen. Mazorite nou annan, nou pe fer nou travay.

Prezan, Mr Speaker letan nou get sa amannman, mwan mon pe get sa Seksyon e tit sa seksyon i "Limit of imprisonment in default." I annan trwa pti morso ladan Mr Speaker, si ou permet mwan. I dir ou si ou pa pe pey, ou pa pey sa *fine*, sa Ziz i kapab prezant li servi son diskresyon pour

gete ki valer santans ki ou pour fer akoz ou pa'n pey en *fine*.

Lakour i donn ou en *fine* R1mil, R4mil, R5mil, VP in dir nou arriv milyon ozordi *fine* dan nou Lalwa. Bann Onorab lot kote ki pas Lalwa, ou ti a ekspekte zot konnen Mr Speaker. Ki oter *fine* in arive! Letan i dir ou Lalwa i date dan bann lannen 1960. Ozordi nou 2023, eski zot pe dir nou letan nou pe koz lo modernite, met dimoun devan sant devlopman, me pa lo - an sant devlopman ki nou pa konnen ki ozordi nou'n modernize e ki *fines* dan nou pei, in sorti R5, R1mil, R200 in arriv milyon. Sa ki zot pe dir nou Mr Speaker?

Prezan *Attorney General* dan son kapasite Gouvernman pour nou kapab prezan - pour nou kapab ozordi Mr Speaker regard nou pep laba deor. Letan en dimoun in ganny en *fine* Mr Speaker, i kont en lot dimoun, i kont nou pei, i kont Leta. Eski sa lot kote latab pe dir ki ou fer en krim i *ok*, fer lapenn, mon annan mon dalon ki pour ganny penalize. Be Mr Speaker ou zanmi, si i vwar li dan en difikilte avek sistèm legal, eski nou prezan koman Manm Parlman akoz nou annan en zanmi, nou bezwen mazinen ki Lalwa pe ganny servi pour pini tel zanmi? Eski se sa ki nou pe fer avek nou Lasanble ozordi?

Mr Speaker be sa i vreman, deplorab anver nou responsabilite koman en Manm Parlman isi Sesel! En viktim ki'n ganny agrese, ki li prezan en Ziz in pas en santans, en *fine* lo li. sa dimoun pa peye i deside pa peye, e i al fer zis 6 mwan prizon, sa dimoun i santi ki sa keksoz ki'n

arive i vo plis. Li i santi ki i pe ganny *let down* li, sa sitwayen.

Leta i ganny *let down* letan en dimoun, i annan en *fine* 1milyon 800mil, 700mil i deside fer 6mwan prizon, olye pey son *fine* anver Leta. Nou pe *let* nou pei *down*, letan nou pe dir si en dimoun i annan en abilité pey R600mil, i deside pour li pa peye me pour li al fer 6 mwan prizon. E nou, nou pe dir donn Zidisyer sa laliberte pour li met sa santans apropriye letan ou pa pey ou *fine*.

Mr Speaker sa lot lafreyer ki zot in dir en *fine* R1mil, ozordi zi ou pa'n pey ou *fine* R1mil, R2mil, R5mil Ziz i anvoy ou 3 mwan prizon, 6 mwan prizon.

E an plis ki sa zot sey rod en fason pour ou kapab *breakdown* ou *fine* pour ou pey li an morso. I pa ki si ou abitye ganny en - si Zidisyer i abitye donn en *fine* - en santans 3 mwan si ou pa'n pey ou *fine* ki soudennman letan nou'n *extend* sa 2an, tou Ziz dan Zidisyer Sesel pour fou, pour dir ek tou dimoun koumsa la ou'n ganny en - ou pa'n pey ou *fine*, mon bezwen anmenn ou anvoy ou prizon pour 2an! Sa kalite largiman ki donn lafreyer Seselwa Mr Speaker.

Si en Ziz i abitye donn son santans 3 mwan pour en *non-payment of fine up to* valer 10mil, R20mil, kwa ki fer ki ozordi en Ziz pour sanz sa? *Attorney General* atraver Vis-Prezidan in dir nou ki ozordi Lalwa pe montre, pe reflekte bokou plis koman en *fine*.

E ozordi Mr Speaker, nou pe sey anmenn sa devan, pour nou fer ki nou pei i dan en staz pli modern, letan nou pe *deal* avek bann *fines* ki dimoun pe fer *non-payment* ek

kekfwa pe servi sa opsyon pli fasil pour li al prizon 6 mwan. Me non pa bann lezot kalite lenterpretasyon.

E se pour sa ki ou vwar prezan Seselwa pe *text zot*, pe dir zot i per. E an plis ki sa Mr Speaker annou sey nou mye pour nou *être responsab*, koman en sitwayen ki fer sa bann keksoz i pas pli byen e letan nou pas Ankour nou konnen egzakteman ki Lalwa i dir e non pa ekout bann bout, bann bout enterpretasyon dereggle.

Me al dan nou Lalwa lo *SeyLII*, nou a vwar egzakteman ki si sa ki pe ganny sanze dan sa *mother Law*, e mon ti a demann Onorab ki pa tro konpran kwa ki pe pase sey get dan ou *mother Act*, ou a vwar ki amannman e ki i *mean*. Mersi.

### **MR SPEAKER**

Mersi Onorab. Onorab Uranie.

### **HON ROCKY URANIE**

Mersi Mr Speaker. Bonn apre midi *VP* avek ou delegasyon. Bonn apre midi tou koleg Onorab. E byensir bonn apre midi ankor zabitant Zil Pros ki a lekout.

Mr Speaker bokou in ganny dir konsernan sa Lalwa par mon bann Manm kote lo kote mon latab. Mon osi mon annan de pti mo pou mon vin dir konsernan sa Lalwa akoz mon ti ava kontan ganny en pe plis leklersisman lo sa *Bill*.

Sa *Bill* parey ou vwar i *look* senp, zis en pti amannman. Me son lenpak lo lasosyete anver dimoun i bokou, i gran. Akoz parey nou'n ganny dir i sorti dan en *mother Act*, savedir sa pti sanzman la i pou afekte sa gro *mother Act* li.

So Mr Speaker ler nou kondann dimoun prizon, sa ki'n fer son fot i bezwen ganny kondannen. Sa nou pa kont sa. Sa mon tout an faver. Sa ki fer son fot i bezwen ganny kondannen. Me selman nou bezwen get form kondannasyon pou serten keksoz.

Akoz lanprizonnman i devret ganny servi koman en pinisyon pozitiv anver en prizonnyen. Ki donn li sa sans pou li kapab reabilit son lekor e osi kre en *deterrant* pou li menm li pa repet menm krim. E pou anpes bann lezot an deor repet, fer sa bann krim ganny servi koman en legzanp.

Me ki nou'n vwar se ki, prizon ozordi parey mon koleg avan mwan in dir, *LOTO* in dir - prizon i deza *crowned* ler nou gete.

E ler ou ogmant santans savedir ou pe dir sa dimoun al fer bokou plis letan prizon e la sa i annan bann lenpak direk;- par egzanp fer prizon vin tre *overcrowded*. E osi prizonnyen i ganny *neglect* e la programm reabilitasyon dan prizon petet i pa mars byen parey i devret e sa prizonnyen ler i sorti i pa'n ganny reform e i kapab repet bann lofans.

So nou bezwen seryezman gete, fer serten letid vwar avan nou vin avek serten Lalwa, ki benefis i pe vreman ammennen oubyen si i pe anmenn en dezavantaz pou lasosyete.

Akoz pas pli bokou letan dan prizon i vedir ki i vin en kou enorm lo lasosyete, lo lekonomi kot *taxpayers*, dimoun ki pey *tax* i war li prezan pe bezwen kontinyen sonny prizonnyen pou bann lofans ki zot in komet.

E kan larzan petet ti kapab ganny servi petet pou bann programm an deor prizon pou ed bann zenn pou zot ganny aktivite pou fer pou zot pa komet serten krim.

E nou'n vwar ki i fasil pou en dimoun, en senp *mistake* akoz in ariv ek mwan. Kot mwan mon'n deza bliy mon *driving licence* par koensidans *miss* li, e mon'n ganny en *fine*. Ok e mwan mon ti'n ganny donnen serten zour pou al pey sa *fine*, me bann zour ki mon ti gannyen pou al pey *fine* mon ti bezwen pe kit pei avek SADC. E mon ti bezwen vitman get en lot dimoun pou al pey sa *fine*, sa *fine* pou mwan.

Me ler nou gete Mr Speaker so sa bann pti *fine* i arriv ek nenport ki dimoun. Me nou vwar ki bokou nou bann dimoun ki ganny targete *usually* avek sa bann keksoz, i bann dimoun ki napa bokou mwayen pou pey bann *fines*.

E alor se zot petet ki pou ganny bann pli gro santans, bann santans prizon. E ler *VP* in donn son leksplikasyon in fer sorti sa laspe drog, trafik drog. Ki mon pa konnen si in fer li deliverableman oubyen i en *mistake* lo son par.

Akoz parey nou tou nou konnen i annan *Misuse of Drug Act* ki pou *deal* avek trafik drog. Me pou mwan alors ler ou'n nonmen o a krwar ou pe donn mwan lenpresyon ki sa lamannman osi bann dimoun ki fer trafik drog, i kapab ganny aplike pou zot.

E pou mwan si sa i aplike, en santans 2an prizon pou en dimoun ki fer trafik drog, pou mwan i *either* ou pe protez *drug dealer* or i annan serten dimoun spesifik ki ou anvi *deal* avek.

So alors Mr Speaker, pou mwan *VP* petet i ava donn lesplikasyon lo la apre. Nou bezwen - Gouvernman i bezwen rod bann lezot alternativ pa zis ogmant santans lo dimoun.

Petet annou vwar bann bon fason ki serten pei i fer. Rod bann alternativ petet pou bann *fines* parey bann dimoun pa *pay parking ticket*, eksetera. Rod bann lezot alternativ gete ki bann *best practices* ki bann lezot pei i fer. Gete ki mannyer nou kapab entrodwir sa.

Akoz pou mwan ler mon get sa *Bill* parey mon dir, i en pti lamannman, me selman son lenpak i gran.

So alors ozordi ler nou pe get lasosyete, pou mwan sa *Bill* mon pa konnen ki lirzans ki in annan pou li vin la devan, vi ki mon konnen i annan bokou *pressing other pressing issues* deor, ki petet Gouvernman ti kapab *deal* avek. Me nou war sa *Bill* i vini la ozordi.

E ankor parey lezot koleg in dir, nou annan serten mefyans e mon osi mon annan serten mefyans akoz mon'n la, mon en nouveau Manm e mon vwar ki i annan Lalwa ki ganny mete ater.

Motiv i sanble pozitiv me selman ler ou gete parfwa ou vwar ki i annan serten keksoz, serten dimoun serten keksoz k zot targete. E mwan mon pa ti ava voudre ki sa Lalwa i ganny servi dan sa fason.

E alors plis leklersisman *VP* i ava donnen lo sa Lalwa. Petet koumsa mon ava konnen e mon bann dimoun ki pe ekout mwan i ava konnen, i ava vwar rezon pou ki rezon mon vot dan en fason oubyen dan en lot fason ki mon devret vote.

So alors avek sa de pti mo Mr Speaker, mon pou termin mon lentervansyon. Mon ava ekout *VP* apre. Mersi.

#### **MR SPEAKER**

Mersi Onorab. Onorab Georges?

#### **HON BERNARD GEORGES**

Mersi Mr Speaker. Mr Speaker i annan en pe letan nou'n realize ki lopozisyon dan sa Lasanble i fay. Me si mon pa ti'n asiz la apre midi mon pa ti pou zanmen krwar zot in tonm osi ba ki zot in tonbe.

Tou sa bann Manm ki'n koze avek tou respe ki mon annan pou zot, ou plito pou ki mon ti annan pou zot - tou sa bann Manm ki'n koze in pran en keksoz senp e zot in fer li vin en seval batay ki pa ni merit en minit letan.

Nou'n ganny koz lo mefyans. Nou'n ganny koz - Onorab Herminie in dir - zot annan en lenkyetid dan zot lespri. La dernyen Manm ki'n koze in dir ki *drug dealers* pa devret ganny 2an prizon.

I pa'n menm remarke ki sa ki nou pe koz lo la apre midi, i pa en santans 2an prizon pou *drug dealers* me i en *default imprisonment* pou en *fine* ki'n ganny enpoze. I pa ni konpran sa.

E pa zis li, tou sa bann ki'n koz avan li swa zot pa'n konpran, swa zot pa'n anvi konpran, swa zot anvi konfiz sa pep laba deor.

Me Mr Speaker, pep Seselwa parey nou'n vwar dan sa bann *meeting* piblik pa pe konfize, pa pe konfize. Pep Seselwa i konpran tre byen kisia ki pe pase dan sa pei e i konpran tre byen lekel ki pe defann zot zentere, e lekel ki pa pe ...

**(APPLAUSE)**

### **HON BERNARD GEORGES**

Alor permet mwan Mr Speaker dan Sa detrwa minit ki mon pou koze apremidi esey eksplik avek mon bann koleg lo lot kote latab kisia ki devan zot, e ki zot swa pa pe war oubyen pa anvi war.

Premyerman, tou bann lofans - tou bann lofans dan tou bann Lalwa *including Misuse of Drug Act* ki dir ki si ou komet en lofans e ou ganny kondannen, ou pou servi en santans prizon *x* oubyen en *fine y* oubyen tou lede tel parey nou passe isi dan sa Lasanble plizyer fwa.

Tou sa bann lofans pa'n sanz ditou. Napa en lofans ki'n sanze, napa enn ki pe monte oubyen ki pe redwir ozordi. Ni son santans prizon, ni son *fine*. Tousala i ankor egzakteman parey.

E pou bann Manm ki konfize lo *MODA* - (*Misuse of Drugs Act*) ki pe dir ki sa *Misuse of Drugs Act* i annan en Lalwa li tousel eksetera, ki mannyer sa i antre ladan, les mwan eksplik zot.

Ki sa Lalwa ki nou pe pase la ozordi, i kouver tou bann *default fine* dan tou bann Lalwa;- ki se Kod Penal, ki se *MODA*, ki se en lot Lalwa, tousala i pou pas parey.

Dezyenmmman, Mr Speaker sa ki nou pe koz lo la ozordi, se pa en santans. Se sa ki nou apel dan langaz legal en *default imprisonment*. Ler ou ganny kondannen Ziz i kapab swa met ou lo probasyon si ou lofans pa grav, swa i kondann ou en larzan, en lanmann, en

*fine*. Swa i kondann ou prizon. Swa i kondann ou prizon ek en *fine*. Swa i met ou lo probasyon ek en *fine*.

Sa ki nou pe koz lo la ozordi, se selman sa *fine*. Sa *fine* ki Ziz ti pou donn ou - sa lanmann ki Ziz oubyen Mazistra ti pou donn ou, pa'n sanze Lalwa i ankor egzakteman parey.

Sel keksoz parey Vis-Prezidan in fer kler apre midi ki'n sanze, oubyen ki pou sanze ler sa Lalwa pou pase taler, akoz sa Lalwa pou pase taler, se sa santans ki ou pou al fer si ou pa pey ou *fine*.

E Mr Speaker i senp. Si ou pa anvi al prizon e ki ou'n ganny kondannen lanmann, pey ou lanmann! Pey ou lanmann fini!

Ou pa bezwen al rod ar sa se bann pti dimoun, oubyen bann dimoun ki pa kapab peye - oubyen bann dimoun ki napa le mwayen. Si ou'n komet en lofans e ki ou'n ganny en lanmann, sel fason pou ou pa al prizon se pey ou lanmann!

E sel fason pou ou pa pey en lanmann, se pa fer lofans! Alor mon pa war ozordi - eskiz mwan mon bann zanmi dan lopozisyon - kisia ki zot pe defann.

Sa ki VP in eksplike apre midi se ki si ou'n ganny en lanmann e ou pa'n pey sa lanmann, son maksimonm ki ou kapab ganny kondannen pou ou fer prizon, i sorti 6 mwan in mont 2an.

E in fer kler ki sa se akoz bokou *fine* in monte depi 1964. Kot ou ti sarz en dimoun R50, ozordi ou sarz li R2mil;- kot ou ti sarz en dimoun R2mil ozordi ou sarz li R100mil.

E pou bann gro lofans kot i annan en lofans lanmann swa li tousel swa ansanm ek en santans prizon, sa ki nou pe fer apre midi se fer sir ki en dimoun, pa deside pou li al prizon akoz son lanmann i pa anvi peye, e son santans prizon ki mars avek i tro ba.

Se tou ki nou pe sey fer ozordi apre midi. E si zot ti atantiv, oubyen si

zot pa ti anvi fer politik bon marse, zot ti'n ava konpran sa.

Alor Mr Speaker, sa *Bill* ki devan nou ozordi i konsern premyerman bann dimoun ki'n komet en lofans. Annou pa zanmen bliy sa. Tou bann dimoun ki pou ganny kondann prizon akoz zot pa'n pey zot lanmann, zot in komet en lofans. E parey mon'n dir taler si ou, pa anvi en lanmann pa komet en lofans.

Dezyenmman, sa bann dimoun se bann dimoun ki'n ganny en santans in *default* zot lanmann. Zot in ganny trouv koupab e zot in ganny en santans pou zot pey en lanmann, e si zot pa pey en lanmann zot al prizon. Alor si zot pa anvi al prizon pey zot lanmann.

Trwazyenmman, set en dimoun ki'n komet en lofans, ki'n ganny kondannen e ki'n ganny sarz en lanmann pou li peye.

Alor Mr Speaker, kisisa ki nou pe sey proteze ozordi, ler nou asiz lo ban lopozisyon? Kisisa ki nou pa konpran avek sa Lalwa? Kisisa ki fer nou annan en lenkyetid dan nou lespri, oubyen en mefyans avek sa ki Gouvernman i fer?

Gouvernman in vin o kler devan sa Lasanble apre midi, in eksplike egzakteman kisisa ki i anvi fer. Kote i annan lespas pou mefyans ladan?

Mefyans parey Onorab Larue in dir se ler - parey in arriv avek ou Mr Speaker - kot ou pa'n war ni en sarz, ni en lanmann, zis ou'n ganny warant pou ou al asiz prizon *Chateau-Vallon* pou sepa konbyen mwan.

Sa se landrwa mefyans. Sa se bann dimoun - Nou ki devret mefyans kont zot. Zot, zot napa en sou mefyans kont nou, akoz nou, nou vin devan zot, nou eksplik zot egzakteman sa ki nou pe fer.

Me ou konnen ki sa Mr Speaker, nou, nou'n abitye nou. Nou, nou lapo in red nou. Nou nou'n asiz lo ban lopozisyon pandan en bann lannen nou. Nou, nou'n soufer, nou'n sibir.

Si zot, zot annan en problem. Si zot, zot lapo i ankor mens akoz zot fek

ariv dan lopozisyon e zot pa kontan kot zot ete, be sa se zot problem pa met sa lo nou!

Azir koman bann dimoun responsab silvouple. Pa sey detourn en keksoz ki senp, pou fer li vin en konplikasyon demagozi politik. Akoz sa ki pe arive dan sa pei Mr Speaker, e ki pou arive taler dan 1erdan ek 9minit ankor enn fwa. Se ki Lepep Seselwa tou le swar pe montre avek lopozisyon ki mannyer zot in perdi konfyans avek zot.

E ki mannyer ki sel lespwar pou Sesel se parti *LDS* avek son Prezidan Wavel Ramkalawan. Ler ou vvar Mr Speaker sa kalite deba ki nou'n war la apre midi, mwan mon pare pou dir avek Lepep Seselwa annan konfyans ki *LDS* pou la pou ankor en bann lannen.

Ler mon vvar sa kalite leksplikasyon ki sa detrwa Manm Lopozisyon in fer apre midi, Mr Speaker mon dir avek mon *Caucus*, "Marmay zot napa naryen pou enkyet, nou pou dan sa Lasanble pou ankor en bann lannen".

E sa ki mon per Mr Speaker, sa k mon per e vreman per se ki in nepli annan *seat* lo nou kote latab, nou pou bezwen komans pran en pe lo lot kote.

Akoz ek sa bann kalite deba apremidi, eleksyon i arive demen bomaten Mr Speaker, mon pa war okenn parti *US* pe retourn dan sa Lasanble.

Alor avek sa detrwa mo - avek sa detrwa mo Mr Speaker mon remersye ou e mon dir, e mon dir avek *VP*, pa per *VP* ou lamannman pou pase taler.

Mersi Mr Speaker.

*(Interruption off-mic)*

#### **MR SPEAKER**

Onorab. Onorab, Onorab gard zot komanter ba silvouple. Pa enteronp Lasanble, pa enteronp mwan. Onorab Vidot ou entervansyon silvouple.

#### **HON AUDREY VIDOT**

Mersi Mr Speaker, bonn apre midi *VP* avek *Attorney General* e tou manm piblik ki a lekout.

Mr Speaker atraver ou, i regretab ki mon bezwen dir mon pran lapenn pou Onorab Georges. Konnen i pa realize ki dimoun in fatige tann sa bann bat latet sorti kot Onorab Georges.

Si nou fay lo sa kote latab sa i nou problem. Me selman sa ki mon kapab dir avek Onorab Georges ek son lekip atraver ou Mr Speaker, pep Seselwa ki pou zize. E pep Seselwa ki pou dir zot si vreman zot pou la 2025. Akoz nou, nou'n dir fer eleksyon demen, *bring it on*, nou *United Seychelles* nou pare!

**(APPLAUSE)**

### **HON AUDREY VIDOT**

Akoz nou lo sa kote latab atraver ou Mr Speaker, nou pa pou vin pran okenn lesson avek Onorab Georges nou. Dir Onorab Georges donn lesson son bann marmay lo son kote parey in dir zot 'marmay.'

Se *LDS* ki bezwen azir dan en fason responsab e delivre pou fer pli byen. Mr Speaker, akoz nou lo sa kote latab espesyalman mwan, pa mwan ki pou al defann dimoun pou *fine Ankour*. Sa mon ava kit pou Onorab Georges dir pou li menm.

Mr Speaker, ler mon bann koleg lo sa kote latab in fer resorti ki nou mefye sa Gouvernman. Nou annan bon rezon pou nou fer li. Nou fer li Mr Speaker, e atraver ou - mon le dir avek Onorab Larue - se ler Minis li i ekrir pou li fer arete en sivilyen olye Konmisyoner se la kot nou, nou mefye.

Ler Minis i vin dan sa Lasanble i dir nou en parol, ler pou li vin pas en Lalwa oubyen atraver reponn kestyon apre dan *meeting* piblik son Prezidan i dir en lot e son Minister pa pe aplik sa ki zot ganny dir pou, zot dir zot in dir zot pou fer, se sa ki apel mefye zot Mr Speaker.

Ler Manm *US10* sa kote latab depi ler pe dir avek sa Gouvernman, zot inefikasite pou zot kapab delivre, pou zot kapab enplimant Lalwa ki zot menm zot, zot vin aprouve, apre zot menm zot, zot pa kapab fer, e ozordi zot prop piblik pe dir zot dan *meeting* piblik ki tou sa ki nou *United Seychelles* nou'n dir ti vre, e zot pa pe fer li.

Zot blyie ki zot vin dir dan sa Lasanble. Zis parey ler *VP* i vini i dir en keksoz, i blyie ki i ti fek dir dan son lentervansyon. I pa'n koz ditou lo drog li. I paret mwan konmsi nou lo sa kote la, nou vin envant larou.

Non, Mr Speaker, piblik la deor pe swiv, piblik i tande e piblik i konnen. Mr Speaker, ler Lalwa i vin dan sa Lasanble, nou espekte ki sa ki vin prezant li i donn en lesplikasyon byen kler avek son bann fe pou asire poudir menm si i pe sanz zis de pti mo, piblik la deor i konn son vre lentansyon.

Akoz piblik in fini komans mefye zot. Zot dir nou lopozisyon nou mefye zot, me zot dimoun i mefye zot bokou plis. E Mr Speaker, nou, nou pa bezwen zour okenn aktivis ki von dan *meeting* pou koze nou. Nou koz onnet ek nou dimoun. E nou fran ek nou dimoun. Apre tay deryer pou ale pou al tir *video* lo *YouTube*.

Mr Speaker si-si zot bann Gouvernman zot bann zofisyen Gouvernman, zot bann Minis letan nou lo sa kote latab nou ti vini ler nou dir zot keksoz pou zot aranze, e pou zot fer sir ki ler zot vin avek Lalwa *be it* i sanz de pti mo oubyen azout de pti mo zot ti fer li byen, zot ti pran konsiderasyon, konsern ki nou *United Seychelles* ki nou gannyen sorti lo teren kot nou pe konekte avek nou dimoun, pou vin dir zot, zot ti ava enplimant li.

E mon ti dir zot semenn pase, nou, nou pa la pou vin tyonbo zot lanmen. Zot annan en responsabilite pou zot delivre;- delivre baze lo responsabilite ki zot in gannyen pou fer pli vyen.

So, zot anna en Lalwa devan zot, zot in sanz de pti mo zot pa'n kapab eksplik piblik klerman. E se pou sa rezon ki piblik pe demann Manm Lasanble pou demann kestyon. Si zot lo zot kote latab zot napa kestyon pou demann zot Vis-Prezidan, akoz zot in dekonekte avek zot piblik, pa nou problem sa lo sa kote *United Seychelles*.

Alors Mr Speaker, parey mon bann koleg in dir, nou, nou mefyé zot avek zot bann desizyon ki ler zot fer, zot pran nou konsern ki nou gannyen sorti kot piblik pou met devan zot, zot pa entereze pou ekout nou, Piblik i a kontinyen ziz zot pou zot menm. Mersi Mr Speaker.

#### **MR SPEAKER**

Bon, mon krwar sirman nou'n epwiz sa size. Mon ava apel VP pou pran laparol pou fer son repons e konklizyon.

Vis-Prezidan.

#### **THE VICE-PRESIDENT AHMED AFIF**

Mersi bokou Mr Speaker. Mr Speaker mon'n ekout atantivman bann diferan entervansyon e mon ti ava kontan profite pou pas serten komanter lo swadizan bann mefyans, oubyen okenn kestyon ki annan konsernan sa Lalwa.

Onnetman ler mon'n ekout sa bann entervansyon, mon pa'n tann en sel largiman ki montre akoz en lamannman ki mon'n eksplik klerman, i neseser dan sa letan kot nou ete ozordi. Akoz dernyen fwa sa Lalwa ti ganny pase ti 64, lo sa seksyon. Tou bann *fine* in monte dan pei e par rapor 6 mwan i devret ogmante si nou pa anvi war dimoun ki ganny en kondannasyon en *fine*, apre i pa peye, i pou li zis pas 6 mwan e Leta ki perdi. Krim i kontinyen ganny komet.

Mon krwar bann kestyon ki pe ganny demande, tou larepons nou'n deza donnen. Onorab Herminie par egzanp i pe dir eksplike donn detay lo sa

2an. Kot i koz lo bann pti dimoun ki'n fer en pti lofans trafik sepa kwa.

Konmsi mon'n dir poudir bomaten si ou'n fer en lofans trafik ou pa'n peye, Ziz pe al met ou 2an prizon. Zanmen nou'n dir keksoz koumsa.

E pou donn lenpresyon poudir sa i vre, i move. Mon espekte koman en Manm Lasanble zot in lir sa *Bill* ki devan zot, e zot konpran Lalwa. Nou pe koz lo en limitasyon. En Ziz i ganny ziska tan kantite letan ki i kapab donn en dimoun pou al prizon.

Alor, se pa nou ki pou dir ek Ziz si pou trafik i pou met en dimoun pou 2an, akoz i pa'n pey en *fine*. Se pa nou ki pou dir sa. Nou, nou pe donn possibilite pou tou sa bann Lalwa - pa zis *Criminal Procedure Code* - tou bann Lalwa ki fer provizyon pou bann *fine* ozordi pou ki si sa bann dimoun, e ozordi i annan bann krim ki annan bann *fine* ki o.

Attorney Zeneral fek *remind* mon poudir anba seksyon 58 dan *Fisheries Act* 2014, i annan *fines* ziska R13 milyon. Alor si en dimoun i kapab al, (i R12 ou R13milyon) - si en dimoun i kapab evit tousala, fer 6mwan, eski i pa i sov li \$1milyon preski? Alor?

I annan plizyer lezot. *Anti-Money Laundering* R5milyon. *Trafficking-in-human trafficking* sa osi i annan bann gro *fine* 800mil eksetera.

Eski nou pe dir pe donn bann Ziz sa possibilite pou zot dekouraz dimoun pou pa pey bann *fine*? Eski nou pe koz lo bann pti, pti ka la?

I annan en lot kestyon ki ti monte, statistik e dir zot konbyen. Pou mwan onnetman, i pa statistik ki enportan la ozordi.

Sa ki enportan se menm si i annan zis 3 ka, menm si i annan 4 ka ki monte, kot ou annan en *fine* 3milyon, 5 milyon. E nou pe war pandan sa bann dernyen lannen. Nou, nou pa en Gouvernman i asiz la nou pa reazir ler nou war keksoz pe devlope devan nou.

Kot resaman in annan bann ka kot dimoun i ganny en *fine* R2milyon pa peye, pa peye prefere fer prizon 6mwan. Sa i 2milyon ki Leta ti'n kapab anmase. Sa i deza ase rezon pou dir i fer sans.

I annan bann ki 12milyon. I annan plizyer lezot *fines*. Nou, nou pe dir, pa nou ki dir dimoun fer krim. Pa nou ki dir ek en dimoun fer en lofans trafik. E nou pa ankouraz sa nou.

E pa nou, pa Gouvernman ki dir ek en dimoun pa pey son *fine* osi. Ou annan en semen pase, pey ou *fine*.

Parey Onorab Georges in fer sorti taler, ou pa anvi al dan sa semen, pey ou *fine*. Sa se en pei ki anvi annan *rule of law* sa se en pei ki anvi annan en pe lord. Sa en pei ki kot nou pa anvi war nou bann prizon plen nou. Annefe prizon ti plen anba zot Ladministrasyon ler ti annan rikord an 2014. Mon krwar ti pros 100poursan *occupancy* dan prizon.

Ozordi prizon pa plen koumsa li. Me selman nou bezwen annan en lankadreman legal, ki fer sir poudir tou dimoun ki deside pa pey en *fine* - e mon dir byen - li ki deside pa pey en *fine*, i bezwen annan en keksoz ki nou apel en *deterrence* pou anpes li al dan sa direksyon.

Mon krwar mon'n eksplik tou sa ki annan. Mon'n tann komanter mon pa konnen ki mannyer *Travizory* in antre ladan, onnetman mon pa konnen ki mannyer *public meeting* in antre ladan. Mon mazin *public meeting* i bezwen en keksoz ki pe fatig zot parske dan *public meeting* mwan personnelman mon'n aprann en kantite. Mon pa krwar i relevan ek sa Lalwa ki nou pe pase.

Mon'n aprann en kantite, mon'n war en kantite keksoz ki konfirmen tou sa ki Prezidan in dir i vre, sirtou dan Leta Lanasyon, kantite bann pti keksoz ki kapab ganny aranze.

E nou louvraz se kot nou war i annan pou aranze parey dan sa Lalwa, nou pe bouz avek letan. Nou pa pou reste dan 1964. Nou pe bouz avek letan

e parey zot, parey dan *public meeting* nou'n tann en kantite.

Dimoun i dir be mon pe esper sa pandan plis k 20an, 15an, 18an. I annan 5an mon'n demann sa keksoz. Alors nou, ozordi nou en Gouvernman ki responsab, ki pare pou rezourd tou bann problem ki'n annan memm e laplipar i date depi byen avan nou ki nou pe rezourd ozordi.

So, mon mazinen sa en rezon *public meeting* in monte ki zot vwar poudir sa ki zot in kit deryer pou nou netwaye aranze, i gro e alor i fatig zot, zot koz lo la dan en keksoz ki napa okenn relevans dan sa Prozedlwa ozordi.

Mr Speaker, mon'n tann osi poudir - mon pa pe montre respe pou Lasanble lafason mon prezant lo staz merit - Mon krwar respe i mars de fason, mwan mon ti napa lentansyon pa montre respe. Mon sey parey zot dir nou devret annan priyorite dan Lasanble, fer keksoz al vit.

Mwan mon'n prezant keksoz parey mon vwar li pli vit posib. Si zot deside e zot krwar i annan lezot keksoz ki priyorite, pran letan pou koz keksoz ki napa naryen ek *Bill*. Lekel ki pe gaspiy letan?

Mon demann mon lekor sa kestyon, kan zot dir poudir i annan dimoun ki la devan nou ki'n fer keksoz ki mal, kote respe i vini?

Ler zot dir poudir nou vin akont zistwar. Kote respe i vini? Eski se mwan ki dir sa bann keksoz? Oubyen i sorti lo sa kote latab?

Mon krwar ler zot koz mefyans, zot koz lo respe, en keksoz ki fatig zot parske i en *behavior*, en fason fer ki zot in fer sa ase souvan. Zot predeserer in fer sa petet ase souvan e zot trouv li neseser pou zot koz lo la. Kekfwa i fatig zot konsyans.

Me mwan mon konsyans i kler. Nou pe anmenn en morso Lalwa pou moderniz sa ki nou annan depi 1964, i neseser si nou anvi annan lazistas dan Sessel e ki tou dimoun ki pa'n pay en *fine*,

Ziz i ganny bataz, se pa nou ki pou dir Ziz ki pou fer.

Ganny bataz pou li met en santans ki azir koman en *deterrence* ki rezonnab dan sa lemonn e dan sa zour kot i ete ozordi. E alor nou pe propoz sa lamannman ki sorti 6mwan si ou pa'n pey ou *fine*, pou li vin 2an. E sa i aplik pou tou bann Lalwa kot en *fine* i ganny enpoze.

Vwala Mr Speaker, mon krwar mon'n eksplik meyer ki mon kapab avek tou respe pou bann Manm Lasanble. E mon espere ki nou ava ganny en vot an merit, en vot lo merit sa *Bill*. Mersi bokou.

### **MR SPEAKER**

Mersi VP.

**(APPLAUSE)**

### **MR SPEAKER**

Manm ava vot lo merit zeneral sa *Bill* pou *Second Reading*.

Manm ki an faver lev lanmen silvouple. Mersi. Manm ki kont?

Mersi. Vot lo *general merit Criminal Procedure Code (Amendment) Bill 2023*, 18 Manm in vot pour, 0 kont e 8 Manm in *abstain*. Vot in aprouve.

Madanm Clerk ava fer *Second Reading*.

### **MADAM CLERK**

Mersi Mr Speaker. *A Bill for an Act to amend the Criminal Procedure Code (Cap 54)*. Mersi Mr Speaker.

### **MR SPEAKER**

Mersi. Mersi Madanm Clerk. Mon pa konnen si i annan ase mo dan sa *Bill* pou fer okenn amannman lo 1a. Onorab Hoareau ou?

### **HON JOHN HOAREAU**

Bon apre midi Mr Speaker. Bonn apre midi VP, AG.

### **MR SPEAKER**

Non eskiz mwan, nou bezwen zis. Nou pa ankor pas dan Komite.

Mon pe zis demande si i annan en amannman? Napa. Ok dan sa ka nou bezwen demann Mosyon pou *skip Committee Stage*. Ou pe fer sa Mosyon ou? *Ok go ahead please*.

### **HON JOHN HOAREAU**

Mersi Mr Speaker. So anba *Order 97 (1)* mon pe demann ou pou *waive Standing Order 70* pou nou sot Staz Komite, anvi ki napa okenn lamannman lo sa pti *Bill* ki devan nou. Mersi.

### **MR SPEAKER**

Mersi. Nou a ganny segonnman. Onorab Naidu.

### **HON SATHYA NAIDU**

Mosyon i ganny segonde.

### **MR SPEAKER**

Mersi. Nou ava vot lo sa Mosyon. Manm ki an faver lev lanmen silvouple.

*Thank you. Manm ki kont?*

Bon lo Mosyon pou *skip Committee Stage* lo *Criminal Procedure Code (Amendment) Bill*, 18 Manm in vot pour, 8 kont e 0 *abstain*. Donk Lasanble in aprouve ki nou pas *Committee Stage*. E dan sa ka nou ava al direk lo *Third Reading* e lekel ki ansarz? Onorab Georges ki ansarz i ava anmenn Mosyon pou *Third Reading*.

### **HON BERNARD GEORGES**

Mersi Mr Speaker. Mr Speaker anba *Order 76 (1)* nou *Standing Orders* mon move ki *The Criminal procedure Code (Amendment) Bill* i ganny lir en Trwazyenm Fwa. Mersi.

### **MR SPEAKER**

Segonde, Onorab Arissol.

### **HON SANDY ARISSOL**

Mersi Mr Speaker. Mosyon i ganny segonde. Mersi.

**MR SPEAKER**

Mersi. Nou ava vot lo *Bill* pou *Third Reading*. Manm ki an faver lev lanmen silvouple. Mersi. Manm ki kont?

Lo *Formal Third Reading Criminal Procedure Code (Amendment) Bill*, 2023, 18 Manm in vot pour, 0 kont, e 8 Manm in *abstain*. *Bill* in pase par Lasanble.

Bon mon remersye VP ek *Attorney General* pou zot. Sorry Madanm Clerk ou bezwen fer *Formal Third Reading* avan.

**MADAM CLERK**

Mersi Mr Speaker. *This Act may be cited as the Criminal Procedure Code (Amendment) Act 2023*. Mersi.

**MR SPEAKER**

Mersi. *Bill* in aprouve par Lasanble. Mon ti pe dir mersi VP e *Attorney General* pou zot partisipasyon e mersi bann Manm pou zot kontribisyon.

Nou ava aret la pou ozordi e nou ava kontinyen parey mon'n anons bann Manm an prive pandan Lasanble, mon pe propoze ki nou kontinyen avek *Bill* demen bomaten.

Nou ava *adjourn*. E nou ava rezwenn 9er demen. *Adjourn*.

**(ADJOURNMENT)**